

**NATIONAL ASSEMBLY OF
SEYCHELLES**

Tuesday 15th April, 2025

The Assembly met at 09am

National Anthem

Moment of Reflection

*Mr Deputy Speaker in the
Chair*

MR DEPUTY SPEAKER

Mon ava dir bonzour tou bann Manm Onorab, tou travayer Sekretarya e piblik Seselwa, nenport landrwa kot zot ete ou nenport fason ki zot pe swiv nou travay pou sa Mardi le 15 Avril. Bonzour e byenveni pou nou sesyon Lasanble Nasyonal ki pou dominen prensipalman par kestyon ozordi.

E nou annan 3 Manm *Cabinet* ki pou vin reponn sa bann kestyon. Mon ava dir en bonzour spesyal bann zanfann ki dan Galeri avek nou ozordi bomaten, bann zanfann sorti lekol Plaisance. *Welcome*, e taler dan *break* nou ava ganny sans annan en enteraksyon avek zot.

Pou nou kontinyen, mon ava demann Madanm Clerk pou fer prezantasyon bann papye.

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble, nou bann envite dan Galeri e osi bann dimoun ki a lekout. I annan 2 papye ki pe ganny prezante bomaten; -

Seychelles Human Rights Commission – 2024 Annual Report e osi *National Tender Board – Annual Report 2023*. Mersi Mr Speaker.

MR DEPUTY SPEAKER

Mersi Madanm Clerk. Avan ki nou pas lo premye *item* ki lo nou *Order Paper*, mon ava zis donn laparol briyevman, Manm Elekte pou distrik Plaisance pou en pti mo labyenveni pou bann zanfann.

HON RICHARD LABROSSE

Mersi Mr Speaker. Mr Speaker, mon ti a kontan dir bonzour Mr Speaker e osi tou bann koleg isi dan Lasanble e osi bann zanfann sorti Lekol Plaisance. I en plezir pou zot avek nou ozordi e nou espere ki zot ava pas en bon moman.

Mr Speaker, zis pou fer ou rapel ki Plaisance Primer i osi sel lekol ki annan li 4 Manm Lasanble ki reprezant li, sa i Cascade, Les Mamelles, Roche Caiman e osi Plaisance. Mersi.

MR DEPUTY SPEAKER

Mersi Onorab. Nou premye *item* i *Private Notice Question*

ki dan non Dirizan Lopozişyon. Mon ava demann *Hansard Reporter* pou apel delegasyon ki pou reponn keştyon. Mersi.

Mon ava swet la byenveni *panel* ki fek zwenn nou pou *PNQ*. *Panel* i dirize par Vis-Prezidan Larepiblik Mr Ahmed Afif e i akonpannyen par Sef Egzekitiv Lakonpannyen Devlopman Zil Mr Cyril Bonnelame.

E mon ava profite pou felisit Mr Bonnelame pou son lapwentman, mon krwar i fer son premye *appearance* dan Lasanble Nasyonal depi son konfirmasyon dan sa pozisyon, *welcome*. Mon ava donn laparol Dirizan Lopozişyon pou prezant son *PNQ*.

HON SEBASTIEN PILLAY

Mersi. Bonzour tou dimoun e bonzour bann etidyan ki dan Galeri e byenveni dan Lasanble Nasyonal. Mr Speaker, mon *Private Notice Question* i lir koumsa; -

Eski Gouvernman i kapab konfirman lekel ki pe zer e pou zer tou bann servis ki enkli litilite e lezot fasilite tel konman sa *aerodrome* lo Assomption prenan an konsiderasyon demisyon plizyer o Zofisye *IDC* avek bokou lannen leksperyans? Mersi Mr Speaker.

MR DEPUTY SPEAKER

Mon ava envit Vis-Prezidan pou son larepons.

VICE-PRESIDENT AHMED AFIF

Mersi bokou Mr Speaker. Bonzour Mr Speaker. Bonzour *Leader* Biznes Gouvernman, *Leader* Lopozişyon, tou bann Manm Lasanble, tou dimoun dan Galeri enkli bann etidyan sorti Lekol Plaisance e tou Seselwa a lekout.

Mr Speaker, *Leader* Lopozişyon pe demande, ki sennla ki pe zer bann servis parey litilite, servis *aerodrome* lo Assomption ozordi oubyen a lavenir. Se sa ou keştyon.

Mr Speaker, larepons se ki tou servis litilite e lezot enkli *aerodrome* lo Assomption pe ganny zere e pou ganny zere par *IDC*. Zenerater pe marse, delo pe marse, lasenisman pe marse, konstriksyon pe marse, *maintenance* pe ganny fer e pe marse e *Airport* Assomption i kontinyen fonksyonnen. Mersi bokou.

MR DEPUTY SPEAKER

Mersi Vis-Prezidan pou ou larepons. Onorab Aglae, mon pe donn siplemanter la.

HON EGBERT AGLAE

Mersi Mr Speaker. Mon a dir bonzour *VP* ek *CEO*, tou bann envite ki dan Galeri e tou dimoun ki a lekout e osi bann

Manm Onorab. VP mersi pou ou larepons ki ou'n donner.

VP, dapre Kontra *Lease clause* 11 i fer resorti ki se sa *sub-lessee* ki sipoze zer bann litilite ki enkli dan 11(2) i fer resorti ki zot ki pou zer bann litilite, *sewage, water supplies, fixing bann machinery, planting solution*, tou sa bann zafer. Kontrerman avek- aköz IDC ki *sub-lessor* e se *sub-lessee* i sa enn ki pou enplimant proze sa ki IDC li menm li in *sublet*.

Ki fer ki konpare avek sa ki ou, ou'n dir e konpare ek sa ki egziste avek bann lezot zil se IDC ki antreprann. E dan kontra ler nou pe gete dan *clause* i pa pe dir sa, i pe dir ki se *sub-lessee* ki pou zer sa bann *maintenance*. Eski- ki sa devloper li menm li? Mersi.

MR DEPUTY SPEAKER

Mersi pou ou kestyon. Dan kestyon orizinal mon pa war okenn masyon konsernan lagreman ki ou'n masyonnen dan ou kestyon. Solman i annan en *panel* la avek CEO IDC, mon ava permet si zot kapab reponn sa kestyon.

E mon reste lo menm laliny avek bann Manm se ki *let's be mindful of what the Standing Orders* i presiz nou e nou fer nou bann kestyon selon lord ki nou'n vin zwenn e nou pou kit lanmenm. *Panel*.

VICE-PRESIDENT AHMED AFIF

Mersi bokou Mr Speaker. Mr Speaker, mon repet sa ki mon'n dir. Responsabilite, sa dimoun ki pou zer tou bann servis i enkli litilite e lezot fasilite tel ki *aerodrome* lo Assomption ozordi e demen i reste IDC. Mersi bokou.

MR DEPUTY SPEAKER

Mersi. Onorab Gill.

HON CHURCHILL GILL

Mersi Mr Speaker. Bonzour tou dimoun prezan. Mon kestyon i koumsa, nou'n ganny dir ki bann litilite avek fasilite *airport* pou ganny zere par IDC. Eski lezot keksoz apard ki sa ki ou'n nonmen tou leres pou ganny zere par devloper, konstriksyon, lezot fasilite ki bezwen lo sa landrwa? Mersi.

MR DEPUTY SPEAKER

Mersi. Ankor enn fwa i fer dezyenm fwa mon tann sa zafer devloper. Mon pa war devloper dan *the original question, I don't know why* zot pe anmenn devloper.

Kestyon i reste selman lo fasilite lekel ki pe zere. VP si pou en trwazyenm fwa ou kapab reponn sa kestyon. Mersi.

VICE-PRESIDENT AHMED AFIF

Mr Speaker. Mersi Onorab. Kestyon i demande lekel ki pou zer litilite ek servis *aerodrome*, sa se kestyon. Mon'n reponn se *IDC*, mon pa'n vin la pou koz lo lezot keksoz apard kestyon ki zot met devan mwan. Mersi bokou.

MR DEPUTY SPEAKER

Mersi. Prosen Manm Onorab Loze. Dirizan Lopoziyon i annan en *point of order*. Ki order?

HON SEBASTIEN PILLAY

Mersi Mr Speaker. Mr Speaker, i pou anba *Order 8* an sa ki konsern *management* e travay Lasanble. *Standing Order* i dir en Manm pa devret fer okenn *statement* ki i pa kapab *substantiate*.

Onorab Aglae in *substantiate* atraver son kestyon i annan en kontra la, seksyon 11(2) ki dir ki *sub-lessee*, *sub-lessee* i sa devloper *Qatari* ki pou *maintain in good condition* tou *improvement sewers, drains, plants, machinery* ki pou enkli zenerater eksetera, se li ki pou *maintain* sa kontra i dir sa.

Vis-Prezidan in dir nou poudir se *IDC* ki pe fer sa, so i annan en kontradiksyon. So Onorab Aglae in *substantiate*. Petet si ou kapab demann Vis-Prezidan pou dir nou kote ki dir ki *IDC* ki pou fer sa travay

kontrerman ki sa ki sa ki dan sa kontra. Mersi.

MR DEPUTY SPEAKER

Mersi pou ou komanter Onorab. Si dan ou kestyon orizinal ou ti'n dir dapre lagreman sa devloper i sipoze fer sa, sa, sa eski alor zot pe zere? Napa sa kestyon devan nou. Be napa, so ekspre in anmenn *CEO IDC* la.

So pou mwan *you are introducing another matter which is not in the original question*, ki kontrerman avek *Standing Orders 37(2)*. E i kler ladan *the Speaker shall not* eksepte sa bann kestyon. So, a lafen lazournen se zot group ki bezwen byen prepar zot *and they ask the right question* pou zot ganny *the right answer*, zot pa'n fer sa.

Onorab Loze, *you are next*. Non, nou pa pe pran deba lo la, ou'n fini demann ou kestyon. Onorab Loze *you are next on the list*.

HON JOHAN LOZE

Mersi Mr Speaker. Mr Speaker, dan lespri byen prepare, kestyon si mon pa tronpe, mon Kreol i ankor bon i demande lekel ki pe zer e pou zer bann servis lo Zil Assumption. Mon ankor byen la Mr Speaker? Bon, nou kontinyen si mon ankor byen.

Vis-Prezidan in dir nou *IDC* ki pe zer e ki pou zer. *Now*,

kot mon problem i leve mwan Mr Speaker, se sa *sub-lease contract* ki zot in sinyen ou Gouvernman avek devloper ki dan 11(2) i dir klerman ki se sa *sub-lessee* ki pou zer e Vis-Prezidan li in dir nou se *IDC* ki pe zer e ki pou zer sa bann keksoz be dokiman kontra i dir en lot.

Now, mon kestyon si ou ava les li pase Mr Speaker, eski zot annan okenn lot lagreman ant zot avek sa bann Arab ki dir sa ki Vis-Prezidan pe dir la? Akoz lagreman egzistan ki annan devan mwan i dir klerman i kontradir sa ki Vis-Prezidan pe dir e i dir ki sa devloper, sa bann Arab sa *sub-lessee* ki pou vin zer nou zil, nou souvrennte pa nou. Mersi Mr Speaker.

MR DEPUTY SPEAKER

Mersi Onorab. Mon vwar ki lapant, solman mon pou retourn lo *panel*, baze lo kestyon orizinal, ou larepons silvouple. Mersi.

VICE-PRESIDENT AHMED AFIF

Mersi bokou Mr Speaker. Mr Speaker, mon'n fer kler poudir se *IDC* ki pe zer e pou zer tou sa bann servis ki enkli litilite ek servis *aerodrome*. Mon fer sa *statement* aköz sa se kwa ki'n ganny tonm dakor avek tou dimoun an sa ki konsern Assumption.

Mon pa'n vin isi pou mon fer en deba lo okenn lagreman, me mon pe dir zot enterpretasyon ki nou annan e ki nou fer i reste ki *IDC* ki pou zer, pe zer, pou zer litilite e tou servis *aerodrome* lo Assumption. Mersi bokou.

MR DEPUTY SPEAKER

Mersi. Onorab Uranie, ou prosen Manm lo lalis.

HON ROCKY URANIE

Mersi. Bonzour tou koleg Onorab, bonzour *panel* e bonzour tou zabitan Zil Pros ki a lekout.

An vi ki nou pe koz zer fasilite nou vwar *aerodrome* la ki pou bezwen ganny zere li osi, nou'n aprann ki resaman in annan en avyon ki'n apoze. Alor nou ti a kontan konnen lekel ki responsab oubyen ki pou zer pou fer kontrol laba? Mersi.

MR DEPUTY SPEAKER

Mersi Onorab. *Panel*.

VICE-PRESIDENT AHMED AFIF

Mersi bokou Mr Speaker. Mr Speaker, si zot annan sitan kestyon pou demande, be met zot kestyon byen, met li kler. Mon ti a kontan konnen lekel avyon ki ti kite, tel zour, ti apoze, mon pa ni konnen si ou ti dir ti apoze si ti *take-off*, ou ti a met li dan ou kestyon mon

ti a swiv zot *Standing Orders* mon ti a vin reponn.

Kestyon i lwen avek sa, kestyon i demande lekel ki pou zer bann servis ozordi ek demen, litilite avek *aerodrome*. Larepons i reste parey, *IDC*. Mersi bokou.

MR DEPUTY SPEAKER

Mersi. Onorab Tamboo, ou lanmen ti anler ou? Ou annan laparol.

HON LOUISETTE TAMBOO

Mersi Mr Speaker. Bonzour Mr Speaker. Minis ek ou *panel*, tou dimoun ki a lekout espesyalman zabitan Cascade e nou bann viziter dan Galeri.

Mr Speaker, sa zafer Assumption i zis parey *CCCL*, zanmen nou pou konn laverite. Mon kestyon, kan eski tou sa bann dokiman ki annan pou fer avek Assumption pou vin o piblik lagreman bio sekirite, larzan ki'n ganny donnen e kado osi ki'n ganny donnen? Mersi Mr Speaker.

MR DEPUTY SPEAKER

Mersi Onorab. Ankor enn fwa i pa annakor avek kestyon orizinal aköz kestyon orizinal napa okenn bann zafer kontra. *So, unfortunately, I cannot accept this question.* Onorab, ou'n fini demann kestyon ou? Savedir napa okenn Manm ankor ki'n lev

lanmen. Onorab Larsen *please*.

HON CELINE LARSEN

Mersi Mr Speaker. Bonzour tou dimoun prezan e en bonzour spesyal pou zabitan Au Cap ki a lekout. Vis-Prezidan mon'n ekout ou larepons ki i paret sak fwa nou koz lo Assumption, lenformasyon i vin par bout oubyen nou pa ganny ditou.

E lagreman biosekirite personn pa konnen ki annan lo la, Prezidan li menm pa konnen ki poudir zournalis lo ki kalite proze ki vreman annan lo Assumption. E mon krwar- eski zot pa krwar in plis ki ler pou zot aret zwe avek nou Seselwa kot i konsern nou souvrennte? Mersi Mr Speaker.

MR DEPUTY SPEAKER

Mersi Onorab kestyon ankor i *out of order* aköz i napa naryen pou fer ek kestyon orizinal pa pe koz lo lagreman biosekirite, donk i reste mwan zis pou donn loter kestyon son drwa siplemanter. Dirizan Lopoziyon.

HON SEBASTIEN PILLAY

Mersi Mr Speaker. Mr Speaker, annakor avek ou *Ruling* e ou determinasyon dan 16, mon pou lir ou *ruling* Speaker Mancienne ler mon ti

demann kestyon lo kontra e *Lease Agreement*.

E son *ruling* sete “kontra en *lease agreement* i *publicly available* alors i pa pou *allow* mon kestyon”. So si mon ti'n demann kestyon lo kontra sa menm *ruling* ti pou *apply* e mon pa ti pou kapab demande. Mon'n fer mon *duedeligence* mon'n al rod sa kontra e lezot kontra.

E dan sa enn ki la, i klorman dir, poudir *sub-lessee* ki *Ocean Breeze Investment*, *sublessee* *Ocean Breeze Investment* e non pa *sublessor* ki *IDC* savedir *Qatari*, Arab ki pou *maintain* tou *plant*, *machinery*, *drains*, delo, laponp tou keksoz dan sa kontra. Mon pa'n reste la Mr Speaker, mon'n osi al rod lezot dokiman ki mon'n kapab gannyen.

Par egzanp, mon annan en *Meeting SIF* ki ti ganny fer, ki ti ganny *attended* par Onorab Georges Mr Speaker, mon annan *EIA Master Plan*, e dan sa *Meeting SIF* ankor enn fwa i koz lo sa devloper ki pe fer- la i la Mr Speaker, mon mete pourki dimoun i war poudir mon pa pe koz dan vid.

I menm koz dan sa *Meeting SIF*, ler zot pe koz lo *Assumption* *tourism development* an sa ki konsern *biodiversity and ecosystem services*, i menm koz lo

helicopter apoz Aldabra dan sa lagreman, dan sa enn ki la.

Pa zis sa Mr Speaker, mon'n al rod ankor dokiman, mon al rod Mr Speaker, mon annan *SIF Meeting notes* mon'n sey ganny akse avek Mr Speaker, e sa *meeting* ti ganny fer Mr Speaker le 24 Avril 2024 e Onorab Bernard Georges *was in attendance*.

So mon'n al rod tou sa dokiman Mr Speaker, tou sa dokiman pou montre poudir mon pe vin demann en kestyon serye devan Lasanble.

So, pou en dernyen fwa nou pou re demann Vis-Prezidan, baze lo tou sa lenformasyon, baze lo lefe ki nou'n menm vwar ki sipoze annan restoran Franse, restoran Sinwan, *Japanese cuisine*, *beach club* lo *Assumption*.

I sipoze osi annan en *private dwelling* ki pou annan *entertainment building*, *private welcome center*, *gymnasium* tou sa bann fasilite Mr Speaker ankor enn fwa....

MR DEPUTY SPEAKER

Onorab Pillay! Onorab Pillay! Onorab Pillay! Ki ou pe fer la, ou konpletman an defo avek *Order 36(2)(a) which is an abuse of questioning*. Akoz ou pe anmenn en kantite keksoz ki otreman ou merit al zis dan ou kestyon, ou siplemanter setou.

Dirizan Lopozisyon silvouple *get on with your question*. Mersi.

HON SEBASTIEN PILLAY

Mersi Mr Speaker. Rezon mon bezwen fer sa akòz lo sa *ruling* ki ganny donnen pou nou pa kapab demann sa bann kestyon.

So ankor enn fwa prenon kont tou sa dokiman ki montre nou poudir se sa bann *Qatari* ki pe kontrol tou keksoz menm dan en kontra a note e sinyen ant *IDC* avek sa devlope ki dir se li ki pe *maintain*, eski Vis-Prezidan i kapab dir nou lekel ki pou zer tou bann fasilite enkli litilite, elektrisite bann *plants, machinery, fixtures, fittings, dren, sewers* parey lo lezot zil kot *IDC* i fer, lekel ki pou zer tousala lo Assumption?

E an pasan dir nou si zot in finalman deside pou les *helicopter* al apoze Aldabra parey sa dokiman biosekirite i dir ki sorti kot *SIF*? Mersi Mr Speaker.

MR DEPUTY SPEAKER

Mersi Onorab. VP, par lakourtwazi lefet ki Dirizan Lopozisyon ki'n anmenn sa kestyon e ou ava sey reponn son siplemanner ki pou mwan tou sa ki in dir i pa annakor avek son kestyon orizinal, me solman sey re eksplike. Mersi.

VICE-PRESIDENT AHMED AFIF

Mersi bokou Mr Speaker. Mersi *LOTO, Leader* Lopozisyon. Mr Speaker, mon pou repet ankor enn fwa, si *Leader* Lopozisyon i ti anvi ki tou dimoun i konn keksoz lo en lagreman, fer ou kestyon lo sa lagreman.

Napa naryen pou nou kasyet, ou fer ou kestyon lo sa lagreman, ou anmenn tou keksoz lo sa lagreman, ou sit *clause* sa lagreman, ou sit tou sa bann *item* ki ou'n site e i pa dan kestyon.

Ou annan en labitid fer sa Onorab, ou fer konmsi nou pe kasyet keksoz. Selman ou konnen lekel ki pe kasyet tou keksoz? Ou konnen lekel ki pe kasyet tou keksoz? Se ou ki pe kasyet tou ou bann kestyon ou pa met li dan ou *main question* ou, ou kasyet li par kote pou fer krwar poudir nou, nou pa reponn.

(APPLAUSE)

VICE-PRESIDENT AHMED AFIF

Be, ou *Standing Orders* i dir mon reponn sa ki ou'n demande. Ou pa demann ou kestyon apre ou ekspekte mwan a vin met reponn keksoz ki pa dan kestyon. Me annou azir fran, pran ou en desizyon, konnen lekel ou kestyon. Si ou pran en

desizyon ou konnen ou kestyon i lo lagreman vin ek lagreman nou a koz lo la.

Pou rezimen Mr Speaker, mon lenterpretasyon, pou reponn e pou fer en rezimen larepons, mwan ler mon'n ganny mon kestyon lekel ki pou zer ozordi ek demen bann servis litilite *aerodrome*, nou larepons i baze lo tou konsiderasyon, lagreman lo tou keksoz ki an plas ki pe arive lo Assumption.

E sa ki mon kapab dir ou nou lenterpretasyon baze lo tou keksoz se ki *IDC* ki pou zer sa tou sa bann servis ozordi e demen. Mersi bokou Mr Speaker.

MR DEPUTY SPEAKER

Mersi Vis-Prezidan. Sa in anmenn nou lafen nou *Private Notice Question* pou ozordi. Mon war lanmen *Leader Government Business* anler ou annan....

HON BERNARD GEORGES

Mon annan en *matter of privilege* Mr Speaker. Enn ki'n fek *arise*.

MR DEPUTY SPEAKER

En *matter of privilege*, ok. Mon panse krwar nou kapab permet *panel* fer zot depar aköz i ava en *internal matter* pou nou dil avek. Mersi pou zot letan e bonn kontinyasyon

sa Mardi lazournen. Onorab *LGB*.

HON BERNARD GEORGES

Mersi Mr Speaker. Mr Speaker, mon annan en *matter of privilege* anba *order* 40 ki mon oule met devan ou e sa i vin anba 40 *sub-order* (2), en *matter* ki fek *arise* aköz mon pa'n kapab demann ou permisyon pou mwan *raise* li avan.

Mr Speaker, mon non in ganny servi a 2 repriz par *Leader* Lopozisyon dan son kestyon e in fer serten alegasyon lo mwan, in servi mon non klernan, la i lev son lanmen prezan. In servi mon non 2 fwa e in met mwan dan en konteks kot in propoz avek Lasanble serten dokiman ki lo son *computer* e in fer serten alegasyon lo mon rol koman *Chairman SIF* e mon partisipasyon dan serten *meeting* ki ti napa naryen pou fer sa avek sa kestyon e avek li *Leader* Lopozisyon.

In ganny serten lenformasyon sa nou ava regarde pli tar ki mannyer nou pou dil avek, me i napa okenn drwa dan en kestyon ki'n ganny vize a Prezidan Larepiblik pou li servi lenformasyon ki napa naryen pou fer avek sa kestyon ki in demande, e ki privezye, e ki konsern mwan pou li servi mon non, e sey *impute*, e sey

impute ki *SIF* avek sa devloper or *IDC* is up to no good.

Sa Mr Speaker i en keksoz ki regretab, i pa devret ariv devan sa Lasanble, in al lev en kestyon lo *helicopter*, lo Aldabra mon pa konnen kote in al ganny sa. E lafason ki i pe anmenn sa lenformasyon devan Lasanble se konmsi sa in fini ganny aksepte, in fini ganny fer, ler nou konnen ki sa i pa leka.

Be Onorab *Leader* Lopoziyon Mr Speaker, en fwa pour tou fodre sa Lasanble in met en sel fren avek li, aköz i pou kontinyen fer sa, i pou kontinyen sey fer politik e nou pou war ki i pou fer en pe taler ler nou ariv lo son *Bill* ki i pe anmenn devan Lasanble. I pa posib e i pa akseptab ki en Manm i servi son privez pou li *tarnish* privez en lot Manm.

Alor, Mr Speaker mon pe demann ou *rule* lo sa *matter of privilege* si ou *rule* en faver ki mon privez in ganny afekte, mwan mon a anmenn en Mosyon apropiye kont Onorab *Leader* Lopoziyon aköz mwan mon pa per *Leader* Lopoziyon e mwan anvi ki i konnen ki sa ki i pe fer i pa akseptab. Mersi.

MR DEPUTY SPEAKER

Mersi. Mersi Onorab, e anfet letan Onorab, ti pe koze mon ti pe get *Standing Orders*, anfet i

kler *let's this be* en leson pou tou bann Manm.

E la mon enplor pibik Seselwa ki pe ekoute, letan nenport ki *presiding officer* i isi anler nou pa fer keksoz aköz nou annan en problemn personnel avek okenn Manm. *Standing Orders* i bann lareg ki diriz travay Lasanble e partou kot nou ale dan lavi, tou bann lenstans bann lenstitisyon i anan zot bann prop lareg.

Semenn pase mon ti fini legzanp foutbol, ou al legliz i annan bann etik ki nou bezwen servi, e pou Lasanble se sa nou *Standing Orders*. I kler ki Onorab Pillay dan son kestyon in *breach Order 36 (1)(m)*, *36 (1)(m)* ki dir klerman ki; -

"A question shall not be asked reflecting on the character or conduct of any person whose conduct can only be challenged on a substantive motion".

E sa i kler poudir in *breach* sa *Order* e mon sertennman privez *Leader of Government Business* in ganny *breach* aköz ou'n anmenn son non, son pozisyon dan en deba dan en kestyon ki lo *Order Paper*, ti napa naryen pou fer ni avek li e ni lorganizasyon ki i travay ladan an deor.

So, sa ki mon pe demann bann Manm, pou nou tou silvouple annou konsyan ki

Standing Orders i permet nou fer e pa permet nou fer e si nou reste *within our lane*, nou pou vwar poudir sa bann *polemic* ki pe arive la, la, la i pa leka.

So, *this is mon ruling* lo la se ki wi, son privez in ganny afekte e ki mon demann tou bann Manm pou silvouple konnen ki zot *Standing Orders* i permet zot fer e pa fer, e nou evite ki bann keksoz koumsa i arive. Mersi.

Mon- ou annan en *matter of privilege*? *State your matter of privilege*.

HON SEBASTIEN PILLAY

Mersi Mr Speaker. Mr Speaker, pareyman avek *Leader Zafer* Gouvernman anba nou *Standing Order*, mon krwar poudir *Leader Zafer* Gouvernman pe abiz son privez koman en Manm Lasanble. Pou li vin fer sa kalite *statement* ki in fer e pou ou donn sa kalite *ruling*.

Mon pou met an konteks keksoz devan piblik Seselwa pour ki nou ganny keksoz kler Mr Speaker. Mon'n ganny akize konmkwa mon devret demann mon kestyon dan en serten fason, mon annan an nwanr ek blan *ruling* Speaker Mancienne la, ki ti dir mwan poudir mon pa kapab anmenn okenn kestyon lo kontra aköz kontra i en *matter of a public document*, so efektivman ferm sa kestyon.

Now, ou dir poudir mon'n mansyonn non Onorab Georges, wi mon'n mansyonn son non, aköz koman *Leader Lopozişyon* zis parey Onorab Ramkalawan ler i ti *Leader Lopozişyon*, serten dimoun in donn li dokiman i ti nonm non.

Mon'n dir i ti prezan dan sa *meeting* mon pa'n *impute* son karakter, mon pa'n fer okenn *statement* derogatwar *towards* li e mon pa'n fer okenn sa bann keksoz ki ou pe dir. e pou Onorab Georges fer sa *statement* i pa korek.

E i pa zis mwan ki'n dir ki Onorab Georges ti dan sa *meeting* Mr Speaker lo televizyon Mr Glenly Savy in dir Onorab Georges ti dan sa *meeting*. Ok?

E letan Mrs Murray, Michelle Murray ti demann keştyon Mr Savy, i ti repete poudir Mr Georges ti dan sa *meeting*. So, i en *matter of public knowledge* ki i ti dan sa *meeting*, prezan Mr Speaker, mon pa'n *impute* naryen kont li, me pou ou fer en *ruling* koumsa kont mwan *it's unacceptable* Mr Speaker.

E mon pa krwar *it's fair*, annefe la mwan mon privez ki pe ganny vyole. Aköz sa ki mon krwar pe arive se ki Onorab Georges pa anvi mon *move* mon *Private Members Bill* taler i pe rod en fason pou li sanksyonn mwan. Sa ki pe arive e si sa i leka *then* i

montre poudir vre i per mwan dan Lasanble.

Be mon pou demann Speaker Mancienne pou donn en *ruling* lo sa ki pe arive bomaten aköz a okenn ka e nou kapab *go back to verbatim* a okenn ka eski mon *impute* okenn *improper motive* apard ki mansyonnen ki Onorab Georges ti prezan dan sa *meeting* e par lefe ki ou *Chairman SIF* i ok pou mwan mansyonnen.

Si i pa anvi mon mansyonnn son non *then* i *resign* koman *Chairman SIF* Mr Speaker. *That's it!* Me lefe ki i *Chairman SIF* ozordi *SIF* pe dil ek sa size eski mon pa ganny drwa mansyonnn *Chairman SIF* dan Lasanble? Mon pa ganny en konpran Mr Speaker, e pou ou met sa lo mwan mon krwar bomaten, piblik in war ki mannyer sa Lasanble pe fonksyonnen Mr Speaker.

Mon krwar poudir dan *Ruling* ki ou'n fer i *unfair* lo mwan e lo sa sityasyon ki'n arive e mon pa krwar poudir i devret *stand*. Mon pou demann Speaker Mancienne pou donn nou en lopinyon ki sa *ruling* e pou ou Mr Speaker, rekonnet lefe ki mon pa'n fer okenn alegasyon ki mon pa kapab *substantiate* avek dokiman ki mon annan.

Me tout an prezervan e protez mon sours kot mon

ganny mon lenformasyon parey Onorab Ramkalawan ti fer ler i ti *Leader* Lopozisyon. Mersi Mr Speaker.

(APPLAUSE)

MR DEPUTY SPEAKER

Mersi Dirizan Lopozisyon. Ou'n dir en kantite keksoz, me in en keksoz ki ou'n avoue poudir ou'n mansyonnn son non e *Order 36(1) (m)* i defann ou fer sa prezan pou ou al osi lwen ou'n anmenn lezot karakter enkli Mr Prezidan, Mr Savy, Manmzel Murray ladan. Pa ti nesese mon pa war poudir ou privez in ganny afekte aköz ou'n fer sir ou'n fer par ekspre.

In ler aprezan pou nou *move* lo lot *item*, mon krwar mon ava demann bann manm pou nou kontinyen avek *Questions for Oral Answer* pou silvouple ankor enn fwa mon enplor zot, e mon dir dimoun i pe ekout nou laba pou konpran byen ki mon pe demande, pou bann Manm regard byen ki zot *Standing Orders* i permet zot fer ou pa fer e ki alor Lasanble i kapab deroul dan en fason kalm e en fason profesyonnel parey nou dwatet pe travay.

Mon pa pe permet okenn lezot lentervansyon lo bann size ki'n deroule, parski in ler pou nou komans travay serye prezan. Mon ava demann

Hansard Reporter pou apel lot delegasyon. Mersi.

Mon ava dir bonzour e byenveni delegasyon ki fekwenn nou, delegasyon ki sorti kot Minister Lenvestisman, Lantreprenarya e Lendistri dirize par Minis Devika Vidot, i akonpannyen par Sef Egzekitiv *Seychelles Bureau of Standard* Mr Andy Ally e osi Manmzel Lisa Lautoy ki Sef Egzekitiv *Enterprise Seychelles Agency*.

Byenveni dan Lasanble e premye kestyon ki pou reponn i kestyon limero 52, ki dan non Manm Elekte pou distrik Plaisance.

HON RICHARD LABROSSE

Mersi Mr Speaker. Dabor mon ti a kontan dir ankor enn fwa bonzour tou dimoun e bonzour Minis avek ou delegasyon. E Mr Speaker mon osi rekonnet Mr Andy Ally ki en zanfan Plaisance en bonzour spesyal pou li osi.

Mr Speaker kestyon limero 52 i la *comme* swivan; -

Eski Minis i kapab enform Lasanble ki travay ki pe ganny fer kot Biro Standar Sesel pour ki sa biro i vin pli avanse lo son manda e pou fer sir ki bann prodwi ki antre Sesel i touzour lo en standar rekomande? Mersi Mr Speaker.

MR DEPUTY SPEAKER

Mersi Onorab. Mon ava envit *panel* pou larepons. *Minister?*

MINISTER DEVIKA VIDOT

Mersi Mr Speaker. Bonzour Mr Speaker. Bonzour tou bann Manm Onorab e bonzour tou bann dimoun ki a lekout. Mr Speaker, larepons kestyon Onorab i *comme* swivan; -

Sesel koman en Pti Leta Zil i enport plizyer prodwi ki sorti aletranze e i annan serten restriksyon ek legzizans ki an plas lo serten sa bann prodwi. Bi sa bann restriksyon se pour fer sir ki bann prodwi i konform avek bann stanfar ek regilasyon Sesel.

Bann prodwi restrikte i ganny trouve dan regilasyon *Customs* Sesel e anba sa regilasyon Biro Standar i ganny konsilte dan serten ka pou fer verifikasyojn bann dokiman osi byen ki sertifikasyn ki enportater in gannnen avek zot founiser aletranze.

Sa i aplik pour serten komodite parey plastik, *cement board*, vit, serten prodwi biodegradab eksetera. Tou le lannen atraver resours dan Bidze, Biro Standar i kontiny travay pou ogmant son kapasite, ogmant son bann lespeksyon ki i fer ensi byen ki serrvis laboratwar e osi amelyor konpetans lo lenportans litalizasyon e laplikasyon standar.

E nou devlop standar Onorab, pa selman pou siport lenportasyon me osi pou prodiksyon lokal. An fezan sa, nou pe ed sektè biznès devlope e lendistri lokal. Pandan sa dernyen 2an, detwè an SBS in travay lo standar pou bann prodwi tel parey lalkol e pou sa bann standar in ganny devlope pou bann prodwi lalkol ki'n ganny melanje e ki pare pou bwè. An Angle nou term sa *ready to drink*.

Standar i regard nivo lalkol ensi byen ki nivo disik dan sa bann prodwi e travay i kontinyen pou devlop standar divèn e *spirit*. Lo kote vit, SBS in revwar e in devlop nouvo standar pou vit ki pe ganny entegre dan nouvo *planning code* ki an se moman pe ganny travay lo la.

SBS in devlop standar pou lekipman elektronik, standar in ganny devlope pou bann lekipman tel parey boulwar, *toaster*, *fridge* bann *appliances* ki ganny servi bokou dan en lakour. E ansanm en travay e pe kontinyen avèk komisyon marse zis *FTC* pou kapab refer referans avèk sa bann standar dan regilasyon.

Travay in ganny fer lo standar pou delo, delo mineral prensipalman. E byensir apre nou'n fer osi en pe travay lo

bann lekipman ki pe ganny servi dan bann zwe mansyen.

I bon fer resorti ki malgre ki SBS i devlop standar i nesèser ki bann lazans ouswa bann Minister konsènen i fer referans avèk sa bann standar dan zot Lalwa ouswa zot regilasyon relevan pou li vin aplikab. Mersi.

MR DEPUTY SPEAKER

Mersi *Minister*. Mon ava envit loter kestyon pou son siplemanter.

HON RICHARD LABROSSE

Mersi Minis, pou ou larepons ki ou'n donnen. Mr Speaker, mon'n ekout Minis atantivman son larepons ki in donnen, me mon annan 2 pti kestyon siplemanter ki mon ti a kontan demann Minis kekfwè pou mon pli ganny en konpran lo la- lo zot lopeyasyon kot SBS.

Minis, ou'n dir ki *tax* ou'n nonm *Customs* osi ki i enn bann partner osi ki en pe enportan ler nou pe koz lo kestyon orizinal bann prodwi ki antre Sesel. Me mon konsèrn, premye konsèrn ki'n vin dan mon lespri ler mon ti pe travay lo sa kestyon, i konsèrn nan nou *landfill* ozordi ki annan dan Sesel koman en Pti Leta Zil.

Nou pe war bokou bann keksoz ki sorti an deor i vin *end up* lo nou *landfill*, me kestyon ki bokou dimoun i

kontan demande ki bor in pase, e nou tou nou konnen ki Sesel nou annan zis 2 port nou annan *Airport* Enternasyonal avek por kot bato i antre.

Minis, mon kestyon la, eski i annan bann Lalwa ki pe ganny travay ansanm avek *Customs* li menm li sa lorganizasyon ozordi ki donn laprouvasyon pou bann prodwi ariv dan pei, pou fer sir ki i annan bann travay en pti pe pli avanse pou fer sir ki bann prodwi ki nou pe gannye ozordi ki par egzant mon kapab donn en legzanp;-

En dimoun ozordi i aste en televizyon i fer i 2 zour i brile, i aste en *washing machine* i fer li 2 zour i brile apre tousala i *end up* lo nou *landfill* laba ki parey mon pe dir ou lespas i limite pou en pti pei.

So, la mwan mon anvi konnen ki bann travay ki pe ganny fer pou fer sir ki nou Lalwa i en pti pe pli for, ler bann prodwi pe antre dan pei?

Mon dezeyenm kestyon ki mon ti a kontan konnen ozordi ler nou pe koze, ki bann lorganizasyon ki SBS ozordi i asosye zot avek? E ki son lenportans ouswa ki led sa bann lorganizasyon pe donn SBS ozordi pou fer son travay? Mersi.

MR DEPUTY SPEAKER

Mersi Onorab. Mon ava envit *panel* pou en larepons.

MINISTER DEVIKA VIDOT

Mersi Mr Speaker. Mr Speaker, mon pou pas lo sa 2 kestyon e apre CEO pou donn en detay lo la. An relasyon avek travay ki nou pe fer, dan mon larepons mon'n eksplike pou dir ki standar pe ganny devlope pou bann *appliance* elektronik.

E parey ou'n fer mansyon Onorab sa i aplik pour bann lekipman ki bokou bann lakaz i aste *toaster, microwave, washing machine* eksetera. Akoz zisteman nou'n vwar poudir i annan en sityasyon kot bokou sa bann lekipman la kantite letan ki la kantite dirasyon son dirasyon i limite. E ansanm avek *FTC, SBS* in fer en travay e CEO i ava donn ou en pe plis detay lo la.

SBS i an relasyon avek partenarya aletranze, nou annan bokou relasyon ki nou mentenir koman en lotorite ki ganny akredite enternasyonalman, nou Manm *SADC*, nou Manm *COMESA*, sa i fasilite osi nou relasyon avek bann lezot pei Manm.

E nou osi annan bann Lagreman *Memorandum of Understanding* ki SBS in sinyen avek son omolog dan bann lezot pei e sa i ede ki letan i annan bann lezot servis

kot SBS dizon zot pa kapab donnen, zot touzour annan sa laport kot zot, i annan sa fason kot zot kontakte bann lezot lotorite e la zot kapab donn sa servis. Mon a pas laparol Mr Speaker avek *CEO*.

MR DEPUTY SPEAKER

Mr Ally?

CEO SBS ANDY ALLY

Mersi Mr Speaker. Mersi Minis. Bonzour tou bann Manm Onorab isi prezan. Mersi pou ou kestyon Onorab, pou Plaisance.

Parey Minis in dir lo kote bann lekkipman elektronik nou *focus* parey se fer sir ki sa bann prodwi ki pe antre isi Sesel i *safe*, e i annan en travay nou'n deza komanse avek *FTC* i annan apepre en 22 standar pou bann prodwi *household* ki nou abitye servi dan lakaz.

Nou konnen i annan *fan*, boulwar, *cooker*, preski tou sa 22 nou'n adopte sa bann standar e ansanm ek *FTC* sa bann standar zot in en regilasyon ki *FTC* in vin, preski fini devlope, selman i preski pre pou zot pli tar anmenn pou li kapab ranforsi. Sa regilasyon i fer provizyon ki konmkwa tou sa bann prodwi ki pou vini sa lalis prodwi ki pou le moman zot in swazir detrwa pou fer sir ki nou annan kontrol lo *border*.

Lo kontrol savedir lo laspe *safety*. Nou konnen sa bann prodwi i sorti dan diferan pei aletranze e tou sa bann prodwi laplipar letan i annan standar enternasyonal ki devret *comply*.

E nou isi lo kote SBS nou pou travay avek *Customs*, nou pou travay avek sa bann marsan. Deza tou sa bann marsan ki pe fer vini sa bann prodwi *FTC* in fer en travay ek zot lafason ki nou pou kontrole nou annan bann sertifika ki nou pou gete *at the border*.

E nou pou fer bann sansibilizasyon deza nou pe al koman fer bann sansibilizasyon bann program pou fer sir ki bann marsan i *onboard* aköz zot ki pou fer vini sa bann prodwi. Zot osi zot annan en responsabilite pou fer sir ki bann prodwi ki vin Sesel i *meet* bann voltaz.

Laplipar letan ou pou war i bann voltaz ki pa pe ganny respekte. Nou konnen Sesel nou voltaz i dan 230, 240 e par ler i annan bann keksoz ki pe vini i 200, 220, se sa ki ou war ki i bann keksoz ki ou war sa bann prodwi apre i pa marse. Me sa kontrol pou minimiz en pe lenpak en konsonmater i aste bann prodwi ki pa bon kalite e i pa dirab. Mersi Mr Speaker.

MR DEPUTY SPEAKER

Mersi Mr Ally. Onorab Roucou, ou prosen Manm.

HON MICHEL ROUCOU

Mersi Mr Speaker. Bonzour a tous. Bonzour zabitan Mont Fleuri.

Minis, mon kestyon i se ki dan sirkonstans kot i ganny war ki i annan bann prodwi ki pa lo standar, elektrik, elektronik konstriksyon ouswa manze, eski Biro Standar i annan en seksyon legal ki kapab pe gid zot en pti pe lo bann aksyon ki kapab ganny pran? Oubyen si i annan en departman li menm li ki'n zot, en Departman Legal ki zot, zot travay pres avek?

Apre osi mon ti a kontan si zot dir avek Lasanble si i annan serten bann aksyon ki'n ganny pran avek bann serten lakonpannyen, oubyen bann dimoun ki fer vini bann prodwi? Akoz zot pa pe onor bann lagreman lo kote sa zafer standar li menm li. Mersi.

MR DEPUTY SPEAKER

Mersi Onorab. Panel, larepons.?

MINISTER DEVIKA VIDOT

Mersi Mr Speaker. Onorab, parey mon'n fer resorti, i annan serten sirkonstans kot pou sa standar vin- pou li annan lefe ou bezwen annan en regilasyon ouswa i annan

en morso Lalwa kot sa standar pe ganny fer referans ladan.

E an fezan sa, i fer ki sa antite ouswa sa lazans i ganny li sa *benchmark* kot la prezan i kapab ale e ranforsi. E CEO i ava donn ou detay lo bann diferan sirkonstans kot sa i aplike.

An relasyon avek travay ki SBS i fer, si mon donn ou en legzanp, lo kote vit, parey nou'n fer sorti i an nouvo standar vit ki nou travay lo la e in deza annan en standar ki deza egziste. E ki SBS i pe fer la se ki i pe fer bann lenspeksyon kot bann lakonpannyen ki swa i fourni vit ouswa zot *manufacture* ki pe fer sir poudir prosedir ki zot pe met an plas zot pe swiv standar.

So, i ede, i kontinyelman fer lenspeksyon i travay etrwatman avek lotorite *license* pou fer sir poudir i annan sa bann standar ki pe ganny respekte. Mersi.

CEO SBS ANDY ALLY

Mersi Minis. Mersi Onorab. Parey in dir lo kote SBS, wi dan nou Lalwa i annan serten bann prodwi ki anba nou Lalwa nou kapab kontrole. Par egzanp in dir vit i enn ki okenn dimoun ki anvi fer vini vit *at the border* nou SBS ki donn sa laprouvasyon pou li kapab ganny son *import permit*.

E parey Minis pe dir, nou pa get zis lo kote ler sa vit i antre dan pei, nou pe get en pe sa bann *manufacturer*. Akoz i annan diferan kalite dimoun ki fer vini vit i annan dimoun i anvi enport vit sorti deor pou met ek son lakaz in ganny tou son mezir i al met dan son lakaz.

Me i osi annan enn de bann *manufacturer*, i annan 14 zot ki pe fer biznes vit isi Sesel zot annan *license*, nou'n vizit zot tou e nou pe kontinyen sa legzersis pou fer sir ki sa bann vit ki nou'n aprouve - parey bann *safety glass* nou pe ankouraz bon pe *safety glass* pou ganny servi konmela e ki zot pe fer bann prodwi ki sa *safety glass* i ladan.

E nou'n deza etabli en program, noun komanse e sa nou pou kontinyen ziska ler ki tou sa bann *manufacturer* i ava konnen. Akoz nou pa kapab depan lo en konsonmater. Sa konsonmater li i pa konnen ki sa vit sa *sliding door* la ou devret met en vit ki *safe* ki pa ava bles ou e okenn person pa ava ganny en dimal, se sa ki nou pe sansibilize ou *manufacturer* ou annan en responsabilite pou fer sir ki sa prodwi ki ou pe fer i o kalite.

E osi lo kote bann keksoz elektronik parey mon pe dir ou, *SBS* li i devlop standar

parey Minis pe dir nou devlop en kantite standar nou. Me isi Sesel i annan en kantite bann lotorite konpetan, ki nou pe ankouraz zot pou referans nou bann standar ler zot fer bann regilasyon.

Lasante lo laspe manze lo en kantite standar manze ou war lasante i fer en pe referans bann standar me i an ankor ki i kapab fer referans. Parey Minis in koz lo standar delo, annou fer standar delo in en regilasyon ki lasante pe fer pou li kapab ranforsi standar pou pli kapab ranforsi bann standar delo ki ganny fer isi Sesel.

Lo kote *FTC*, pou le moman parey nou pe sey dir *FTC* pe fer sa regilasyon pou kontrol *safety*, bann lekipman elektronik. Pou le moman *FTC* wi i gannye serten konplent lo kote bann lekipman be selman i annan en sityasyon *remedial* ki *FTC* i pe fer avek sa bann *manufacturer*.

Be selman ler pou annan sa Lalwa nou pou annan plis kontrol *in regards to* sa bann prodwi pou minimiz risk okenn enportater fer vini bann *subquality product* pou kapab rann. E si i annan o menn defo ek sa bann prodwi i annan bann *offences* bann keksoz ki anba Lalwa *FTC*, *FTC* i kapab pran mezir ek zot. Mersi Mr Speaker.

MR DEPUTY SPEAKER

Mersi Mr Ally. Mon ava donn laparol Onorab Esparon.

HON REGINA ESPARON

Mersi Mr Speaker. Bonzour Minis, ek ou delegasyon e bann zanfan dan Galeri. Mr Speaker, mon keston se ki lekel ki annan sa rol *oversight* ant zot Minister, SBS avek Minister Lasante, sirtou kot i konsern bann prodwi manze ki lo *market* ki pa lo standar?

E ki kalite verifikasyon ki ganny fer, kalite kolaborasyon ki annan ant zot Minister avek Minister Lasante dan sa domenn? Mersi.

MR DEPUTY SPEAKER

Mersi Onorab. *Panel*.

CEO SBS ANDY ALLY

Mersi Mr Speaker. Mersi Onorab, pou ou keston. Bann lotorite konpetan parey SBS nou travay etrwatman avek *Public Health*, Lanvironnman, *FTC*.

E lo laspe manze menm Departman Lagrikiltir, menm lo laspe manze ou konnen i annan bann travay ki nou fer antre kanmarad nou Manm lo zot *Food Control Board* e nou annan lasistans servis laboratwar ki si nou annan kapabilite nou ed zot e i annan bann travay ki nou fer ansanm pou asire ki bann prodwi lo

marse i *safe* pou konsonmater.

E la ozordi mon kapab dir i annan en legzersis ki pe ganny fer ant sa bann lazans ki ou'n nonmen Lotorite Lasante *FTC*, *SPS*, *Customs*, *SRC*. Kot zot pe pase i annan serten prodwi manze, prodwi *bakery* ki zot pe pase pou fer sir ki bann Lalwa *labelling* pe ganny byen *apply*, fer sir ki sa bann prodwi kot pe ganny fer i en landrwa izyenik.

E sa i bann laspe kot nou travay an kolaborasyon tou lotorite ansanm apre en sel bi pou asir kalite bann prodwi ki nou konsonmater i konsonmen. Mersi Mr Speaker.

MR DEPUTY SPEAKER

Mersi Mr Ally. Mon a donn laparol Onorab Arissol.

HON SANDY ARISSOL

Mersi Mr Speaker. Bonzour tou dimoun a lekout. Mr Speaker, mon annan 2 keston ki mon ti a kontan demann avek *panel*.

Mon premye keston ki mon ti a kontan demande se, kapasite an term lekipman modern ki zot annan e osi kapasite pou zot bann teknisyen an term *training* lokalman oubyen *overseas*.

Dezyenmmman, mon ti a kontan demann avek zot si zot annan rikord kot zot koman

SBS zot in termin, ekstermin fer serten okenn prodwi ki zot santi pa ti lo standar? Mon a donn en legzanp; -

Par egzanp bann lalkol ki'n prodwi lokalman, eski zot annan rikord oubyen lezot prodwi ki zot koman Biro Standar zot in dir non, sa pa pou kapab pase parske i pa lo standar? Mersi bokou.

MR DEPUTY SPEAKER

Mersi Onorab. *Panel?*

CEO SBS ANDY ALLY

Mersi Mr Speaker. Mersi Onorab, pou ou kestyon. Lo kote kapasite, parey Minis in dir tou le lannen dan nou Bidze nou fer provizyon pou ganny bann nouvo lekipman, nouvo resours pou nou kapab kontinyelman fer sir ki nou annan sa kapabilite.

Mon a kapab dir ou Onorab ki nou bann kapabilite ki nou annan tou le lannen nou pe progrese e nou kapab fer sa bann serten bann tes ki mazorite bann dimoun pe demande en bon pe tes ler ou pe gete SBS mon kapab dir apepre 50 pousan nou bann tes ki nou fer i vize ver eksportasyon pwason.

I pran en bon pe nou resours, me selman nou pe mazin pou nou *extend* en pe plis aköz i pa zis pwason i annan diferan domenn ki nou ede, ler ou pe get domenn

tourizm, dan domenn konstriksyon pe get dan domenn *sewage* i annan en kantite servis ki nou fer, me selman par kont se ki sa bann lekipman i koute.

E ler nou fer Bidze nou planifye ki sak lannen ki kalite bann lekipman ki nou pou gannye e nou ganny bann donasyon osi ki bann partner ki ed nou. Be selman i en keksoz kontinyel pou nou ogmant nou kapasite.

Lo laspe konpetans wi, ler nou pe get SBS, nou annan en bon pe bann manrmay ki pe travay pou en bon pe letan, e tou le lannen nou pe devlop konpetans bann manrmay. E i annan bann *training* ki nou gannye lokalman e i annan bann *training* ki nou fer *in-house*, e i annan bann *training* ki nou al fer aletranze.

E mon byen kontan ki i annan loportinite sirtou bann *higher education* nou konnen i konnen i en pe ser pou anvoy tou manrmay deor, e la i annan en travay ki deza SPS pe fer avek Liniversite Sesel kot nou war bann manrmay kot nou kapab anrol zot pou ganny zot *higher education* zot degre sa i bann keksoz ki kontinyel ki nou pe fer.

Aprè nou annan en *succession planned* manrmay ki ranplas lezot ki ale, lo kote ou pe demann en prodwi si nou'n deza arete, wi, lo lalkol

nou'n fer en kantite, nou'n fer legzersis e oparavan i annan bann lalkol parey ou pe sey dir ki ti lo marse e nou ti pe santi i pa ti lo sa nivo li nou nepli war.

Me i annan legzersis ki nou pe kontinyel parey Minis in dir nou pe konsantre en pe lo enporte aköz nou war i annan en bon pe enporte e le bi sa legzersis parey Minis pe dir se pour nou kapab pran en pe, pran bann lalkol nou annan lekipman.

E ansanm nou'n ganny lasistans avek SRC e ki i pe ed nou li osi in en lekipman kot pou nou al kontinyen fer en tes lo en pli gran splander, pou asire ki sa ki fer lokal, sa ki fer enporte i pe *meet* sa bann kriter sa bann legzistans ki standar pe demande.

E nou si i annan keksoz ki, okenn keksoz ki nou dekouver ki nou'n teste menm atraver nou fer bann nou apel sa bann nou al lo *Shell* nou al aste zis pou tyeke ti konsern lasante nou pou enform lasante. Mersi Mr Speaker.

MR DEPUTY SPEAKER

Mersi Mr Ally. Onorab William.

HON WAVEN WILLIAM

Mersi Mr Speaker. Bonzour Minis avek ou *panel* e bonzour piblik ki pe ekoute e byenveni bann etidyan ki dan Galeri.

mon kestyon i *comme* swivan;
-

Mon anvi demann avek Minis e CEO, par lefe ki sa size i en size ki ozordi pe vin vremen enportan, ver proteksyon konsonmater. Mon anvi konnen si zot annan en renyon kelkonk avek tou bann lazans ki annan pou fer avek proteksyon konsonmater?

E si en konsonmater ozordi i anvi al rod lenformasyon vizavi bann standar, eski i annan en lokasyon ouswa en *focal point* ozordi i kapab ale ouswa zis ki zot i annan serten piblikasyon lanvi fer sorti dan lavenir pou fer sir ki konsomater i azour avek bann lenformasyon?

Akoz parey ou'n dir CEO pa bokou dimoun ki vremen konsyan ozordi kwa ki i pe konsonmen ouswa si sa kontrakter pe, sa servis ki i pe donn nou atraver bann materyo ki i pe servi si i bann standar ki akseptab. Mersi

MR DEPUTY SPEAKER

Mersi Onorab. *Panel*.

CEO SBS ANDY ALLY

Mersi Mr Speaker. Mersi Onorab. Onorab, ler ou pe get kot SBS toulezour en kantite kliyan i vin kot nou, i telefonnen pou demann lenformasyon lo standar. Nou annan bann lenformasyon ki nou mete parey lo nou *website*

lo nou lalis bann katalog ki lo bann standar ki nou devlope.

Me selman nou osi SBS i servi bann lezot metod sansibilizasyon, sak fwa i annan bann nouvo keksoz ki nou fer nou fer medya vini kot nou kapab montre bann dimoun kwa ki nou pe fer.

E sa i en keksoz ki mon krwar nou pou kontinyen, nou pou servi tou bann loportinite ki nou annan, i annan bann lokazyon ki nou apel sa bann *World Standards Day*, *World Acquisition Day* kot nou promouvwar.

Lannen pase nou'n fer en kantite bann louvertir kot bann dimoun i vin kot SBS i piblik, kot zot konnen enpe kwa ki nou fer menm dan bann letan Novanm ler nou fer *Entrepreneurship Week*, i annan en laspe kot nou fer bann dimoun okenn piblik vin kot SBS i en keksoz kontinyel ki nou pou fer *in regards to* sansibilizasyon.

Me selman en bon pe bann dimoun i tant pou *phone in*, *phone in* i demann nou i anvi fer vini en keksoz, nou annan en *advisory service*, nou apel sa *externalary service* kot nou donn lenformasyon bann dimoun lo laspe standar ki pou gany servi dan serten-dan diferan lokazyon.

Sa i en keksoz kontinyel Mr Speaker, ki nou pou kontinyen fer, pour ki nou vin

en pep ki konsyan tou prodwir i bezwen annan en standar, ou bezwen konn sa standar pou kapab *benchmark* sa prodwi ki ou pe al rode ouswa ou pe al aste lo marse. Mersi Mr Speaker.

MR DEPUTY SPEAKER

Mersi Mr Ally. Onorab Andre.

HON CLIFFORD ANDRE

Mersi Mr Speaker. Bonzour Minis, delegasyon, tou dimoun a lekout.

Mr Speaker, mon ti a kontan-mon premye kestyon annefe in ganny pran par Onorab Arissol, me selman mon ti a kontan *expand* lo la. I konsern lekipman. I annan bann *appliance in terms of socket -switch*, menm isi annan en stanp lo la i pa neseserman i pe *comply* avek sa ki isi.

Eski zot annan sa bann lekipman pou zot teste sa bann keksoz? Akoz mon'n fer leksperyans *case* kot *FTC* dan sa konteks. So, mon ti a kontan demann sa enn premye.

Dezyenm, se mon konnen i annan bann dimoun ki tir bann *sample*. Par egzanp letan nou pe get bann konkret, eski letan sa bann *sample* i ganny anmennen kot zot, eski zot verifie oubyen konfirman ki lekipman ki'n ganny servi

pou *extract* sa *sample* i annord e in ganny kalibre?

Oubyen zis zot pran sa *sample* e zot teste li pou zot donn zot **crush test in terms of* konkret ki ganny anmenn kot zot? Mersi.

MR DEPUTY SPEAKER

Mersi Onorab. *Panel*.

CEO SBS ANDY ALLY

Mersi Mr Speaker. Mersi Onorab, pou ou keston. Lo kote bann tes, ler ou pe gete SBS koman en lotorite ki devlop standar nou annan kapabilite pou fer enn de tes, pa tou tes ki nou kapab fer.

Lo laspe bann keksoz elektronik parey ou pe dir *plug and socket*, nou, nou napa tou sa kapabilite pou nou kapab fer sa bann tes, me selman ou gete si sa bann prodwi i annan en standar enternasyonal e ler ou pe lir sa standar enternasyonal ou pou vwar ki bann tes ki'n pas ladan.

E konmela dan komers tou bann pei i konn byen, tou bann pei ki manm WTO, si nou Sesel nou, nou met en serten restriksyon nou dir, si ou anvi enport sa bann prodwi ou bezwen donn en sertifikasyon enternasyonla ki tou *manufacturer* i ganny, i si sipoze donn ou koman enportater pou akonpany sa prodwi.

Sa in egziste *all around* sa e zis fodre ou dan ou pei ou met sa Lalwa pou dir i egziste fodre ou donn sa dimoun sa. Sa i en pa kot i kapab ede pou kapab- ou pa bezwen al *invest* pou teste bann keksoz elektronik i kout en kantite larzan, vreman en kantite larzan.

Alor ou met en lot bann lezot mekanizm pou kapab fer sa, ler ou ganny sa sertifikasyon i pa vdir ou isi Sesel ou pa kapab fer detrwa serten tes ki ou kapab ganny kapabilite. I annan bann tes ki ou kapab fer i annan bann pti lekiman *handheld* ki ou kapab servi.

Me selman i en keksoz ki nou pe kontinyen gete ki bann *area* nou pou met li dan nou Bidze pou nou ganny sa bann lekiman *in* adisyon pou nou kapab kontinyen fer sa bann tes pou fer sir ki sa bann *plug and socket* paret ou pe sey dir kantmenm i annan sa *sticker* in la i pa neseserman i korek, be en sertifikasyon nou kapab *trace*.

Tou sertifikasyon ki nou pe ede ennler parey ou pe dir Departman Lanvironnman i ganny difikilte en prodwi in antre i pa konnen si vreman sa sertifikasyon i ok i koresponn avek sa prodwi be nou, nou an diferan fasilite atraver nou bann partner aletranze pou nou kapab depiste si vreman sa bann sertifikasyon i otantik.

Nou war en kantite prodwi ki pe sey fer antre sertifika i pa otantik e nou, nou'n kapab debiste sa e sa prodwi pa pou ganny letan ariv isi lo marse. Lo kote *sample* parey ou pe sey dir tou nou lekipman nou koman en Biro Standar Sesel ou konn byen nou akredite pou nou eksporte.

Me nou osi nou bann lekipman ki nou- tou nou bann lekipman ki nou pe servi i *traceable*, nou bann lekipman i kalibre, nou bann lekipman i ganny byen *maintain* pou fer sir ki rezilta ki nou pe konnen parey ou pe dir nou, lo kote nou *compression machine* ki nou teste en bon pe *cube* ladan, i ganny kalibre, nou annan sistenm pou nou kalibre li e fer sir ki sa rezilta ki nou pe donnen i en rezilta ki korek ki enzenyer i kapab servi. Mersi Mr Speaker.

MR DEPUTY SPEAKER

Mersi. Onorab, mon vreman dan problem letan, ou annan-

HON CLIFFORD ANDRE

I pa'n konpran mon dernyen kestyon mon pa dir i pe demann li lekipman ki SBS i servi, me mon ti pe demann li lekipman ki sa bann dimoun i servi pou anmenn sa *sample* kot SBS si sa zot verifye.

MR DEPUTY SPEAKER

Oule zis klarifye sa vitman?

CEO SBS ANDY ALLY

Mersi Onorab. Si ou pe koz dan konteks konstriksyon ler ou gete i annan plizyer lakonpannyen konstriksyon diferan laklas kontrakter ki zot fer zot bann *cube*, e zot kapab met en beton pou en *floor* pou en *beam*, pou en pilye zot tir en *sample* pou fer sir ki pe *meet* sa bann legzizans ki lo plan in aprouve e i annan diferan.

I annan bann dimoun ki fer zot annan zot moul pou zot fer sa bann brik, e standar enternasyonal i dir fodre ou annan 3 brik pou ou anmennen. E par ler nou remarke i annan bann brik ki vini i annan ki en pe tord ou fasil konnen in fer en moul dibwa e i annan ki ou war pe vini byen drwat byen kare 150, 150 ou konnen in fer dan en moul feray.

E nou, nou laspe se ki nou pe- i annan en program kot nou pe al sansibiliz sirtou sa bann dimoun kot oule anmenn sa bann *cube* pou nou teste pou fer sir aköz standar i demann ou i dir ou fodre i 150 par 150 e si i pa 150 par 150 nou landrwa pa aksepte. Aköz? Se ki ler nou pou al *apply* presyon lo la i pa pou *apply* plat lo la li, nou pou

apply, i pou tord, ou pa pou ganny en bon rezilta.

I annan en laspe sansibilizasyon ki nou santi nou pa zis teste be eksplik bann kontrakter aköz mon konnen ki ler zot dan sa domenn, me selman pa neseserman zot tou ki pe konpran sa standar *how it's supposed to-* se sa ki nou pe sey war se zis lo laspe sa *cube* ki en pti pe plis sansibilizasyon *how to go about* pou fer li. Mersi Mr Speaker.

MR DEPUTY SPEAKER

Mersi Mr Ally. An fet Mr Ally ti la pou zis sa kestyon. Me nou pou al *break* 10er edmi, i ok pou ou kontinyen asize? Koumsa ou pa bezwen al deor Lasanble, nou pou bouz lo kestyon 53 aprezan e sa i dan non Onorab Manm Elekte pou Distrik Anse Royale.

HON SYLVANNE LEMIEL

Mersi Mr Speaker. Bonzour Minis avek ou delegasyon e tou dimoun ki a lekout. Mon kestyon i *comme* swivan; -

Minis, i annan en magazen dan *Departure Lounge Airport* kot bann artizan Seselwa i met zot prodwi oubyen louveraz pou vann. Sa magazen i konmela tonm anba ESA. Bokou artizan pe konplent ki sa magazen pa pe pran zot

louveraz parey avan, e sa pe koz bokou problem pou zot aköz zot ti ganny en mwayen viv atraver lavant zot prodwi laba.

Eski Minis i kapab eksplik sa Lasanble e osi bann artizan ki ti met zot travay dan sa magazen dan *Departure Lounge Airport*, ki problem ki ESA pe rankontre, ki fer ki zot pa pe pran otan travay sa bann artizan lokal parey zot ti fer avan? Mersi.

MR DEPUTY SPEAKER

Mersi Onorab. Mon ava envit *panel* pou larepons.

MINISTER DEVIKA VIDOT

Mersi Mr Chair. Mersi Onorab. Onorab, ESA i annan 2 laboutik avek Nor Artizan Des Iles, enn i sitye *Camion Hall* e lot parey ou'n fer resorti dan ou kestyon i annan menm non e li i sitye dan *Departure Lounge* kot *airport*.

Bi sa 2 laboutik se pou donn bann artizan spesyalman bann ki napa en lokasyon en platform pou zot kapab demontre e vann zot bann prodwi, i form parti nou manda pou siport biznes par donn bann platform pou zot ganny akse avek marse.

An 2024 ESA ti komans en travay pou fer leveran lo sa 2 laboutik apre ki leveran pa ti ankor ganny fer pou bokou letan. An fezan sa legzersis e

sa ti idantifye bokou defi ek prosedir ki mannier levanter ti pe ganny zere e byensir kapabilite kot i konsern laboutik.

Pou *ESA* kapab fer le nesese pu enplimant en bon sistenm levanter in bezwen dan sa moman redwir la kantite prodwi ki pe pran avek artizan. Nou'n osi bezwen ferm laboutik pou detrwa zour, an se moman en nouvo sistenm *POS* in ganny enstale e bann lezot mezir pe ganny met an plas pou fer sir ki loperasyon laboutik i vin pli annord. Mersi.

MR DEPUTY SPEAKER

Mersi Minister. Onorab Lemiel, ou annan siplemanter.

HON SYLVANNE LEMIEL

Mersi Mr Speaker. Mersi Minis, pou larepons ki ou'n donn mwan. Minis, eski ou Kapab dir mwan la ozordi si zot in komans repran travay bann artizan?

E mon ti a kontan konnen an term, parey i annan bokou artizan ler i apros nou e letan petet dan formilasyon sa keasyon osi ki in ganny anmennen akoy artizan menm ki apros nou. Me mon ti a kontan konnen an term relasyon travay, par egzantp i an serten artizan ki santi ki zot oule devlop zot en pe plis e manda, Manda *ESA* li

menm mon ti pe regarde si i annan posibilite parey zot lye en travay avek *NAC*?

Letan zot pe travay, eski zot annan sa lyen travay ansanm pou ed bann artizan ki bezwen serten *training* or ki bezwen petet amelyor en pti pe petet zot osi zot bann prodwi, eski zot annan sa lyen travay avek *NAC* pou zot kapab ed nou bann artizan?

E letan nou lo sa magazen kot *Departure Lounge* Minis, eski zot in kapab vwar or ou menm ou, ou pe vwar ki i annan mezir en pti pe plis strik kekfw ki ou pou bezwen mete apard zafer *POS* kekfw ki ou santi ou'n mete laba?

Travayer li menm, eski zot annan ase sa bann konpetans e eski bann prodwi ki laba par egzantp lo kote travayer *shift*, mon pa konnen si i tonm anba *ESA* si kwa, konmsi ki toultan sa laboutik i reste ouver ki prodwi sa bann artizan li menm i kapab annan en lavant?

E eski *ESA* i annan en *commission* or okenn keksoz ki zot gannye atraver lavant prodwi sa bann artizan ki ganny mete swa Camion Hall, swa *Departure Lounge*? Mersi.

MR DEPUTY SPEAKER

Mersi Onorab. Minister.

MINISTER DEVIKA VIDOT

Mersi Mr Speaker. Onorab, pou le moman nou pe komans dousman, dousman pou repran bann prodwi. I bon fer resorti ki letan nou ti pe fer legzersis nou ti vwar poudir i anna en kantite, ti annan en gran nonm stok ki ti dan laboutik ouswa ti dan *storage* me selman ki pa ti pe ganny vann.

Alor, in annan en kantite kontak, en kantite veritikasyon ki'n bezwen ganny fer. Nou'n bezwen refer re travay pou refer sistenm levanter e ou kapab konstate ki letan ou anann ou- lo sistenm ti annan en pe plis ki en santenn *suppliers* e parfwa i annan *suppliers* ki zot prodwi bann menm kalite prodwi. E alor i pran en pe letan pou kapab idantifye lekel *supplier* ki sa i ale avek zot bann prodwi.

Me toudmenm travay i kontinyen i en travay kontinyel, nou pe gany sipor avek osi Minister Finans pou ed nou met an plas en pe prosedir par egzanp letan prodwi i ganny delivre, ki bann dokimantasyon ki bezwen ganny donnen, ki prosedir ki *staff* i swiv pou resevwar prodwi enspeksyon ki ganny fer an relasyon avek bann prodwi ki ganny donnen.

Ensi byen ki relasyon ki *ESA* pe sey *build* osi avek artizan e sa i en keksoz ki mon

pou vremen siport zot lo la, se vwar ki mannyer bann artizan zot kapab osi diversifye bann prodwi ki zot anmenn kot laboutik. Koumsa i pou napa sa difikilte pou *ESA* kapab swazir lekel *supplier* ki pou pran.

Si nou tou nou fer en keksoz en pe diferan, alor i vin pli fasil pou nou kapab pran plis prodwi, plis prodwi avek bann artizan e ki dan laboutik i ava annan en gran varyere prodwi me tou bann artizan i ava kapab ganny en benefis lo la.

Travay avek *NAC*, byensir parey ou'n kapab konstate *ESA* lo son manda i larz, alor i pa kouver artizan, i i en kekszoz ki *SENPA* oparavan ti an bokou i ti met bokou latansyon lo artizan me avek formasyon *ESA*, *ESA* son manda i larz e alor i kouver en kantite biznes.

E pou *NAC*, *creative Seychelles* an partikilye, zot manda pou zot regard Sekter Kreariv. E mon konnen poudir *ESA* i anann serten relasyon ki i fer avek *Printing Seychelles* petet *CEO* i kapab elabor en pti git lo la.

An relasyon avek bann mezir mon'n pas en pe lo bann mezir ki nou pou al entrodwir be sa i pou aplik pou tou lede laboutik Artisans des Iles e osi pour nou laboutik dan *Departure Lounge*.

Nou anvi ki prosedir pou nou pran *items* avek artizan i vin pli fasil, e ki a tou moman osi artizan i konnen ki bann *items* ki in depoze ki son balans, kwa ki in vann, kwa ki i pa'n vann.

Akoz la pour le moman nou ankor, i pa ankor tro kler, so nou bezwen travay lo en sistenm ki tou lede kote i konn egzakteman ki kote zot pozisyon i ete. Mersi.

MR DEPUTY SPEAKER

Mersi Minis. *Commission*?

MINISTER DEVIKA VIDOT

Mersi Mr Speaker. Wi, *ESA* i pran, i mete en pti komisyon lo sa bann *items* alor bann artizan i ganny peye lo pri ki zot, zot demande apre pou vann dan laboutik li menm *ESA* i met en *commission* lo la. Mersi.

MR DEPUTY SPEAKER

Mersi. Onorab Loizeau.

HON NORBERT LOIZEAU

Mersi Mr Speaker. Bonzour Minis ek ou delegasyon. Minis, mon kontan sa keston in vini aköz mwan dan mon distrik mon annan en *senior citizen* en msye *Valentines Day* in ganny li 92.

E li i en dimoun ki dan son pastan i fer sa bann lobze artizanal parey bann travay kafoul e menm fer bann pti

maket bato ki ou met dan bann let, dan bann boutey...

MR DEPUTY SPEAKER

I met sa bann zafer *airport*?

HON NORBERT LOIZEAU

Wi.

MR DEPUTY SPEAKER

Wi, i mete li en? Nou pe koz lo *airport* nou en?

HON NORBERT LOIZEAU

Wi-wi, lo *airport*, zis mon pe sey eksplik li en pti pe son konsern. Sa msye ti pe met *airport* li osi, en pe letan in ganny demande pou li- pa anmenn- pa vin met ankor.

Nou konnen atraver sa restriktikasyon ki pe ganny fer si ti annan en pti pe dezord kot nou konnen nou menm nou konnen ti annan bokou bann dimoun ki ti pe mete zot ti pe fer bann biznes enformel, zot pa ti pey *tax*, zot ti napa en *license* parey ton Ari sa imsye ki mon pe koz lo la.

Me selamn dan son pastan konman en dimoun aze i la kot lakour nou ankouraze sa nou, be li ki zot pe mazin fer pou sa bann dimoun parey Ton Ari dan mon distrik?

Ki li i pa konnen sa bann zafer *paperwork*, al rod en *license* pou al fer sa bann zafer koman en dimoun aze ki nou pe ankouraz zot pou viv ere, e

la i pa pe fer naryen akòz tou donn bann louvraz i kot li, i pa trouv li annan sans pou li fer akòz i napa en landrwa pou mete i napa.

Ki *ESA* pe fer pou zwenn sa bann dimoun pou ed zot petet kapab konnen ki *the way forward* avek zot bann prodwi pou ed zot viv ere koman en dimoun aze? Mersi.

MR DEPUTY SPEAKER

Panel.

MINISTER DEVIKA VIDOT

Mersi Mr Speaker. Mr Speaker, mon pe panse si Mr Ari ti abitye *supply* i vedir ki i annan ek rezistrasyon dan sistenm. Petet in bezwen *update* son bann rikord e si nou ava kapab pran kontak avek li pou nou vwar in byen.

Me selman letan tou bann keksoz i vin annord, letan *ESA* i kapab *go back*, i retourn lo prosedir pou zot kapab met komann par egzantp zot ava fer le nesese e sa imsyè i ava kapab kontinyen donn son bann prodwi.

I osi enportan note ki avek bann proze ki nou pe devlope ki Minister atraver *ESA*, par egzantp proze Beau Vallon i en landrwa kot i pou annan en kantite bann kiosk ki vann bann prodwi artizanal pe al ouver e la bann artizan i ava ganny plis *outlet* pou zot

kapab met zot bann prodwi pou vann. Mersi.

MR DEPUTY SPEAKER

Mersi Minister. Onorab Arissol.

HON SANDY ARISSOL

Mr Speaker, dan lespri pou sipòrt tou bann artizan ki met zot prodwi lo *airport* dan laboutik Artisanal des Iles. Mon ti a kontan demann Minis si i annan en rotasyon parmi bann artizan ki met zot prodwi laba lo *airport* oubyen i menm dimoun ki met son prodwi e prodwi i reste la i pa pe ganny vann?

Eski nou annan en rotasyon dan bann artizan ki ganny posibilite pou zot met zot prodwi dan laboutik *Artisans des Iles*, swa Codevar, swa lo *airport*?

Dezyenmman mon ti a kontan demann avek ou, eski bann artizan i ganny peye letan zot prodwi i vann oubyen letan i anmenn son prodwi i met dan *store* detrwa zour *still* i ganny peye menm son prodwi pa'n ganny vann? Ki mannyer i marse sa? Mersi bokou.

MR DEPUTY SPEAKER

Mersi Onorab. *Panel.*

MINISTER DEVIKA VIDOT

Mersi Mr Speaker. Annefe Onorab sa 2 kestyon ki ou'n poze i al direk lo sa bann

defayans ki nou pe sey adrese. Eski i annan rotasyon ? Nou'n vwar ki ti pe napa rotasyon e alors se pour sa rezon la kot nou pe refer sistenm pou regarde.

Relasyon avek kan ki zot ti pe ganny peye, tousala i bann keksoz ki nou pe ti pe kapab *capture* li byen e se pour sa rezon ki nouvo sistenm pe ganny fer pour ki sa bann defayans ava kapab ganny adrese. Mersi.

MR DEPUTY SPEAKER

Mersi *Minister*. Onorab Aglae.

HON EGBERT AGLAE

Mersi Mr Speaker. Mon ava dir mersi Minis ek ou *panel*. Minis, letan mon'n ekout ou larepons lo premye kestyon Onorab in demande, mon annan 2 kestyon mon anvi eklersi.

Vi ki ou'n dir poudir ou pe fer en leveranter avek stok ki ou annan, e nou ti tann dir ki tou sa bann materyo ti pe ganny tire dan *airport* ti pe ganny transporte. So eski sa ti ganny fer avan leveranter? Akoz si ou pe tir en keksoz i riske dan transportasyon ariv bann *misplace* tonbe, kase. Eski ou ti fer sa leveranter avan ouswa la ki prezan zot pe al fer leveranter?

Dezyenmman, eski bann artizan ki met zot bann prodwi dan sa landrwa, eski zot tou

zot in ganny enformen ki i annan sa legzersis e ki zot osi zot bezwen prodwi serten dokiman, akoz zot bezwen konnen ki kantite keksoz ki mwan mon'n donn ou pou ou met dan ou laboutik pou vann.

Eski sa *due diligence* in ganny fer pou anpese ki demen i annan bann ki vin *claim* poudir mon ti donn tan, mon pa pe ganny tan tousala? Mersi.

MR DEPUTY SPEAKER

Mersi Onorab. *Panel*?

CEO ESA LISA LAUTOY

Bonzour Mr Speaker. Tou Manm Onorab. Onorab, mersi pou ou kestyon. Annefe depi lannen pase nou ti fer- *ESA* ti fer en *meeting* avek tou bann artizan ki met prodwi laboutik Camion Hall osi byen ki sa enn dan *Departure Lounge* kot *airport*.

E nou ti enform zot lo sa legzersis ki nou ti pou antreprann e ki lafason ki prodwi ti pou ganny pran e nou ti enform zot osi poudir pou annan refikasyon dan lafason ki prodwi pe ganny pran.

Pou sa legzersis *inventory* espesyalman pou *Airport inventory* ti ganny fer avan ki nou ti tir bann prodwi *airport* spesifikman pou *avoid* sa sityasyon kot par egzanp ou'n dir avan prodwi i ganny

andomaze ki apre demen swa *ESA* oubyen sa artizan li i vini i vin *claim* poudir son prodwi in ganny andomaze.

Sa legzersis ki nou ti fer se ki *staff* ti mont *airport*, nou ti pran apepre 2 zour pou nou pran stok tou bann prodwi ki ti annan dan laboutik, nou ti fer sir poudir prodwi ti ganny anmase byen, nou ti transport li anba kot nou *Head Office*, akòz nou ti pe profit sa lokasyon osi pou nou fer *general cleaning* dan sa laboutik kot *airport*.

E osi enstal nouvo sietenm sekirite nouvo sistenm *camera* ki pa ti pe marse pandan tou sa bann letan. So nou ti pe fer ankor en pti pe sa travay osi sa louvraz sekirite e apre ki nou'n fini fer sa prodwi in ganny remete an mezir prodwi pe ganny remete dan laboutik.

MR DEPUTY SPEAKER

Mersi Manmzel... Non, akòz letan dernyen keston koz sa *heading* Dirizan Lopoziyon. Non, lala Lasanble i sipoze pe *adjourn* pou al dan *break* so i 10 er 29, mon donn dernyen laparol Dirizan Lopoziyon, mersi. Nou pe zis *manage* letan pa pe anpes zot koze zis *manage* letan.

HON SEBASTIEN PILLAY

Thank you. Mwan mon oule zis demande, prenon kont ki zot

pe dir zot pe pran- o firamezir ki zot pe met bann prodwir avek, *ok*? Prezan ou annan tou sa bann artizan ki oule ganny sa *outlet Airport, Departure Lounge* pou zot kapab bann zot prodwi akòz *obviously* en dimoun ki pe kit pei pli nostalgiz pou li al aste en souvenir a se moman dan sa landrwa.

Eski zot in mazin apard sa en lokasyon ki zot an dan *airport the Departure Lounge* zot in mazin en lokasyon alternativ osi? *At least* ti kapab annan 2 lo *airport* kot zot ti kapab *provide* son bann artizan en akse pou zot vann zot bann prodwi?

E an relasyon avek sa *restock* ki ou pe fer, kan eski ou pe mazine ki ou pou fini fer sa *restock*, e eski sa bann prodwi pou plizyer artizan oubyen pou zis serten oubyen en artizan? Klarifye sa, mersi.

MR DEPUTY SPEAKER

Mersi. Mon a demann *panel* pou en larepons.

CEO ESA LISA LAUTOY

Mersi Onorab, pou ou keston. Onorab, anefe sa bann *outlet* ki ganny trouve dan *Departure Lounge* i propriyete SCAA e nou, nou bezwen *as much* ki nou ti a kontan annan lokasyon alternativ me i depan lo *availability* lespas kot *airport*.

So, pour le moman i sel laboutik ki nou annan, me selman parey mon'n fer resorti poudir nou pe *restock* laboutik e nou pran kont osi poudir par egzanp, pa mwan Me i annan en levennman enportan ki pe pran pase e definitivman i pou annan bokou viziter.

So, nou aktyelman dan prosedir la pe fer nou lalis rekizisyon avek prodwi ki nou pou pran. E pou fer resorti rekizisyon ki nou pe fer i pou avek lamazorite artizan, aköz i ana artizan menm ki zot la dan nou sistenm i pa neseserman artizan ki nou konsider zot aktiv.

So, i an lenstans ki ou pou kontakte zot, zot pou dir ou pou en rezon ou en lot pou le moman zot pa pe prodwi keksoz. Me selman pou bann ki nou bann *suppliers* aktiv definitivman nou oke travay Lasanble Nasyonal lalis la e boner semenn prosenn zot pou komans ganny kontakte pou zot met pare zot bann stok pou nou kapab met dan laboutik.

MR DEPUTY SPEAKER

Mersi Manmzel Lautoy. Donk, sa in anmenn nou ziska la pou nou pran en *break*, ziska 11er. Mon ava remersi *panel* partikilyerman Mr Ally ki pou fer son depar avek ki nou.

Nou pou rebran 11er pou kontinyasyon *questions for*

oral answers e nou annan ankor 4 kestyon pou Minis Devika Vidot. So nou ava *adjourn* pou rebran 11er.

(BREAK)

MR DEPUTY SPEAKER

Ankor enn fwa bonzour tou dimoun e *welcome back*. Mon vwar i annan 4 zenn dan zot zoli liniform ble kouler lesyel, 5 zot i annan, zot sorti kot *Seychelles National Youth Assembly*. So nou ava dir zot byenveni dan Lasanble Nasyonal avek nou, e mon swete zot kapab swiv byen sesyon.

Nou pou kontinyen avek *Questions for Oral Answers* e se Minis pou Lenvestisman Enterprenarya avek Lendistri Mrs Devika Vidot ki avek nou, e lo *panel* i Mrs Thelma Estico ki Sef Egzekitiv *Industrial Estate Authority* in zwenn li. Apre i osi annan Manmzel Anne Rosette Sef Egzekitiv *Seychelles Investment Board*.

Welcome, nou pou kontinyen avek kestyon e nou'n ariv lo kestyon 54 ki dan non Manm Elekte pou Distrik Port Glaud.

HON EGBERT AGLAE

Mersi Mr Speaker. Mon a dir bonzour *CEO SIB* ek ou zofisye. E osi mon rekonnet sa 4 zenn ek Lasanble lazenes ki-5 zenn ki ladan mon krwar i

annan enn ki sorti Port Glaud, *welcome*. Kestyon i *comme* swivan; -

Eski Minis i kapab dir ek sa Lasanble konbyen lenvestiser *Seychelles Investment Board (SIB)* in resevwar pandan lannen 2024 e dan ki sekter potansyel? Mersi.

MR DEPUTY SPEAKER

Mersi Onorab. Mon a envit *panel* pou larepons.

MINISTER DEVIKA VIDOT

Mersi Mr Speaker. *SIB* in resevwar 132 proze an 2024. Bann proze ki nou'n resevwar i sorti plis dan Sekter Tourizm e ladan apepre 70 pousan i bann aktivite relye avek aktivite *sports* ek lwazir.

Leres sekter kot dimoun in pli montre lentere i dan *wholesale* ek *retail*, servis lasante e *wellness* swivi par bann proze servis profesyonnel prodiksyon lokal ek lezot ankor. Mersi.

MR DEPUTY SPEAKER

Mersi *Minister*. Onorab siplemanter?

HON EGBERT AGLAE

Minis, mersi pou ou larepons. Minis, dan sa 132 ki ou'n nonmen konbyen ladan ki i dan *process* apre ki zot in ganny aprouve, konbyen ladan ki *is in the process*?

Dezyenmman, eski i annan ki zot pa'n aprouve? *Ok*, an term kou bann lenvestisman ki'n ganny prezante aköz letan bann envestiser i vin devan pou prezant zot *business plan* byensir i annan sa konponan finansyel, eski ou annan en nide apepre konbyen ou pe koze an term reveni lenvestisman, sa lenvestisman ki pou ganny mete ladan? Mersi.

MR DEPUTY SPEAKER

Mersi Onorab. *panel*.

MINISTER DEVIKA VIDOT

Mersi Mr Speaker. Onorab dan sa 132 i annan 106 ki'n fini fer, fini aprouve e ladan i annan 10 ki i pa'n ganny laprouvasyon, an relasyon avek la kantite valer bann proze pou 2024.

Pour bann ki'n konplete i annan en valer R226 milyon e bann ki pa'n pas- ki pa'n ganny laprouvasyon ti anann en valer epepre R1.1milyon. Mersi.

MR DEPUTY SPEAKER

Mersi *Minister*. Ou annan kestyon?

MINISTER DEVIKA VIDOT

Eskize Mr Speaker, \$1.

HON EGBERT AGLAE

Mersi Minis, pou ou klarifikasyon larepons. Minis, baze lo sa bann *approval* ki ou'n donnen i annan serten konsern devan la ki'n ganny mete ki konmkwa ki parfwa letan bann investiser i vin prezant zot bann proze avek *SIB ok*, e ki i aprouve, enn bann faktor petet vi ki dan lepase zot ti pe met lanfaz lo sa *one-stop shop*, eski zot pe akonpany sa bann investiser ki ler in vin devan zot ki'n aprouve pou osi pas- aköz i osi annan bann prosedir avek bann lezot lazans ki konsernen kot parfwa zot ganny serten difikilte parey *Planning, Lands*.

Eski zot osi zot akonpany sa bann investiser ziska ler zot bann formalite konplet pou realiz rev zot proze i komanse? Mersi.

MR DEPUTY SPEAKER

Mersi Onorab. *Panel?*

CEO SIB ANNE ROSETTE

Bonzour tou Manm a lekout. Mersi Mr Deputy Speaker. Mersi Onorab, pou ou kestyon.

SIB i fer en louvraz fasilitasyon epi *advisory* apard ki nou fer promosyon parey i ete dan nou manda. So, ler bann investiser i pas kot *SIB* zot proze i ganny *scope*, avek bann etablisman Gouvernman

konsernen, regilater, bann antite *licensing* ek permisyon.

E apre ki zot in ganny en *feedback letter from us*, swivi i kontinyen, e i annan bann investiser ki kontinyelman reste an kontak ek nou. Me i annan nou bezwen deryer zot kontinyelman pou fer sa swivi. Ou bezwen toultan pe kontakte zot pou demann zot lenformasyon ki mannyer zot lenplimantasyon pe ale.

Dan nou let nou fer resorti toultan ki ti a bon ki zot enplimant sa proze pandan en dele letan 12 mwan. Aköz ou konnen i anann ennler bann keksoz i kapab sanze; Polisi i kapab sanze bann keksoz i kapab sanze e si zot tarde, i riske refer zot vin dan en sityasyon kot zot pou bezwen reganny- re rod kekfw bann *feedback*, bann antite.

So, nou ankouraz zot pou enplimant zot proze belev letan. Nou'n remarke ki pandan letan *COVID*, *obviously* nou pe koz 4an pase, me selman ti annan bokou proze pandan avan *COVID* ki'n pran letan pou zot kapab re vin enplimante apre, aköz zot in *obviously* pas dan en pe difikilte finansyer e lezot dele. So, zot in pran letan pou zot enplimante apre sa peryod letan. Mersi.

MR DEPUTY SPEAKER

Mersi Manmzel Rosette. Dirizan Lopozisyon i annan kestyon siplemanter lo la?

HON SEBASTIEN PILLAY

Mersi Mr Speaker. Ler nou pran sa bann proze ki Minis in mansyonnen ki'n ganny aprouve par- kot ki'n pas atraver *SIB*, e vi ki sa bann proze i konekte avek *foreign direct investment*.

Eski Minis i kapab dir nou konbyen parmi sa bann proze ki in nonm nou i *non-tourism related* e konbyen ki *tourism related* e ki nou pe fer pour ki *in terms of* proze e son koneksyon avek *FDI*, nou atrakte, nou pe sey atrakte lenvestiser dan lezot sektè apard ki *tourism* ki a fer ki nou kapab ganny en pe plis nou kapab diversifye en pti pe plis keksoz?

Aprè ler nou regard bann *data set* an sa ki konsèrn *FDI* bann proze, nou vwar poudir ti annan sa proze fotovoltai ki ti reprezant \$181 milyon ki sipoze ganny fer ek Mazda ki si mon pran ou *figure* 200 ekek milyon *then* pa reste bokou ler nou tir zis sa gro proze fotovoltai.

So, eski ou annan en *breakdown* lekel bann pli gro konponan dan sa 200 ekek milyon ki ou'n nonmen ki zot reprezante, dan ki sektè zot ladan? Mersi Mr Speaker.

MR DEPUTY SPEAKER

Mersi Onorab. *Panel*, kestyon?

MINISTER DEVIKA VIDOT

Mersi Mr Speaker. Onorab, parey mon'n fer mansyon dan sa bann lalis proze, laplipar ki nou'n resevwar lentere ladan i sorti dan Sektè Tourizm.

Me dan 47 i anann 70 pousan ki relye avek bann aktivite ki pa akomodasyon. Savedir bann aktivite kot i tonm dan- i ganny klasifye dan Sektè Tourizm, me an relasyon avek servis lwazir ouswa bann aktivite kot i pe anmenn sa diversifikasyon dan sa Sektè Tourizm li menm.

An relasyon avek bann lezot sektè, nou'n vwar letan nou'n fer nou analiz nou'n vwar poudir i annan lentere ki pe ogmante, i annan lentere ki pe ogmante pour bann dimoun fer bann proze dan bann lezot sektè apard tourizm. Sa i montre ki lapel ki Departman Tourizm pe fer, ki lapel ki *SIB* pe fer pour bann dimoun revwar ki bann landrwa ki zot kapab envestir ladan i pe marse.

I annan par egzanp ou'n fer referans avek proze fotovoltai, i annan serten sektè parkont ki malgre ki kou lenvestisman i pour vremen signifikan, me Departman *Climate Change*, Departman Sanzman Klima i

ankor pe travay lo bann proze spesifik kot la zot kapab pas sa bann proze avek *SIB* kot *SIB*, i kapab target bann lenvestiser ki kapab ganny rode pou al dan sa bann proze.

E ki *SIB* pe fer? Ki Minister pe fer? An partenarya avek nou bann partner aletranze i anann serten *training* lo kote *build* konpetans, kapasite *SIB* pour nou kapab analiz bann proze, ki pe antre pou nou kapab idantifye bann investiser ki annan labitid investir dan bann tel proze parey.

Alor, i annan en travay ki bezwen ganny fer osi par egzanp an relasyon avek Labank, kot nou pe osi vwar ki i annan serten konpetans ki nou bezwen partaz avek Labank pou ed zot bann zofisye osi kapab ganny en konpran e evalye bann proze.

Partikilyerman si mon pou pran sekter lenerzi renouvlab pou zot kaapb asess en proze pou vwar si sa proze i vyab wi ouswa non. So, sa i en pti pe Mr Speaker. Mersi.

MR DEPUTY SPEAKER

Mersi *Minister*. Onorab Arissol?

HON SANDY ARISSOL

Mr Speaker, be mon ti a kontan lo en laliny ki Onorab Pillay in demann son kestyon

e larepons ki Minis in donn nou, kekfw mon ti a kontan demann en kestyon an relasyon avek la kantite investiser.

Ler nou pe koz investiser, eski i pa neseserman dan laspe touris, eski nou'n annan en logmantasyon dan lentere bann investiser ziska la? Oubyen nou napa lentere lenvestiser an relasyon avek bann proze?

Dezyenmman mon ti a kontan demann ou, poursantaz, ant Seselwa avek *expatriate* ki vin devan pou montre *-(sorry)-* bann lentere an sa ki konsertn *SIB* lo bann proze Sesel? Eski ou kapab donn nou en sif?

E mon'n bliye Mr Speaker, zis pou mon dir bonzour Stanio Arissol avek son bann koleg ki dan Galeri ki pe swiv nou. Mersi bokou.

MR DEPUTY SPEAKER

Anr, ou garson sa? Li ki Speaker? Mon pa ti konnen i la, *welcome* Stanio, Onorab, zenn Onorab Stanio. *Minister*, kestyon.

CEO SIB ANNE ROSETTE

Ok, ler nou pe koz lo bann diferans proze par etranze, proze par Seselwa 2024 ti annan 41 pousan pou Seselwa e 41 pousan pou etranze e 18 pousan

partenarya Seselwa avek etranze.

E si nou pou dir ki nasyonalite dan bann etranze, nou kapab dir poudir pli gro nasyonalite ti Angle epi Seselwa ti en valer \$20.6 milyon dan sa kategori.

MR DEPUTY SPEAKER

Mersi Manmzel Rosette. Dernyen entervenan lo sa kestyon Onorab Gill.

HON CHURCHILL GILL

Mersi Mr Speaker. Bonzour delegasyon ki fek *join* nou. Mon kestyon. Sa bann diferan proze ki'n ganny mansyonnen dan sa valer R226 milyon, eski zot bann lokasyon kot sa bann proze pou ganny fer i santre lo Mahe oubyen i eparpiye lo plizyer zil dan Sesel?

E mon dezyenm kestyon, zot in fer mansyon lo *wholesale*, eski i annan sa bann lenvestiser ki pe deside antre dan *wholesale*, i annan nouvo prodwir ki zot pe vin entrodwir Sesel, oubyen zot zis vin antre dan sa sekter me selman pou fer menm- pou vann menm prodwi ki ozordi pe ganny vann? Mersi.

MR DEPUTY SPEAKER

Mersi Onorab. *Panel*.

MINISTER DEVIKA VIDOT

Mersi Mr Speaker. Mr Speaker, avan mon abord

kestyon Onorab mon a zis petet klarifye ankor en pti git lo kestyon ki Onorab Arissol in poze an relasyon avek *trends* pou etal sityasyon en pe plis.

Wi, nou pe remark en *trend* kot i annan plis lentere dan lenvestisman, la kantite proze ki pe ganny soumet i kontinyelman ogmante e osi byen ki *foreign direct investment* ki pe antre dan pei, sa osi i kontinyelman ogmante.

Kot i ankourazan osi, se ki partenarya ant Seselwa avek etranze sa osi nou pe remark en *pattern* pozitiv, alor sa i vremen ankourazan. An relasyon avek kestyon ki Onorab Gill in demande mon ava pas laparol avek CEO Anne i ava donn klarifikasyon. Mersi.

CEO SIB ANNE ROSETTE

Mersi Minis. Mersi Deputy Speaker. Lo kote *wholesale*, i en sekter ki *open*, *whereas retail* i pa *open*. Savedir dapre nou lagreman WTO, en etranze i kapab antre dan Sekter *Wholesale*, be selman dan Sekter *Retail* i en aktivite ki ganny nou apel li en *economic needs test*.

So, i ganny soumet a en prosedir pou evalye si sa aktivite i nesese pour nou lekonomi e i pou enpakte sa proze ki pe ganny prezante i anmenn en keksoz diferan pou

nou pei. So nou pa kapab anpes dir en dimoun pa envestir dan Sekter *Wholesale*.

Me selman nou bezwen swiv li pou vwar ki sa proze i fer sans e i donn zot bann *advisory service* lo la, *whereas* pou *retail* i pas parey mon pe dir dan sa- e sa komite i evalye si sa proze i merite.

Laplipar dimoun ki antre dan sa sekter i Seselwa, e nou war en kantite osi bann *change of share shareholdings* ki pase ladan. Lo ou kestyon si proze i zis Mahe oubyen i partou? Proze i en pti pe partou kot i annan lespas, sa i en kriter enportan.

Dimoun i gete kote ki i annan lespas e loportinite pou kre sa proze, e Onorab mon aport ou latansyon bomatenyer e mon krwar nou ti lans nou *investor map* pou *district*, so, dimoun i kapab al *click* lo sa distrik ki i war si ki bann keksoz ki annan ladan, ki bann lentere proze.

E byento nou pou kapab met plis lenformasyon lo sa bann lenflasyon ki deza en *toll* lo nou *website* ki zot kapab idantifye ki bor bann aktivite ekonomi pe *happen* dan pei. Mersi.

MR DEPUTY SPEAKER

Mersi Manmzel Rosette. Sa in anmenn nou lafen sa enn kestyon. Donk, nou pou bouz lo kestyon limero 55 ki dan

non Manm Elekte pou distrik Grand Anse Praslin.

HON WAVEL WOODCOCK

Mersi Mr Speaker. Bonzour Minis, ou delegasyon, tou Manm e tou dimoun a lekout espesyalman zabitan Grand Anse Praslin. Speaker mon kestyon i *comme* swivan; -

Eski Minis i kapab enform sa Lasanble kan ki Proze Sant Mikro-Antrepriz pou konmanse e sipoze konplete kot vye Warehouse STC? Mersi.

MR DEPUTY SPEAKER

Mersi Onorab. Panel, larepons?

MINISTER DEVIKA VIDOT

Mersi Mr Speaker. Onorab, permet mwan pou felisit ou lafason ki ou lentere lo sa proze i enn ki kontinyelman montre nou ou langazman ki ou annan anver ou distrik.

E mon annan plezir pou enformen ki *tender* pou Proze Mikro-Antrepriz lo Praslin i an progre byen avanse, e prosedir i sipoze konplete ver lafen Avril, kontrakter i ekspekte *on site* milye mwan Me, e proze i ekspekte annan en dirasyon 8 mwan, i vedir ki nou pe regard meton par premye kar lannen 2026 ki proze in kapab konplete. Mersi.

MR DEPUTY SPEAKER

Mersi *Minister*. Sa *warehouse* la i Grand Anse Praslin sa?

HON WAVEL WOODCOCK

Yes.

MR DEPUTY SPEAKER

Savedir i tre spesifik lo Grand Anse Praslin? *Ok, very well*, kontinyen.

HON WAVEL WOODCOCK

Wi, o bor Lekol Grand Anse Praslin Primer. Annefe Minis, mersi bokou pou ou sipor pou sa proze. Savedir ou pe dir nou, ou pe donn nou en langazman ki sa proze *by mid-May* pe komanse?

E *tender process* in fini komanse si mon pe konpran byen, e kan ki *tender* i fermen? E kan ki zot pe espekte ki zot pou fini avek tou bann prosedir *tender* pou sa proze? Mersi.

MR DEPUTY SPEAKER

Mersi Onorab. *Panel*.

MINISTER DEVIKA VIDOT

Mersi Mr Speaker. Onorab, lendikasyon ki nou'n resevwar avek *SLA* se ki par lafen Avril prosedir *tender* pou'n fini konplete Parske in fini komanse. Mersi.

MR DEPUTY SPEAKER

Mersi. Onorab Porice, ou annan siplemanter lo la?

HON DOYACE PORICE

Mersi Mr Speaker. Bonzour zot tou. Minis, konbyen lespas ou annan dan sa mikro-antrepriz? E si zabitan Baie Ste Anne pou benefisye ladan? Mersi.

MR DEPUTY SPEAKER

Mersi. *Panel*.

MINISTER DEVIKA VIDOT

Mersi Mr Speaker. I pou annan anviron 5 lespas pou bann prodiksyon *light manufacturing* swa *food processing*.

I pou annan anviron en 3 latelye pou bann latelye koud, artizanal osi i pou annan anviron 2 pou pent en skilptir ankor apepre 2 e i pou annan lespas pou *workshop* ki pe fer bann reparasyon en pe leze. Nou'n met apepre 2 lespas, e byensir prenon kont bann demann nou ava kapab regarde ki mannyer nou pou zwe avek bann alokasyon.

An prensip, sa proze i, malgre i dan Distrik Grand Anse Praslin, me i pou osi deservi tou dimoun lo Praslin. Lalis ki *EIA* i *compile* i pa ganny kase ant aplikan Grand Anse Praslin e aplikan Baie Ste Anne i en sel lalis. Alor letan zot fer zot laplikasyon baze lo merit bann zabitan ava kapab sorti dan tou lede distrik ava kapab ganny sans pour partisipe. Mersi.

MR DEPUTY SPEAKER

Mersi *Minister*. Dirizan Lopoziyon ou annan siplemanter lo la?

HON SEBASTIEN PILLAY

Mersi bokou. Bonzour tou bann zenn Onorab ki la, felisitasyon zot tou.

Mon ti a kontan demann Minis, Minis prosedir *tender* pou sa proze i sipoze fermen dan 12 zour, e dapre bann kondisyon sa proze i sipoze ariv *around-* kontrakter i sipoze kapab fer en proze *around* R5 milyon. Mon pa pe devwal naryen ki pa *public information*.

Kestyon ki mon annan pou ou, prenon kont tou sa ki ou'n nonmen *right now, in term* lo sa proze, ki garanti ki ou pe donn nou, aköz i deza ana en sityasyon similer ki ti arive *regarding* en larzan ki ti'n bidzete pou enn sa proze *and then* nou ti ganny serten difikilte nou dir vin devan Lasanble pou reponn kestyon.

Ki garanti oubyen lasirans ki ou pe donn Lasanble Nasyonal ki an sa ki konsern sa enn proze ki pou materyalize *within the scope* ki zot in *tender* li? E eski lenformasyon ki *SIA* in donn li i pe fer *allowance* pou bann ganny sa bann *dispute*, oubyen bann lezot keksoz ki arive avek bann *tender* ki ava

fer ki *the time frame within which* ki ou'n fini donn Lasanble en langazman lo la i materyalize oubyen pou nou kapab eksprim serten fleksibilite lo la?

Lefe ki sa proze i *actually* kot *tender board*, and as we speak son running clock i reste 12 zour avan ki i *award* sa kontra. Mersi Mr Speaker.

MR DEPUTY SPEAKER

Mersi Onorab. *Panel?*

MINISTER DEVIKA VIDOT

Mersi Mr Speaker. Onorab, avan letan nou ganny demande kestyon nou fer sir ki ava nou vin Lasanble nou verifiye nou larepons avek sa lazans prensipal, lazans konsernen ki siperviz travay proze kapital gouvènmman, e sa se Lazans *SIA*.

Langazman ki zot in donneren i spesifikman lo parey larepons ki mon'n donneren, alor mon panse ki zot in fer zot bann kalkilasyon nesese e ki zot in pran kont tou bann provizyon nesese pou zot kapab donn nou en *time frame* parey. So, lo nou kote i reste pou nou fer swivi avek zot, pour fer sir poudir zot a pe- lo zot kote zot osi zot pe fer sir poudir *timeframe* pe ganny respekte.

Lesansyel apre tou se fer sir ki sa proze i materyalize, sa pou nou sa i byensir lentere lo

kote- lo nou kote latib isi. Nou planifye proze, me malerezman nou osi bezwen *rely* lo lasistans teknik ki nou, nou napa *in-house* me ki nou annan en lazans ki sa i son domenn i spesifye.

Alor, Mr Speaker, sa i sa granti ki mon'n donn ek Lasanble Nasyonal ki baze lo larepons ki *SIA* in partaz avek nou. *Time frame* ki *SIA* in donn nou se sa *time frame* ki mwan mon pe partaz avek Lasanble Nasyonal. Mersi.

MR DEPUTY SPEAKER

Ou annan klarifikasyon lo la Onorab?

HON SEBASTIEN PILLAY

Mersi pou *provide* mwan, pou pou donn mwan sa loportinite. Rezon mon demann ou sa kestyon Minis, se aköz dan ou larepons mon pa'n tann ou mansyonnen ki pou annan en *site visit* annefe demen, pou sa proze.

E konmsi- mon ti ganny en *meeting* ek Minister Finans e koman *FPAC* enn bann konsern ki nou ti met, ki Minister Finans ti met devan nou se ki *as a client* sa *client agency* li osi i bezwen *follow up*, lo bann keksoz ki *SIA* i dir zot. Se pour sa rezon ki mon ti pe demann li sa kestyon.

So, eski ou *aware* ou ki pou annan en *site visit* demen, Merkrede le 16 Avril an sa ki

konsern sa proze, zot pou zwenn kot Grand Anse Praslin *District Administration Office* 10er edmi bomaten? Mersi Mr Speaker.

MR DEPUTY SPEAKER

Panel.

MINISTER DEVIKA VIDOT

Mersi Mr Speaker. Onorab, wi, nou okouran e nou pou annan en zofisye nou osi ki pou *on site* letan sa vizit pe ganny fer.

Annefe nou pran li o serye e avek tim sa i en keksoz ki nou'n enkilke dan fason travay. Koman sa lazans ki Bidze i tonm kot nou, nou ki *custodian* sa Bidze, nou pa pran li koman en proze ki *SIA* - ki sa proze i anba responsabilite *SIA*. Sa proze i anba nou responsabilite me nou bezwen servi resours teknik ki *SIA* i annan ki nou, nou napa.

Nou fer swivi avek *SIA* vreman regilyerman, nou annan en *projects meeting* ki nou *schedule* ki nou esey nou mye pou fer li omwen 2 semenn, tou le 2 semenn, e i annan osi en zofisye spesifik *SIA* ki *management* in akord nou lazans pou fer sir ki a tou moman *IEA* i annan kontak avek sa zofisye.

E nou pe al en pe plis lo la osi pou fer sir poudir lenplimantasyon pe ganny fer lo kote *IEA* lo son striktir, nou

pe fer sir poudir tou nou bann departman konsernen i osi *build* konpetans pou zot osi kapab fer bann swivi en pe pli pre, nou koman kliyan e ki nou a kapab met, alert *SIA* si i annan okenn keksoz ki nou santi i pa pe mars dan nou faver.

E la nou annan en fason i annan en mekanizm ki nou'n met an plas pou nou kapab koresponn avek zot en pe pli vit. Mersi.

MR DEPUTY SPEAKER

Mersi *Minister*. Dernyen entervenans lo sa *heading*, ou pou travay enpe ozordi, pa akòz ou garson i la? Onorab Arissol.

HON SANDY ARISSOL

Bel Ombre toultan nou travay Mr Speaker. Mon anvi demann Minis lo son larepons ki inonnen an relasyon avek bann antreprenè, letan ou'n kategoriz zot, lekel dimoun ki ou krwar pou kapab *occupied* sa sit mikro-antrepriz.

Mon ti a kontan demann ou be letan nou pe koze la, letan sa bann dimoun Grand Anse Praslin avek Baie Sainte Anne zisteman, zot pe atann sa sant pare, ki bann lokasyon ki zot ladan? Ki bann lasistans ki zot pe gannnen touzour sipor avek ou Minister zisteman pou zot kontiny sa travay ki zot pe fer ziska ki zot

sant i pare Minis? Mersi Mr Speaker.

MR DEPUTY SPEAKER

Mersi Onorab. *Panel?*

MINISTER DEVIKA VIDOT

Mersi Mr Speaker. Onorab, enn bann rezon par deryer akòz ki nou'n santi nou bezwen met en sant parey lo Praslin, ti vin swivi en vizit ki nou ti fer avek Onorab Woodcock kot i ti anmenn mon vizit enn de bann antrepriz kot zot pe fer bann aktivite kot zot.

E dan bokou lenstans zot ganny difikilte parfwa avek bann lazans tel parey lanvironnman ouswa Lotorite Lasante Piblik kot i annan serten legzizans ki ganny met devan zot e kot zot lakaz zot pa pe kapab fer li.

E se prenon kont tou sa bann demann, tou sa bann sityasyon ansanm avek konsiltasyon avek Lotorite Distrik se la ki nou'n konsevwar plan pou kapab zisteman soulaz en pe sa bann sityasyon. Mersi.

MR DEPUTY SPEAKER

Mersi *Minister*. In ler aprezan pou nou al lo lot kestyon, kestyon limero 56 ki dan non Manm Elekte pou Distrik Grand Anse Praslin ankor enn fwa.

HON WAVEL WOODCOCK

Mersi Mr Speaker. Mon lot kestyon i *comme* swivan; -

Eski Minis i kapab enform sa Lasanble kan ki nouvo alokasyon later pou ganny fer Ile Eve sa lannen? Mersi.

MR DEPUTY SPEAKER

Mersi Onorab. *Panel*, larepons.

MINISTER DEVIKA VIDOT

Mersi Mr Speaker. Onorab, *IEA* ti'n planifye komans alokasyon depi tar lannen pase, me in ganny retar pou fer *tender* akòz taso lo sa bann bout later ti'n ganny- ti'n sorti pandan konstriksyon Proze Lenfrastriktir lo Ile Eve.

E parey ou okouran avek okenn alokasyon nou bezwen fer sir poudir taso i annord, e an se moman taso pe ganny re mete lo sa 26 bout later ki nou ti'n idantifye. Lavertisman pou *tender* i pou ganny fer an Me e swivan bann prosedir entern alokasyon later i posibilite i la pou li ganny fer an Out 2025. Mersi.

MR DEPUTY SPEAKER

Mersi *Minister*. Onorab, ou annan siplemanter?

HON WAVEL WOODCOCK

Minis, ti annan en pe konsern lo Ile Eve regardan enn de bann fasilite ki kot zot ti'n

ganny mete ti pe met en pe retar avek alokasyon later parey bann *pipes*, kab elektrik, tousala. E nou ti osi annan *issue* avek enn de bann mankman, bann fasilite semen enn de semen lo Ile Eve.

Eski zot in nobou *sort out* sa bann *issues* pou fer ki sa bann later prezan in ganny debloke pou ganny *allocated* avek bann biznessmenn lo Praslin? Mersi.

MR DEPUTY SPEAKER

Mersi Onorab. *Minister*?

MINISTER DEVIKA VIDOT

Mersi Mr Speaker. Onorab, wi, i ti annan bann *issues* kot parey nou, nou konnen *service design* pour Ile Eve in ganny prepare bokou letan apre ki later in ganny- ki serten *plot* later in ganny *allocate*. E sa i vedir ki i ti napa en plan apropiye lo lafason ki bann tiyo ti'n gany enstale lo zil.

I vedir ki nou'n bezwen refer *survey* pou re kapab demark, fer demarkasyon later e an plis ki sa la prosedir taso. So tousala in azoute pou kre sa retar. An rezilta tou sa bann problem ki nou'n vwar nou'n formil faz 2 proze Ile Eve pou kapab adres bokou sa bann problem.

Faz 1 in fini parey ou kapab okouran e nou annan kestyon ki swiv Mr Speaker,

petet mon a kapab al en pti pe plis an detay letan nou abord sa trwazyenm kestyon. Mersi.

MR DEPUTY SPEAKER

Mersi *Minister*. Onorab Arissol.

HON SANDY ARISSOL

Mr Speaker, mersi. Mon anvi demann avek Minis an vi ki in mansyonn 26 kare later ki pou ganny *allocate*, mon ti a kontan premyerman demann li ki bann grander later nou pe koz lo la an term met kare ki zot pou *allocate* avek bann endividi Pralinwa e Pralinwaz?

Dezyenmman, mon ti a kontan demann avek ou, ki bann lentere biznes ki zot in gannyen pou nou kapab pou sa Ile Eve pou sa proze? Ki bann kalite lentere biznes ki'n annan pou nou annan sa balans dan bann biznes ki Pralinwa ek Pralinwaz pou kontan? Mersi bokou.

MR DEPUTY SPEAKER

Mersi Onorab. *Minister*?

MINISTER DEVIKA VIDOT

Mersi Mr Speaker. Mon pou abord dernyen parti ou kestyon epi mon pou pas laparol avek CEO i ava donn ou en pe lo dimansyon.

Lentere pou later i nou'n vwar li tou dernyen pe ogmant en kantite, letan nou ti fer premye *tender* nou ti met

anviron en senkantenn morso later lo *tender* me selman lanmwatye later ki ti ganny pran, ti montre poudir a sa moman petet dimoun pa ti ankor annan sa lapeti.

Me la nou'n vwar en sanzman konplet e i annan bokou lentere an sa ki konsern *processing*, nou'n ganny demann pou *fish processing*, *manufacturing*. Me par kont, i *still* ankor reste bann demann parey *marine repair*, i reste konstriksyon osi, sa i touzour i reste bann sekter kot nou vwar i kontinyen annan demann.

Mon pas laparol Mr Speaker avek CEO pou donn detay lo dimansyon. Mersi.

CEO IEA THELMA ESTICO

Mersi Mr Speaker. Mersi *Minister*. Mersi Onorab, pou ou kestyon.

In view of the fact parey ki *Minister* pe dir ki sa bann bout later i varye, i annan pou *marine*, i annan pou diferan lezot aktivite e parey i annan pou *seapantye*, i annan pou *building contractors*, i annan pou *food and processing*, i annan pou *mixed use*.

Savedir i diversifye *between* 800 a 900 met kare depandan sa bann aktivite e apre depandan later ki mannyer zot menm zot, zot in ganny tir son bann *plots*. Mersi.

MR DEPUTY SPEAKER

Mersi Mrs Estico. Prosen entervenan Dirizan Lopozisyon.

HON SEBASTIEN PILLAY

Mersi Mr Speaker. Mr Speaker, mon ti a kontan demann Minis, an relasyon ek sa bann alokasyon later ki pe fer lo Ile Eve in deza annan bann prononsman ki'n ganny fer avek an relasyon avek zot ti pe esper bann alokasyon ganny fer lo Ile Eve. Par egzanzp;-

Minister Lagrikiltir ti koz lo en fasilite *chill storage* ki fonksyon avek lenerzi soley, e ki sipoze ganny plase lo Praslin, e sa i sipoze benefisye bann dernyen legim e deza i ti dir i annan \$50 mil ki'n pare pou sa proze. I ti dir nou pe esper konfirmasyon later lo Ile Eve an relasyon avek sa.

Mon ti a kontan demann zot, eski *within*- sa ti ganny dir dan Lasanble Nasyonal le 7 Zilyet 2022 *ok?* So kestyon ki mon annan pou Minis, ler ki Minis pe koz nou lo sa dezyenm faz alokasyon, eski sa proze in fini materyalize dan sa premye faz alokasyon?

Si i Pa ankor materyalize dan sa premye faz alokasyon eski *within* bann later ki zot in *plan* pou *allocate* pou bann diferan aktivite, *given* ki i annan sa demann pou osi

bann lezot Minister, *provide* serten sipor, eski i annan diskisyon ki'n ganny fer avek tou bann lezot koleg?

Pou ou met a zot dispozisyon serten later oubyen serten lespas pou zot osi kapab realiz serten eleman zot bann Polisi ki zot in met an plas. Mersi Mr Speaker.

MR DEPUTY SPEAKER

Mersi. *Panel*, larepons?

MINISTER DEVIKA VIDOT

Mersi Mr Speaker. An relasyon avek demann pou later, lo faz 1 letan nou ti fer alokasyon sa ti prensipalman vize ver sekter prive e byensir pou dezyenm osi dezyenm parti sa i pou leka, nou pe regard bann biznes prive.

I annan bann lezot morso later Ile Eve ki reste *vacant* ki bann Minister atraver zot bann Polisi eksetera ki zot bezwen enplimante zot apros nou e nou fer le nesaser. Departman Transpor par egzanzp i enn kot *Vehicle Testing Station* ki la an se moman mon pe espekte i pe al ganny finalize byento.

Konstriksiyon, nou osi annan par egzanzp *PUC* ki atraver konverssyon avek *IEA* zot in ganny en morso later pou zot kapab fer zot *STP*. E alor Departman Lagrikiltir osi- Departman Lanvironnman i annan serten alokasyon ki zot

in *request* pou fer *recycling*, pou met zot sant distribisyon.

So sa i konversasyon ki kontinyen avek bann departman konsernen. Mersi.

MR DEPUTY SPEAKER

Mersi *Minister*. Ou annan klarifikasyon?

HON SEBASTIEN PILLAY

Mersi Mr Speaker. Mr Speaker, mon pe sey konpran en keksoz, nou ti ganny en lasirans ki pou annan en fasilite *chill storage* ki fonksyonn avek lenerzi soley e pou annan 2 *unit*, e nou espekte ki i ava ganny plase lo Praslin pou benefisye bann fermye legitim e deza \$50 mil in pare pou li, bann parol eksprimen par Minis Flavien Joubert dan sa Lasanble.

Ki mon pe demann Minis, eski dan sa alokasyon ki zot in fer in annan en demann par Minister Lagrikiltir pou zot ganny en bout later pou met sa fasilite sa *chill unit* pou *storage* legitim lo Ile Eve.

Akoz se sa ki i ti dir ek Lasanble oubyen si i annan en lot keksoz ki'n arive si oule klarifye aköz *then* mon Minister in dir nou en lot e ou, ou pe dir nou en lot baze byen sir lo ou bann demann ki'n vin kot ou Minister. Mersi Mr Speaker.

MR DEPUTY SPEAKER

Mersi Onorab. *Panel*.

MINISTER DEVIKA VIDOT

Mersi Mr Speaker. Mr Speaker, zis pou klarifye, mon pa'n dir en lot, sa ki mon'n dir se ki nou touzour an kominikasyon avek Minister, Minister Lagrikiltir i annan en *request* ki i ti'n soumet an relasyon avek later, egzaktaman kwa ki i pou al fer avek sa later lo nou kote nou, nou la pou nou partaz resours.

So, mon krwar sa proze *chiller* i sipoze en zafer *container* ki zis ou plase, so i napa vreman gran keksoz an relasyon avek konstriksyon e napa naryen, ki mon kapab dir ki konplike avek. E alor letan zot ava ganny zot alokasyon zot ava regarde ki mannyer zot pou partaz sa lespas. Mersi bokou.

MR DEPUTY SPEAKER

Mersi *Minister*. Onorab Loizeau?

HON NORBERT LOIZEAU

Mersi Minis. Minis, vi ki- nou konnen oparavan in toultan annan bann lord, toultan mon vin ek sa kestyon aköz mwan mon en dimoun mon krwar dan lord, toultan i annan bann dezord lo bann later endistriyel. E dernyen fwa ler ou ti vini nou ti koz an term plasman bann biznes.

Eski i anann en sistenm segregasyon ki'n ganny fer par ou Minister? Akoz ou ti dir nou pou annan, vi ki i annan tekman diferan kalite biznes ki pou vin dan sa landrwa. Kot enn fwa pour tou, par egzanp mwan ki pe vin rod en servis mon a konnen mon pe vin la, mon pe ganny sa, mon pe vin laba i annan en langar sarpantye tou.

Eksi i annan sa sistenm segregasyon ki'n ganny fer par ou Minister pou fer sir bann bzines i gany plase dan bann landrwa spesifik? Mersi.

MINISTER DEVIKA VIDOT

Mersi Mr Speaker. Onorab, wi, i annan en plan sa voyaz kontrerman avek Providence pou Ile Eve i annan en *land use plan* ki'n ganny desinen, ki'n ganny met ater.

E nou pe servi sa koman en gidans letan nou pe fer nou bann alokasyon, letan nou pe met later lo *tender* e letan nou pe fer nou bann alokasyon. Mersi.

MR DEPUTY SPEAKER

Mersi *Minister*. Dernyen entervenan lo sa *heading*- lo sa kestyon Onorab Porice.

HON DOYACE PORICE

Mersi Mr Speaker. Minis, mon konnen ki in annan 25 bout later ki ganny *allocate* pandan sa 2 an, akoz sa retar pou

allocate sa dezyenm faz? E osi Minis, mon ti a kontan konnen si i annan en prosedir *loan* labank pou sa bann lokater lo Ile Eve? Mersi.

MR DEPUTY SPEAKER

Mersi. *Panel*.

MINISTER DEVIKA VIDOT

Mersi Mr Speaker. Onorab, letan nou ti fer premye faz parey mon'n fer sorti nou ti met 50 bout later lo *tender* me zis anviron 25 ki ti ganny pran. E apre sa parske pou ou pou met later lo *tender* i annan prosedir, i annan kou ki atase avek.

E swivan sa, *IEA* in bouz lo lezot priyorite, e alor pou apepre 1an koumsa sa i pa nou priyorite an vi ki nou ti vwar poudir dan 50 i annan zis demann pou lanmwatye.

E se apre sa ki depi lannen pase la nou pe sey travay aktivman pou nou kapab fer dezyenm faz alokasyon e pou bann rezon ki mon'n presize o komansman an relasyon avek servis kot ti napa *design* e ki letan nou pe fer semen par egzanp, nou'n vwar poudir i annan bann tiyo ki pas atraver semen ki vedir ki plan ki nou ti annan pou bann later in bezwen reganny fer, reganny fer *survey*.

E la letan proze in ganny enplimante i annan bann taso ki'n ganny bouze, e la nou'n

bezwen pe fer prosedir pou kapab remet sa bann taso an plas pour ki nou kapab fer alokasyon.

E la sa prosedir in fini ganny fer i vedir ki nou kapab bouz pou nou fer prosedir alokasyon aprezan pou nou fer prosedir *tender*.

An relasyon avek labank, tou bann aplikan zot annan zot labank komersyal ki zot ti angaze avek, akòz letan zot ti'n fer zot in soumet zot laplikasyon i annan serten dokimantasyon ki nou demande an relasyon avek zot abilite pou zot kapab devlop later. E alor zot in soumet, zot annan sa langazman avek zot labank.

Pou bann, dan bann lenstans kot i annan bann dimoun kot zot santi zot annan difikilte pou zot finaliz prosedir avek labank- sa ou kapab touzour bann dimoun i vin devan kot nou touzour espesyalman prenon kont zot okouran sa travay ki Minister pe fer avek bann Labank. So zot servi sa loportinite zot vin devan.

E Minister nou, nou siport zot pou nou kontiny konversasyon avek Labank pou vwar kote pou kapab aziste pou fer sir poudir zot kapab realiz zot proze. Mersi.

MR DEPUTY SPEAKER

Mersi Minister. Nou'n ariv lafen sa enn kestyon. Donk, nou pou bouz lo lot kestyon e dernyen kestyon pou *panel* ki la avek nou, sa i kestyon 57 e i dan non Manm Elekte pou distrik Baie Lazare.

HON FRANCOIS ADELAIDE

Mersi Mr Speaker. Bonzour Minis avek ou delegasyon, bonzour tou *MNA*. Bonzour bann zenn dan Galeri e tou dimoun ki a lekout. Mon kestyon pou Minis i al koumsa; -

Eski Minis i kapab eksplik sa Lasanble lo bann demars ki pe ganny fer pour asiste distrik Baie Lazare avek son premye Sant Mikro-Lantrepriz an 2026? Mersi.

MR DEPUTY SPEAKER

Mersi Onorab. *Panel*, larepons.

MINISTER DEVIKA VIDOT

Mersi Mr Speaker. Mr Speaker, Sant Mikro-Lantrepriz Baie Lazare i dan plan pou 2026. Parey Onorab in fer resorti, nou pe an se moman travay lo *design* pou sa sant swivan konsiltasyon ki *IEA* ansanm avek Lotorite Distrik, ansanm avek ou Biro Onorab in fer, swivan bann *site visits* osi ki mon konpran zot in al lo la.

E, ki mannier keksoz nou pe vwar li, e se ki

demolisyon sa batiman li menm i pe ganny planifye pou fer an Oktob 2025 savedir pli tar sa lannen. E letan nou ava kapab *by then* nou pou'n fini an annou en plan nou pou'n fini annan nou en pli bon nide lo lakantite ki kou egzakteman ki pou al avek sa batiman. Mersi.

MR DEPUTY SPEAKER

Mersi *Minister*. Onorab, ou annan siplemanter?

HON FRANCOIS ADELAIDE

Yes. Mersi Minis pou ou larepons, dabor les mwan felisit ou avek ou *Cabinet* Minis ki zot in kapab mazin Baie Lazare i pou premye fwa apre ki Sesel in vin Larepiblik ki Baie Lazare pou ganny en Sant Mikro-Lantrepriz. E sa mon krwar i en lespwar pou nou bann zabitan.

Petet Minis, mon ti ava demann ou, vi ki son lokasyon i en pe dan vwazinaz kot pou annan en pe lakaz, petet ti annan bann biznes, bann pti biznes ki nou kapab fer.

Be i annan bann ki nou pa pou kapab fer e ki i annan en demann dan distrik Baie Lazare, la parey mon pe koz parey sarpantye, mekanik, *panel beater*. E eski petet nou-mon pa konnen pli tar, aköz parey mon dir ou la sa landrwa nou pou bezwen fer

zis bann biznes ki pa fer bokou tapaz.

E petet eski nou annan en landrwa petet dan Sid ki pa zis Baie Lazare me i ava Takamaka, Anse Royale ki i ava kapab ankadre sa bann sekter koumsa pour ki nou a war plis dimoun pe partisipe pou kapab ganny zot lavi zot osi? Mersi.

MR DEPUTY SPEAKER

Mersi Onorab. *Panel*.

CEO IEA THELMA ESTICO

Mersi Mr Speaker. Mersi Onorab, pou ou kestyon. An se ki konsern Baie Lazare, parey nou ti diskite ansanm an konsiltasyon i pou annan bann *light industrial activities* ki pou ganny fer en pe parey petet koud, petet parey en pe bann dimoun ki petet pe fer konfitir, en pe bann *commercial kitchen* koumsa.

Apre i annan sa *glasswork* ki sa msye li menm li in diskite ek nou personnelman ki'n montre lentere pou fer ki nou konnen sa i en keksoz ki asosye avek Baie Lazare, so nou pou anvi *include* li osi *as part of the activities*.

E i pou en pe sa bann aktivite ki nou pe pans pou fer e apre petet bann *repairs, light repairs* me parey ou'n dir an se ki konsernan lezot aktivite ki

fer en pe plis tapaz, parey sarpantye.

Me pour le moman sel rezyon ki nou pou annan la ki nou pe pans pou annan en MEC Osi i Anse Aux Pins ki nou pti frer, *anyway* nou pe travay lo la tre byento me nou ava vwar en pti pe son bann aktivite ki pou kapab petet ede o nivo rezyonal.

E apre nou pou annan Providence osi ki nou annan sa MEC. So nou ava gete ki mannyer nou pou kapab asiste bann lezot ki sorti en pe dan bann distrik *around* Mahe ki petet dan zot distrik menm pa ankor kapab annan lespas pou fer sa tel aktivite. Mersi.

MR DEPUTY SPEAKER

Mersi Mrs Estico. Mon pou donn laparol Onorab Aglae.

HON EGBERT AGLAE

Mersi Mr Speaker. Minis, an vi ki dan lepase ti annan sa Proze *One District One Project* kot i konsern bann Sant Mikro-Antrepriz.

E ki dan enn ou bann larepons ki mon ti demande sete ki Gouvernman dizour i pa pou al avek sa proze e *rightly said* la ou'n nonmen ki pou annan sa bann sant rezyonal ki pou ganny fer, mon ti a kontan de premyerman demann ou pou rezyon Was ki tonm kot mwan sa i Port

Glaud, Grand Anse, Anse Boileau.

Kan eski nou pou war en proze ganny konsevwar pou kapab komanse? Sa i enn.

E dezyenm, eski parey Baie Lazare- eski i annan bann lezot distrik osi ki pe fer bann soumisyon parey pou zot kapab ganny bann Sant Antrepriz kot i annan teren disponib. Mersi.

MR DEPUTY SPEAKER

Mersi Onorab. *Panel?*

CEO IEA THELMA ESTICO

Mersi Onorab, pou ou kestyon. Annefe Port Glaud osi ti enn parmi bann landrwa ki in annan *estate* ki'n ganny idantifye, me selman parey in eksplike nou'n fer *site visit* ansanm avek bann zofisye SIA e nou'n get en pti pe lanvironnman.

E parey ou konnen poudir mon krwar mon ti eksplike la en fwa dernyen, letan ou get en pti pe sa *area* i annan en pti pe an konsern leta nou'n vizite avek bann lezot lotorite konsernen, me solman nou pi travay etrwat pou nou kapab vwar.

E answit osi letan nou pe get en pti pe bann MEC ki nou pou fer nou bezwen get demann osi ki nou annan. E letan nou get en pti pe demann sa i kapab parey mon pe dir nou pa travay izolasyon, me

nou travay avek Lotorite Distrik pou vwar en pti pe bann bezwen ki zot ana dan ot distrik e la nou kapab travay ansanm selon bann demann.

Akoz si napa travay ansanm pou kon en pti pe bann bezwen ki annan ki zis nou la e nou fer en *MEC* me ler apre nou trouv sa *MEC* i reste vid. Parey la pou le moman nou annan *MEC* Anse Boileau. Nou annan deza bann landrwa kot i annan bann *MEC* nou annan Grand Anse ki li osi i dan plan pou konstriksyon selman li i pou an 2028, nou pe mazin fer li.

E apre nou annan bann redevlopman osi ki nou pe fer lo nou bann *MEC* i pou annan Union Vale, i pou annan Plaisance. E mon krwar poudir tou sa bann *MEC* ki mon deza annan menm Providence osi nou pou re vizite me tou sa bann *MEC* ki nou annan mon krwar nou pou kapab an se moman fer, an global tou bann bezwen ki i kapab annan.

Si ou pou demann mwan pou le moman la, la kantite demann ki nou annan pou *workshop* nou annan en santenn pou le moman. Me letan nou pou annan sa bann *MEC* ki nou pou frer, nou pou annan *PPP as well* ki pe vini, *SOP* li i pou annan enn ki pou Perseverance apre i pou annan enn ki pou Au Cap *as well*.

Mon krwar nou pou kapab kouver en pe bann demann ki nou pou annan *around* Mahe. Mersi.

MR DEPUTY SPEAKER

Mersi Mrs Estico. Dirizan Lopoizasyon ou annan kestasyon.

HON SEBASTIEN PILLAY

Mersi Mr Speaker. Mr Speaker, ou a note depi taler mon pe servi- mon pe regard bann larepons ki bann Minis in donnen dan Lasanble e nou pe *find out* ki zot bann Minis i dir nou en keksoz me apre pa materyalize.

An 2022 Mr Speaker, ler i ti vin defann son Bidze, Minis Devika Vidot ti servi sa term sa bann term swivan- i ti dir ki, *“materializing the One District One Project is a priority for next year with work have in commands in both Perseverance and Au Cap districts”* tou lede naryen pa ankor ganny fer.

La nou'n ganny dir poudir i annan- e zot pou ganny *finance through public private partnerships*. La, nou'n tann Baie Lazare e i parey ki Baie Lazare prezan i nepli *One District One Project* me plito mon pa konnen si *regional center*.

An plis ki sa Mr Speaker, an 2024 le 30 Out 2024, ler i ti fer en prezantasyon, Minis ti osi dir ki zot pe propoz

reklanmasyon serten zone, serten landrwa, zisteman i pou enkli pou nou kapab donn-*provide* sa bann later.

So, kekyon ki mon annan pou Minis se ki nou'n ganny dir sa proze Baie Lazare pou materyalize an 2026, ou'n koz lo MEC Providence ki deza annan en problemn aköz ou annan problemn striktirel ki ti'n ganny idantifye resaman.

So, sey dir nou lekel landrwa oubyen konbyen landrwa ki zot pou annan sa bann proze *going forward* an 2026? Oubyen eski sa i zis - (mon pa oule servi sa term Mr Speaker)- me selman oubyen eski sa i zis bann promes lavey en eleksyon e pou sa?

Akoz ler nou pe gete depi 2022 nou pe koz pou Au Cap me naryen pa ankor ganny fer. So, mon pa ti a kontan krwar poudir sa i leka, zis parey sa bann *chiller* ki Minister Lanvironnman ti'n sipoze demann later IEA. Mersi.

Mr Speaker, napa naryen pou zot ankoler mon pe demann bann kekyon baze lo bann lenformasyon ki annan ou konpran?

MR DEPUTY SPEAKER

Mersi Onorab. Mon ti krwar *One District One Project* avek bann Sant Lantrepriz i 2 diferan keksoz, be Minis i kapab klarifye. Aköz mon war li koumsa.

MINISTER DEVIKA VIDOT

Mersi Mr Speaker. Onorab, *Leader* Lopozisyon i oule koz proze materyalize? Annou koz proze ki'n materyalize anba sa ladministrasyon, be nou pou annan tro bokou pou nou dir, nou pou fini demen bomaten.

(APPLAUSE)

MINISTER DEVIKA VIDOT

Si nou fer en pti letour la Providence, semen ki plan ti'n ganny etabli pou plis ki 10an pa'n zanmen ganny materyalize anba zot Gouvernman e se nou ladministrasyon ki'n fer. E sa pou nou ti en priyorite Mr Speaker, aköz pou bokou lannen, aköz pou bokou lannen bann biznesmenn in soufer avek bann *potholes*, napa drenaz.

Mr Speaker, pa ankor fini, sistenm drenaz Providence nou ankor pe travay lo la parske tou sa letan personn pa'n war li en priyorite pou li fer sir poudir sa bann keksoz sa bann proze i materyalize.

So letan nou pe koz proze materyalize annou met li, annou koz laverite Mr Speaker, e annou regarde avek nou lizye i pou fasil pou nou vwar.

Mr Speaker, letan nou ti antre dan ladministrasyon lot

kote latab ti dir koup tou proze kapital, pa mwan ki ti dir. Si nou ti'n ekout zot ozordi ni en proze pa ti pou ganny fer, me selman ozordi menm Onorab pe asiz la pe demann mwan oli proze? Be Onorab nou bezwen serye, nou bezwen serye dan pozisyon ki nou pran parske nou pe kontradir nou lekor la.

E Mr Speaker, mwan mon pa tonm dan sa bann pyez, sa Gouvernman i annan li en vizyon drwat, i annan en plan, i annan keksoz wi nou pa pe kapab fer deswit aköz kontrent bidzeter, nou'n pas atraver e 2 an pe sey *recover* me tou sa bann keksoz nou annan en plan e nou travay lo la.

Proze *PPP* wi, nou'n ganny bokou difikilte avek teren nou'n bezwen osi pas atraver letap lezisasyon aköz ti napa en *framework* e alor nou'n navige, nou annan e nou'n kapab ganny laprouvasyon avek *Cabinet*, avek Minister Finans pou nou kapab *proceeds* avek nou *PPP* sa in ganny aprouve dan mwan Mars, e alors la le nesaser i ava kapab ganny fer pou nou fer *advert*.

Eski i en ptiyorite pou nou? Wi, tou nou bann proze i reste en priyorite e a okenn moman kot nou an lespas fiskal Mr Speaker, nou travay lo plan pou nou kapab soumet nou bann demann. Tou

keksoz parey Prezidan i kontan dir, le moman ki nou kapab nou retourn li anver nou pep e nou donn bann fasilite.

So, Mr Speaker, mwan mon satisfè avek progre ki *IEA* in fer. Nou sorti dan en sityasyon kot an 2019 ti napa okenn alokasyon anver Proze Kapital e ozordi nou'n ariv nou en sityasyon kot nou'n kapab materyaliz en kantite en kantite devlopman an sa ki konsern nou bann *zone* endistriyel. Mersi bokou.

MR DEPUTY SPEAKER

Mersi *Minister*. Loter kestyon i dir ek mwan i pa'n ganny son kestyon siplemanter, *but you have to protest* Onorab, ou bezwen kriy mwan si mwan mon fer en lerer. Eskiz mon, so demann ou siplemanter.

HON FRANCOIS ADELAIDE

Wi Mr Speaker, aköz ki i fer sa en keksoz serye sa, i en keksoz mon'n anmennen pou Baie Lazare aköz nou annan bann lenformasyon serye pou nou pase avek zabitan Baie Lazare, me ler mon war bann lezot keksoz pa enportan pe antre ladan byensir i pran mon letan pou mon kapab demann mon kestyon pou eklersi dimoun Baie Lazare.

Minis, petet avek ou lekip, vi ki la pou lemoman i annan en tranzaksyon ki pe

pase kot i annan en *businessman* ki petet in demann sa landrwa pou le moman aköz bann dimoun pe *query* ki pe arive. So nou konnen poudir i annan en *businessman* ki pe stok son bann materyo la pour- ziska Oktob parey ou pe dir.

Petet si ou ti kapab donn en pti leksplikasyon *at least* pou enform piblik ki napa naryen mal ki pe arive se sa bann keksoz in ganny permisyon avek *IEA* e byento sa landrwa nou pou ganny met li pou nou kapab komans sa proze Mikro-Antrepriz. Mersi.

MR DEPUTY SPEAKER

Mersi Onorab. *Panel?*

CEO IEA THELMA ESTICO

Mersi Mr Speaker. Mersi Onorab, pou ou keştyon. Annefe sa proze i annan en proze distrik ki pe *go on*, *SIA* in apros nou ansanm avek sa kontrakter ki'n ganny sa kontra pour distrik Baie Lazare.

Zot ti pe demann lasistans *in view of the fact* ki i annan sa *building* ki sa vye batiman dan Baie Lazare ki pa pe servi kot nou sipoze fer nou *MEC* zot in apros nou, zot in ekrir nou, zot in demann permisyon.

E lerla vi ki i ti annan zis en pe bann i pa ti pe servi i ti

en pti pe izole, me lerla nou'n donn zot en serten peryod pou komans servi depi Mars ziska Septanm pou zot kapab stok zot bann materyo konstrikşyon.

Me apre letan zot pe fini nou'n tonm lo en lagreman zot pou demoli sa landrwa pou fer plas pou sa nouvo konstrikşyon ki pou vini *early next year*. Mersi.

MR DEPUTY SPEAKER

Mersi. Onorab Vidot.

HON AUDREY VIDOT

Mersi Mr Speaker. Mon a dir bonn apre midi Minis avek ou delegasyon. Tou bann Manm Onorab e bann zenn dan Galeri. En bonn apre midi spesyal pou zabitan Roche Caiman.

Mr Speaker, mon keştyon pou Minis; Minis, letan Onorab Adelaide in mansyonnen ki i annan en *private partnership* ki anvi angaz ek Gouvernman ou bann proze dan son distrik, mon ti pe regarde eski i annan ankor bann lezot dimoun lentere ki pe ganny antre dan bann lezot distrik menm dan laliny e ki sa bann distrik?

E pou nou kapab osi ganny en nide petet aköz ki zot pe propoz Au Cap koman en komansman e prenon kont ki parey i deza annan bann lezot distrik ki ti deza annan

demann e zot ankor pe espere?
Mersi.

MR DEPUTY SPEAKER

Mersi Onorab. *Panel?*

CEO IEA THELMA ESTICO

Mersi Mr Speaker. Mersi Onorab, pou ou kestyon. Petet mon pe fer en klarifikasyon an term *partnership*, *Public Private Partnership* i pou *happen* pou le moman Au Cap avek Perseverance. Sa sa 2, me an sa ki konsern Baie Lazare, Baie Lazare ti en *Micro-Enterprise Centre* sa ki Gouvernman pe lanse.

Me parey nou pe dir pou bann lezot distrik ki ti deza annan sa bann bout later ki ti deza la me sa nou pe travay avek Lotorite Distrik pour ki nou kapab get bann proze ki pou pe materyalize. Mersi.

MR DEPUTY SPEAKER

Ou annan klarifikasyon?

HON AUDREY VIDOT

Yes, en pti klarifikasyon. Dan menm laliny ki ou'n dir zot pe *liaise* ek bann- zot pou *liaise* ek bann distrik, i annan serten par egzanp mon pran Roche Caiman i annan en serten *request* ki ti vini.

Mon pe regarde si petet in ariv kot zot, aköz zot ti *go back from Ministry of Land* in refer kot zot aköz se zot ki pe *oversee* sa morso teren, i zis la

akote Ladministrasyon Distrik Roche Caiman e nou pa ankor tann okenn *feedback* lo la. Mersi.

CEO IEA THELMA ESTICO

Mersi Mr Speaker. Mersi Onorab, pou ou kestyon. Mon pa ankor ganny naryen formel ki'n vin kot mon ki petet sorti kot distrik kot ou, ki relye avek sa.

Parey mon pe dir, mon *open*. Mon travay avek tou bann Lotorite Distrik pou bann proze ki annan pou zot distrik, me mon *open* si zanmen i annan okenn petet diskisyon ki zot anvi fer dan sa domenn an se ki konsern mon pa ankor ganny naryen sorti Roche Caiman.

HON AUDREY VIDOT

Mr Speaker, mon ti pe fer referans avek sa *private* si in ekirir zot? Sa ki mon ti pe klarifye. *Thank you*.

CEO IEA THELMA ESTICO

I annan en dimoun ki'n vin kot nou ki'n montre lentere pou sa, be selman letan nou ti pe get en pti pe bann aktivite ki li i ti pe vin avek i pa relye avek *anything* pou fer avek endistriyel. Mersi.

MR DEPUTY SPEAKER

Mersi Mrs Estico. Dernyen enterven an lo sa- Minister oule azout keksoz avan?

MINISTER DEVIKA VIDOT

Yes, Mr Speaker. *Sorry* mon pou al fer en klarifikasyon akòz i annan en kestyon ki Onorab *Leader* Lopozisyon in *press* e petet pou klarifikasyon i enportan dan sa *sitting*.

Mon'n ganny lenformasyon poudir *cold storage* in fini ganny *commission* depi lannen pase. So, ou ava ganny konfirmasyon avek Departman Lagrikiltir lo la. Mersi.

MR DEPUTY SPEAKER

Mersi. Dernyen entervenans lo sa enn kestyon siplemant, Onorab Woodcock.

HON WAVEL WOODCOCK

Annefe Mr Speaker, sanmenm sa ki mon ti pe al dir ki Minis fek dir la.

Akòz ou konnen mon santi poudir ennler i annan bann kestyon ki ganny demande sirtou par *Leader* Lopozisyon kot i napa lenformasyon ki *mislead* dimoun deor, parey sa zafer...

MR DEPUTY SPEAKER

Ok, ok, ok!

HON WAVEL WOODCOCK

Parey sa zafer *cold storage*, zis mon anvi dir...

MR DEPUTY SPEAKER

Alright, alright, alright!

HON WAVEL WOODCOCK

Zis pou montre ou ki mannyer *Leader* Lopozisyon i ete Mr Speaker.

MR DEPUTY SPEAKER

Ok, ok, ok! Alright, alright!

HON WAVEL WOODCOCK

Zis pou montre ou ki mannyer i ete. Lenformasyon i la i kler, fasil in fini ganny fer i vin donn lenpresyon ki i pa'n ganny fer.

MR DEPUTY SPEAKER

Ok, ok!

HON SEBASTIEN PILLAY

Mon'n demann li mwan, li ki pou reponn.

MR DEPUTY SPEAKER

Bon, nou'n ariv a lafen- nou'n ariv a lafen premye sesyon *questions for oral answers*. Avek *panel* sorti kot Minister Lenvestisman, Lantreprenarya avek Lendistri.

Delegasyon ki ti pe dirize par Mrs Devika Vidot koman Minis. E i ti pe akonpanyen par Manmzel Anne Rosette ki Sef Egzekitiv *Seychelles Investment Board* e osi *Chief Executive Officer* pou *Industrial Estates Authority* Mrs Thelma Estico. Mon ava dir zot mersi pou zot partisipasyon nou pou *adjourn*

la, nou pou rebran travay 2 er apre midi.

I annan *meeting Bills Committee*. Chair bann Manm i ganny envite? Lezot Manm? Non, non *ok* zot pa annan drwa vini i dir mon. *Ok*, donk nou *adjourn* la e nou a rebran travay 2 er apre midi. Bonnapeti zot tou.

(BREAK)

MR SPEAKER

Bonn apre midi tou dimoun, Manm Onorab, zofisye Lasanble e osi nou piblik. Mersi pou zwenn nou pou sa apre midi travay. Nou pe kontinyen avek en seri kestyon pou en lot Minis e mon a demann Madanm *Hansard* Raporter pou apel Minis ek son delegasyon.

Bonn apre midi Minis pou Lasante Mrs Peggy Vidot e Dr Bernard Valentin Sekreter Prensipal pou Lasante, Dr Jude Gedeon Komisyoner pou Lasante Piblik e Dr Danny Louange *Chief Executive Officer* pou *Health Care Agency*. Bonn apre midi zot tou e byenveni dan Lasanble.

Mon krwar Manm ek piblik i a rapel poudir nou ti enteronp en sesyon kestyon avek Minis Lasante dernyen fwa e sa sete lo sizesyon bann Manm, bann *Leaders* Lasanble pou permet Minis fer

fas avek en sityasyon personnel, e mon kontan ki Minis in kapab retournen ozordi.

Minis, mon pran lokazyon pou pas ou kondoleans Manm Lasanble an antye e sa osi mon fer li aköz serten Manm in demann mwan pou fer li. Kondoleans pou lanmor ou frer, e nou zwenn ou dan sa lokazyon tris.

Donk, ozordi i donn nou lokazyon pou nou rebran, aköz nou ti bezwen re fini kestyon ki ti deza lo nou *Order Paper* pou nou pa les li trennen. E avek sa nou a komans avek kestyon pou Minis, e premye kestyon i limero 19 dan non Onorab Egbert Aglae. Onorab.

HON EGBERT AGLAE

Mersi Mr Speaker. Bonn apre midi Minis, Dr Valentin, Dr Louange ek Dr Gedeon. Kestyon i lir *comme* swivan; -

Eski Minis i kapab donn en pti kontrandi lo servis lanbilans an se moman e eski Minister i satisfè ek sa servis? Mersi.

MR SPEAKER

Mersi Onorab. Minis, ou repons.

MINISTER PEGGY VIDOT

Mersi Mr Speaker. *Leader* Zafer Gouvernman dan Lasanble, *Leader* Lopozisyon,

Manm Lasanble Nasyonal, telespektater bonn apre midi.

Mr Speaker, mon ti a kontan komanse par remersi ou avek Lasanble pou zot konprenezon pou akord mwan loportinite pou fer fas avek en sityasyon personnel e osi pou zot mesaz kondoleans ki ou'n eksprimen. Mersi bokou.

Mr Speaker, an repons kestyon Onorab Aglae, mon ti a kontan dir kontenir volim travay ki annan pou fer, kontenir resours ki nou'n envestir dan amelyorasyon sa servis lanbilans, kontenir dedikasyon la mazorite *staff* ki travay dan sa servis lanbilans. Mon konfortab pou dir wi, mon satisfè.

Sepandan, satisfè pa vèdir ki nou pa kapab amelyore, i annan ankor lespas pou amelyorasyon e Minister pe fer son mye pou tou sa bann amelyorasyon vin en realite. Nou ti a kontan ki tou dimoun ki vreman bezwen en lanbilans i ganny li dan mwens dele letan posib, me nou ti a osi kontan si nou popilasyon ti toultan servi lanbilans pou rezon valab.

Mr Speaker, an se moman nou annan 16 lanbilans an servis, be sa i ganny distribye *comme* swivan; - pou rezyon Was dan Anse Boileau nou annan nou 2 lanbilans, pou rezyon

Santral, Mahe e Nor Mahe nou annan nou 7 lanbilans, pou Anse Royale nou annan 2 lanbilans, pou Anse Aux Pins nou annan 1, pou Praslin nou annan 2 e pou La Digue nou osi annan 2.

Sa distribisyon i montre ki nou pe fer sir ki tou rezyon i ganny kouver par en lanbilans ouswa de. E pou donn ou en pti kontrandi parey ou'n demande Onorab, mon ti a zis donn detrw sif dan statistik 2024.

Pour 2024 nou'n annan anviron 30 mil lapel pou lanbilans, sa se dan rezyon Mahe, Praslin ek La Digue. Dan tou sa bann lapel zis en pti pe par lao 3 mil ki nou, nou konsider sa bann lapel koman en lapel pou en ka lirzans medikal. Laplipar dan sa larestan, pasyan ti a kapab ganny akse avek sa servis lasante atraver en lot mwayen transpor si zot pa ti bezwen pran en lanmak pou zot vin lopital.

Nou osi letan nou regard statistik dan sa kantite lapel nou'n annan en kantite demann pou retourn dan lakour apre ki pasyan in reste lopital ou si non pou zot vin en randevou kot Dokter.

Letan nou regard sif parey nou'n dir, si nou pe klasifye zot an ka lirzans medikal nou annan nou plis ki 25 mil *calls*, lapel ki nou'n

klasifye koman pa irzan. Ladan, 4831 pasyan in ganny demande pou vin zwenn zot pou zot vin en randevou kot en klinik ou si non pou zot swiv en servis medikal.

Nou'n annan plis ki 8mil 860 lapel pou pasyan ganny transporte *back* dan lakour. Letan nou regard nou pri, nou kou zis pou *fuel* i lanmwatye larzan ki nou gannye pou *fuel* nou pe servi li pou nou fer *running fuel*, pou *run* lanbilans.

Nou bezwen en bon pe drayver lanbilans ki nou bezwen toulta pe rode pe *recruit* e pe *train*.

Mr Speaker, malgre nou devouman pou donn en servis efikas, nou fer fas osi avek serten defi tel ki lapel lanbilans pou sityasyon ki pa vreman demann en servis irzan. Lenformasyon ki pa konplet e menm parfwa fo lenformasyon, landrwa ou teren ki difisil e parfwa i mank korperasyon piblik tou sa i pa fer ki sa servis i fonksyon dan fason ki i ti kapab fer pli efikasan.

Mr Speaker, servis lanbilans i en servis nou realize en servis esansyel ki nou donne pou nou popilasyon, e ki nou fer sir ler nou donne ki zot ganny sa swen kan zot bezwen li. Nou pe kontinyelman travay pou nou ogmant lefikasite sa

servis, optimizm nou bann *fleet* e amelyor leksperyans pasyan dan en fason ki i reponn a zot bezwen san ki zot war okenn baryer.

E nou reste determinen pou fer servis lanbilans enn ki a reste en model efikas e reponn bezwen nou popilasyon. Mersi Mr Speaker.

MR SPEAKER

Mersi Minis. Nou a pran siplemanter Onorab Aglae pou komanse.

HON EGBERT AGLAE

Mersi Minis, pou ou larepons ase detaye. Minis, etandonnen ki ou'n nonm en pti gin bann alokasyon ki mannyer zot in distribye bann lanbilans dan bann diferan rezyon, e sant lasante.

Premyerman, mon ti a kontan demann ou si a lavenir an mezir ki amelyorasyon e zot ganny ase lanbilans mon kapab dir, zot pou konsider osi annan enn petet ki *standby* dan rezyon Port Glaud? Akoz nou anan 2 sant lasante Beoliere avek Port Glaud. Ki a ede osi minimiz en pti pe bann retar dan en sans, ler i annan bann *call* dirzans ki pou ganny donne. Sa i enn.

Dezyenm Minis, ou'n donn sif lo la kantite *calls* ki ou'n gannye, e osi ou'n mansyonnen ki i annan bann servis osi ki lanbilans pe fer an

se moman. Par egzanp ou'n nonm i annan *back home*, i annan bann ki bezwen vin kot sant menm.

Eski zot pe mazin annan serten kalite servis pou anpese ki se lanbilans ki bezwen deplase pou al fer sa bann kalite *calls* parey?

Akoz dan bann lenstans kot i annan sa bann servis ki zot pe donnen, *emergency* i kapab *arise* e i fer bann lenteripsyon. Eski zot pe mazin osi annan sa ledikasyon ek sa servis pou revwar ki mannyer zot kapab fer li pli vin efikas?

E dernyen se travayer ki travay dan lanbilans Minis, ou annan sirtou *porter*, ou annan *paramedics*. Eski zot annan en program osi pou kapab fer sir ki i annan ase pou zot fer sa bann travay dan bann *shift* ki bezwen ganny fer, ki evite ki parfwa letan i annan *calls* in arive dan bann lenstans kot ti napa *porter*, ouswa petet *paramedic* osi pa'n antan tousala, eski zot pe fer pou amelyor sa sistenm? Mersi.

MR SPEAKER

Mersi Onorab. Onorab in al lo 3 kestyon. Mon pou *remind* bann Manm pou reste lo 2 aköz mon annan pa mal lentere dan sa. Me nou a pran 3 kestyon pou loter kestyon. Minis, ou repons.

MINISTER PEGGY VIDOT

Mersi Mr Speaker. Onorab, pou bann kestyon, nou konstaman regard e analiz nou bann statistik, nou baze lo lapel, kote lapel i sorti pou nou kapab konnen si sa servis ki nou pe donnen kantite i sifizan, e sa nou kontinyelman fer li tou le *quarter* nou asize nou regard tou sa bann kalite keksoz.

E si nou vwar poudir i annan demann aköz en gran ogmantasyon dan en rezyon, nou fer sir ki nou ava amelyore e aranz li.

An term ki kalite transpor nou servi pou nou retourn ek dimoun dan lakour par egzanp. E sa i en servis ki pa neserman en servis lanbilans me i en servis si oule transpor pou retourn dan lakour. Nou deza annan en pti bis ki nou'n modifye pou nou kapab servi li pou refer sa bann transportasyon pasyan ki pa bezwen en lanmak or en *stretcher* ki bezwen en lanbilans me ki bezwen en lot mwayen transpor.

Wi, nou fer sa, e kantite dimoun ki travay dan lanbilans. Isi dan lanbilans nou bezwen anvoy en *paramedic*, en drayver ek 2 *porter*. Rezon se aköz nou bezwen sa bann *porter* pou lev pasyan i enn bann defi ki nou gannnen.

Nou annan defi akòz i anan dimoun par egzans ki pa reste pre obor semen e ki zot teren i en pe difisil e parfw a bezwen en kantite dimoun pou transport sa pasyan. Nou osi annan en defi kot parfw nou pa ganny led avek fanmir ou sinon avek vwazen sinon dimoun ki la ki pou ede.

Wi, nou'n deza anvoy lanbilans ek 2 *porter* ki pa sifi nou bezwen desann al rod lot led pou vin sers pasyan, so sa osi i en defi.

Si nou pe fer keksoz pou amelyor la kantite, kan finansman i permet nou, nou fer li e pou amelyor zot kapasite wi, nou pe fer serten lantrennman. Mersi.

MR SPEAKER

Mersi Minis. Bon, nou a fer le mye pou bann Manm ki'n lev lanmen deza. Nou a komans avek Onorab William.

HON WAVEN WILLIAM

Mersi Mr Speaker. Bonn apre midi Minis avek ou lekip. Minister, ou'n dir ki ou annan 16 lanbilans e ki ou depans apepre lanmwatye ou Bidze atraver *fuel*.

Mon anvi ou dir avek sa Lasanble e an menm tan pou piblik deor, fer nou konnen ki laz sa bann lanbilans? Akòz dan sa sez la, ki fer ki petet zot pou bezwen petet ranplase i

annan bann pou bezwen ranplase dan lavenir.

An menm tan, eski sa bann nouvo lanbilans i pe fer en pli bon, mon kapab dir donn en pli bon servis *in terms of space* an menm tan pou fasilite sa bann travayer ki dan sa lanbilans? Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Onorab pou sa keston. Mr Speaker, si i posib an term laz sa bann diferan veikil mon a demann Dr Louange koman *CEO Health Care Agency* pou donn nou sa.

Wi, Onorab, nou'n realize poudir i annan, *in fact* nou annan 21 lanbilans dan nou *fleet*, me i annan 5 ki nou rezerve pou ler enn i kase pou nou ranplase ki nou pa war en rezon annan zis enn, me nou toultan annan nou kantite.

Nou'n osi remarke poudir wi, nou annan en pe problem lespas dan serten sa bann lanbilans, se sa rezon ki bann dernyen lanbilans ki nou'n aste nou sey regard mentenir en serten standar. E nou annan problem kot menm letan ou pe regard lanbilans standar par egzans nou bann *stretchers* pa ase larz pou serten group nou popilasyon.

E tousala i bann keksoz ki nou vwar ki nou pe adapte

nou *fleet* pou nou kapab mye servi. Mr Speaker, avek ou permisyon si Dr Louange i kapab donn laz nou *fleet* silvouple.

MR SPEAKER

Tre byen. Dr Louange.

CEO HEALTH CARE AGENCY
DR DANNY LOUANGE

Mersi Mr Speaker. Bonn apre midi Mr Speaker, bonn apre midi *Leader of Government Business, Leader of the Opposition*, tou bann Onorab e tou bann dimoun ki a lekout. Mr Speaker, e mersi Onorab pou sa keston.

E Mr Speaker, dan nou *fleet* ki nou annan i annan 13 lanbilans ki pli vye ki 10 an. E i vre ki akòz sa *fleet* i annan bann lanbilans ki vye nou *maintenance cost* i en pe *high*. Me selman ki nou'n vwar, laplipar sa bann lanbilans eksepte enn zot bann Toyota e sa bann Toyota nou vwar ki i tenir nou teren tre byen e nou annan bann pyes pou nou kapab sanze, sanmenm sa ki'n kapab tenir pou sa plis ki 10 an.

E nou an kominikasyon avek Minister Finans e pou nou gete, e nou'n fer li dan lepase ki annan en plan pou nou kapab ranplas sa bann lanbilans ki letan nou *cost of maintenance* i tro o nou aste enn nouvo. Mersi Mr Speaker.

MR SPEAKER

Mersi *Doctor*. Onorab Uranie, ou keston.

HON ROCKY URANIE

Mersi Mr Speaker. Bonn apre midi Minis ek *panel*, tou koleg Onorab, tou zabitan Zil Pros ki a lekout. E Minis, ankor enn fwa mon a pas ou mon senter kondoleans avek lafanmir.

Mon keston Minis, mon krwar i pa premye fwa mon'n deza demande sa. An vi ki La Digue nou konnen ennler *one size* parey nou dir pa *fit all*, nou annan en *Command Centre* Mahe, me nou war nou bann zabitan bann pasyan ki bezwen servi lanbilans i bezwen *still* pe fer sa *151, call* par Mahe pou zot kapab ganny lanbilans La Digue.

E sa i kre bokou lenkonvenyans pou nou bann dimoun ki bezwen servis lanbilans pou *emergency*. Alor, nou ti pe gete ki zot kapab fer pou La Digue? Akòz i ti deza ganny dir ki pou annan en limero direk La Digue ki zot pou kapab servi. Eski sa i an demars pou ganny fer, pour ki Digwa i kapab *call* direk lo sa laliny dan plas *call 151*?

Zot ganny demande plizyer keston e finalman ou a krwar sa dimoun ki pe pran sa, i perdi dan tou sa leksplikasyon e lenformasyon

pa vreman arive kot i sipoze arive. Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Mr Speaker. Onorab, mersi pou ou kestyon mon krwar parey ou dir, nou'n deza annan sa diskisyon. Wi, i pa pou fasil pou nou annan 2 *Command Centre* or 3 enn pou Praslin, enn pou La Digue, enn pou Mahe.

Nou annan en *Command Centre* kot tou *calls* i antre e tou *calls* i ganny pase. Mon ti a kontan Mr Speaker, dir poudir nou annan en servis *GPS* ki menm en dimoun i asiz dan sa *Command Centre* i vwar egzakteman kote sa lanbilans La Digue i ete e i konnen kote sa *call* i ete.

Pou sa rezon wi, si konmela en *call* i antre i dir “mon pe *call* pou en pasyan Grand Anse”, sa dimoun pou bezwen demann li eski Grand Anse Mahe, Grand Anse Praslin, Grand Anse La Digue. Wi, i pou demann li sa bann kestyon pou li ganny byen lenformasyon.

Me lefe ki i *call* dan en *Command Centre* pa neserman retard sa *call*, akòz pou nou annan en lot *call Centre* La Digue, i pou donn nou en bon pe - nou pou bezwen bokou plis resours

imen pou *man* sa *Centre*. Nou'n regarde bann fasilite ki annan konmela.

Nou'n regarde bann dimoun ki la, me nou napa sa kalite dimoun ki pou- nou pou napa sa kantite dimoun ki pou kapab *man* en *Centre* 24 lo 24 toulezour tou dilon lannen.

E pour sa rezon nou pe ankor *monitor* ki mannyer nou dil avek bann *calls* ki vini sorti Praslin, sorti Mahe pou nou regarde ki vites nou kapab annan en *response*. Mersi Mr Speaker.

MR SPEAKER

Onorab, klarifikasyon i bezwen vit en? Silvouple.

HON ROCKY URANIE

Mersi Mr Speaker. Mersi Minis. Minis, nou pa pe dir ou konmsi annan en *Call Centre* pou La Digue mwan, konmsi met en laliny telefonn direk *at least* La Digue i annan en ners ansarz, konmsi met en laliny direk ki nou kapab *call* direk lo La Digue. Apre sa ners ansarz i a fer le neser. Me selman pou fasilite Digwa konmsi fer li pli efikas, dan plas pas par sa enn Mahe. Mersi.

MR SPEAKER

Mersi. Minis, ou ti a kontan adres sa?

MINISTER PEGGY VIDOT

Mr Speaker, mon konpran ki Onorab pe dir, me selman sa dimoun par ki sa ners i osi par egzant aswar dizon i annan li 2 pasyan, 2 ners pe okip pasyan pou napa personn pou *man* sa laliny direk, e pour sa rezon ki nou pa ankor kapab met sa laliny direk parey zot in demande.

E tandis kot en *Call Centre* kot i annan dimoun 24 lo 24 sa bann *calls* i kapab ganny reponn. Mersi Mr Speaker.

MR SPEAKER

Mersi Minis. Nou a pran kestyon Onorab Hoareau.

HON JOHN HOAREAU

Mersi Mr Speaker. Bonn apre midi Minis avek ou lekip. Minis, dan ou larepons ou'n nonmen ki i annan 7 lanbilans pou Nor Mahe. Minis, mon ti a kontan konnen vi ki ti annan-i annan bokou demann ki en lanbilans i ganny stasyonnen dan Klinik Beau Vallon, si ou annan lentansyon pou stasyonn en lanbilans dan klinik Beau Vallon ki a kapab annan *less response time* pou kapab *attend* bann dimoun ki telefonnen pou *emergency*. Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Onorab. Onorab, sa i en keksoz ki nou pe analize e nou krwar byento i pou posib aköz i parey nou'n dir nou annan 7 lanbilans pou Santral ek Nor e i pou posib pou nou stasyonn enn kot *Health Centre Beau Vallon*.

MR SPEAKER

Mersi. Onorab Labrosse.

HON RICHARD LABROSSE

Mersi Mr Speaker. Bonn apre midi Minis ek ou delegasyon. Minis, mon annan zis en kestyon. Ler mon pe ekout tou sa bann lenformasyon ki ou pe donnen, mon pe mazine, eski Minister Lasante li menm nou war poudir lasante li menm in evolye dan Sesel. Nou annan sekter prive en pe partou, nou annan klinik prive, nou annan dantis prive.

Be lo kote lanbilans li menm nou ankor war Gouvernman li menm ki ankor pe donn sa servis.

Eski i annan bann lentere ki'n vini ek Minister ki annan bann dimoun prive ki ti a kontan donn sa servis? Si wi, e si non aköz ki nou pa ankor war en laliny lo sa kote? Mersi Mr Speaker.

MR SPEAKER

Mersi. Minis.

MINISTER PEGGY VIDOT

Mersi Mr Speaker. Mersi Onorab. Onorab, parey ou konnen, dan tou antrepriz prive dimoun pe regarde ki kalite profi i pe kapab fer dan pou fer son biznes marse.

E nou ti antann en dimoun ki ti annan en lentansyon, me mon sipoze ler in fer son lanaliz in war poudir kekfwa i pa pou rantab pou li e i pa'n kontinyen. Me an vi ki i en servis esansyel, Gouvernman i pran son responsabilite pou fer sir ki pou en servis esansyel i fer li dan labsans en lot dimoun pou *provide* sa *service*. Mersi.

MR SPEAKER

Mersi Minis. Onorab Henrie?

HON GERVAIS HENRIE

Mersi Mr Speaker. Bonn apre midi tou dimoun. Mon premye kestyon, baze lo grander popilasyon, e bann legzizans lo Minister Lasante an relasyon avek bann statistik ki ou'n donnen avan.

Konbyen lanbilans Minister i santi poudir nou dwatet annan, eski sa 16 ki an loperasyon ouswa sa 21 ki total dan stok i sifi? Sa i mon premye kestyon.

Dezyenm kestyon, dernyen fwa ki nou ti ganny en lo lanbilans ti an Me 2024, e sa ti 6 lanbilans *secondhand*. E sa letan ti annan en prononsman ki regard

posibilite fer vini ankor en pe e sa letan i ti dir poudir sa bann lanbilans in kout \$94 mil si mon matematik i korek i tonm *R1.5 million*. So, eski sa konversasypn i ankor lo latap ozordi? Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Onorab, pou ou kestyon. Onorab, pou nou *fleet* ki nou an konmela sa 21 nou santi nou kapab kouver pei avek demann, me selman nou annan limitasyon lo resours imen. E an term annan plis pozisyon par egzant pou drayver pou *EMT* e tou dimoun ki bezwen al dan lanbilans. Me i en diskisyon ki toultan nou pe annan avek Minis Finans pou nou regarde koman i ete.

Konversasyon wi, si nou pou kapab ganny lot lanbilans ki an si bon ki sa 6 ki nou'n gannnen dan fitir konmkwa ki si nou ti pou al aste enn nef par egzant ti pou kout nou sa *R1.5 milyon*.

Me selman, lefe ki sa 6 lanbilans i ankor bon lanbilans i pe donn nou en bon servis, i en keksoz ki nou pou kontinyen revwar e a vwar si nou pou bezwen plis lanbilans i pou keksoz ki nou pou'n kapab pran konsiderasyon. Mersi.

MR SPEAKER

Mersi Minis. Onorab Labonte?

HON ANDY LABONTE

Mersi Mr Speaker. Bonn apre midi Minis avek *panel*. Mr Speaker, permet mwan pou mon felisit bann *porter*, drayver avek bann *paramedics*, akòz souvandfwa zot pa ganny lapresyasyon malgre zot travay dan bann sirkonstans difisil e menm par ler, ou konnen ler zot pe fer sa travay dimoun pa apresye vreman sa ki zot pe fer, plito ganny kritike. So, i enportan ki nou remersi zot e apresye zot travay ki zot pe donnen.

Mon kestyon i a en pe lo laliny Onorab Hoareau. Minis, parey nou konnen poudir *Health Centre English River* i enn ki vreman, vreman, vreman bizi, si oule i enn pli bizi dan Sesel, annefe apard ki Lopital Victoria.

So, dan lespri petet pou fasilite bann zabitan Santral dan sa rezyon vi ki i deservi plizyer sou distrik e distrik an menm tan, nou konnen in dir i annan 7 dan Nor avek Santral, petet i annan sa diskisyon pou annan en lanbilans partikilye ki *standby* oubyen *allocate* avek *Health Centre Larivyer Anglez* li menm li ki a kapab pli fasilite sa servis ler pe ganny demande. Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Onorab. Onorab, letan nou pe regard sityasyon, nou pa panse ki toultan annan en lanbilans stasyonnen o bor en *health facility* donn nou pli bon servis.

Parey mon'n eksplike, nou annan en *GPS* ki permet nou vwar a nenport ki moman kote nou lanbilans i ete. E nou annan sa fasilite ki nou kapab rediriz lanbilans pou dir pa la, al la, letan ki nou, nou pe anvoy en lot baze lo irzans, baze lo kalite ka ki nou bezwen al serse.

So, mon krwar avek sa sityasyon, i permet nou sirtou dan Santral kot nou kapab fer sa kalite travay san donn en gran dele letan pou nou al sers bann ka ki bezwen ganny asiste e avek irzans. Me i keksoz ki parey mon dir ki nou toultan pe revwar. E si i annan en nesesite wi, nou ava pran sa desizyon.

MR SPEAKER

Mersi Minis. Onorab Pillay?

HON SEBASTIEN PILLAY

Mersi Mr Speaker. Bonn apre midi Minis. Mr Speaker, baze lo *Annual Report 2023, Health Report*, ti annan 26mil 616 *call* ki an tou ki bann lanbilans ti

fer. E si nou diviz sa par 21 i fer 1267 *call* pou bann lanbilans.

Prezan kestyon ki mon annan pou Minis, ou'n koz lo reparasyon pou bann lanbilans, me dan Rapor Oditer Zeneral in osi soulev en problem vizavi lafason ki zot i *procure* servis pou repar sa bann lanbilans. Eski i annan en problem lo *management* nou stok lanbilans? E aköz ki malgre nou pe dir i annan sa bann lanbilans, nou ganny sa bann konplent vizavi lanbilans pa'n vini e alors sa dimoun ki sipoze ti kapab ganny ede pa'n ganny ede?

Personnelman mwan mon'n rod bann *witness* kot lanbilans in ariv atan pou sov lavi en dimoun, me i annan sa problem, kwa ki fer ki i annan sa problem, eski zot pe *monitor* oubyen zot pe *assess* sa sityasyon?

E dezyenman Mr Speaker, vitman. Lafason ki ou'n reponn sa kestyon pou La Digue *Minister*, ankor enn fwa mwan osi mon'n bezwen *call* lanbilans e eksplik li sa landrwa, i pran letan pou eksplik lanbilans kote sa landrwa i ete egzakteman.

Me si ou en dimoun Mahe ki pa neseserman konn La Digue e en Digwa pe eksplik ou La Digue, i pran 3 minit pou eksplik li i kapab kout lavi ou lanmor sa dimoun. So, ki

zot plan lo sa kote? Mersi Mr Speaker.

MR SPEAKER

Mersi Onorab. Minis?

MINISTER PEGGY VIDOT

Mersi Onorab. Onorab. wi, nou annan ler par egzanp mon dir poudir nou annan sa gran sa 30 mil lapel, sa 30 mil lapel i pa sa vedir i 30 mil ka, i souvan pou en ka kekfwa ou ganny diferan- en dimoun i *bystander* i pase kekfwa i war en aksidan i *call*. I pa realize poudir en lot dimoun in *call*, en lot dimoun in *call*. Kekfwa pou en sa ou annan ou 3 ou 4 dimoun in *call*.

E alor sa kantite i monte.

E parey ou dir si ou pou pran sa kantite e ou pe diviz par *number of* lanbilans i pa toultan *equate* sa *number per ambulance*. Me mon ava dir poudir wi, nou annan en sistenm kot nou kapab *manage* nou lanbilans byen.

E ler ki nou annan en gran kou par egzanp pou *maintenance* sa bann lanbilans, nou osi konnen ki lamazorite ka sa bann lanbilans i lo semen 24 lo 24, zot pe fer teren ki difisil parfwa e alor zot *wear and tear* i bokou pli o ki lo en bann veikil normal kekfwa ki ganny servi pour *only* en serten peryod letan dan en lazournen.

E pour sa rezon i vre nou *maintenance costing* i ase o e pour sa lannen ki ou pe site. E parey Dr Louange in dir pli boner nou osi ti annan lanbilans ki ti kantmenm ase aze dan en fason e alor zot kapasite zot ti *breakdown* bokou pli souvan. E nou ti annan lanbilans par egzanp la mazorite lanbilans napa ti *four wheel drive* e pour nou teren sa ti kre ankor serten problemn pour zot.

Me wi, nou lanbilans mon santi poudir i annan en serten *management* ki *Health Care Agency* i fer ki adekwat.

Pour keston La Digue, mon krwar pou nenport ki landrwa en pe nou retar menm Mahe si ou pe eksplik en dimoun kote en dimoun i reste, lefe ki nou napa en sistenm *postcode* i pran letan pou eksplike. Pa tou dimoun ki pou konnen kote ou pou pase anba pye ponm ou sinon par deryer tel ros *or whatever* e sa i pran letan.

La Digue pa neseserman pli konplike. Dek ki i dir ek sa drayver i ou si non pou al sers tel dimoun, la mazorite letan zot konnen kote zot pou ale. *In fact*, La Digue aköz i pli ptipti i pli konnen. Tandis ki si ou pe pran en drayver ki reste Beau Vallon ou pe anvoy li sers en dimoun dan Capucin, i pou pli pa konnen e *unless* ou donn li

ladres spesifik avek leksplikasyon spesifik.

E sa i en nou bann problemn, nou bann defi ki mon dir pli boner, lanbilans i ale i pa konnen ki pti semen i pe pran ou si non i pran *the wrong* semen e sa i *cause* en pe retar. Alor pou sa rezon wi bann retar pa neseserman toultan ganny koze La Digue par sa. Mersi.

MR SPEAKER

Mersi Minis. Mon pou bezwen termin la pou sa keston. Zot a remarke mon'n pran 30 minit en pti pe plis pour sa. E mon oule asir bann Manm poudir mon annan nide termin sa sesyon pli tar 4er pou permet zot asiste konseylouvertir konsey Minis COI apre midi ki zot in ganny envite. Nou a pas lo *next question* limero 20 e se Onorab Richard Labrosse.

HON RICHARD LABROSSE

Mersi Mr Speaker. Ankor enn fwa bonn apre midi tou dimoun ki a lekout espesyalman zabitan Plaisance. Kestyon limero 20 al *comme* swivan; –

Eski Minis i kapab enform Lasanble ki leta nou Sistenm Danter ozordi, espesyalman kot i konsern bann nouvo teknolozi e osi *training* pou bann dantis ek

asistan dantis? Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Onorab, servis danter ki nou annan konmela mon a dir i modern i byen okipe e i kontinyen amelyore pou donn bann sitwayen en bon kalite swen danter. Sa servis i ofer atraver bann sant lasante dan kominote, Servis Danter dan lekol. Servis speyalize kot lopital kot Twa Zonn e osi program *outreach* ki nou mete pou bann group vilnerab tel ki bann dimoun aze dan Lopital North East Point e lezot diomoun aze e la ki nou pe donn osi pou bann pasyan dyaliz.

Sa Servis Danter i servi teknolozi modern ki konparab si oule avek standar enternasyonal tel ki lekipman radyografi nimerik dan tou klinik danter.

Nou annan en sistenm elektronik pou fer tou lanrezistremman bann pasyan e pou fer lapwentman, nou annan teknik modern pou reparasyon ledan, nou annan metod avanse pou nou fer tretman lo bann ledan ki'n gate e nou annan lekipman ki sterilizasyon i ganny fer en lekipman avanse.

Kot Twa Zonn, kot nou annan nou spesyalis *unit*, bann servis spesyalize danter i enkli en lekipman *x-ray* parey nou dir an Angle en *cone beam computerized tomography scan* ki donn en *reading 3D* pou fer donn nou en limaz vreman byennavanse; nou annan *laser* k nou servi pou fer serten loperasyon zis pou nonm detrwa.

Me nou osi annan plan pou 2025/2026 serten devlopman dan sa servis ki nou pe planifye tel ki fer ratelye bann fosdan avek bann *chrome cobalt*, nou annan zimaz *scanning* ki'n nou pou servi omye pou bann ki'n fer ledan ki nou'n met sa nespes lakol pou pran *impression*, nou prezan pa pou bezwen fer sa ler nou entrodwir li sa lannen.

I pou zis en zimaz ki i a fer en *scanning digital* pou nou fer sa.

E menm nou pe entrodwir kot bann klinik parey dan Baie Ste Anne ek La Digue en servis danter a zistans ki isi dantis speyalis ti a kapab ed sa bann dimoun pou fer sa bann kalite keksoz.

Devlopman ek formayson *staff* i kontinyel. Nou annan sa etidyan ki pe etidye pou vin dantis dan *Slovakia* an se moman, nou annan bann kou ki nou pe fer pou bann sa ki nou apel *dental surgery*

teknisyen pou elev zot nivo pou sorti zot lo nivo sertifikasyon pou mont lo Diplonm. Nou annan *course* ki nou pe *run* kot *NIHSS* ankor pou sa bann group.

Nou fer formasyon lo nivo degre pou bann *dental hygienist* ki zot ti fer lo nivo Diploma e sa lannen zot tou zot pou pe ganny *upgrade* pou en nivo degre e nou annan latelye kontinyel pou dantis pou terapis pou tou bann dimoun ki pe travay dan Servis Danter.

Nou annan en kolaborasyon avek en Servis Danter ki baze *Dubai* e osi nou anvoy nou bann dantis pou zot kontinyelman fer formasyon spesyalize. Nou'n investir si oule Onorab en kantite dan formasyon spesyalize e konmela dan nou servis nou annan omwen spesyalis dan 7 domenn dan danter ki permet nou donn servis spesyalize pou la mazorite nou pasyans ki bezwen.

Avek en lekip danter ki byen formen, avek bann lekipman modern ki nou'n investir ladan, nou sistenn danter i kapab ofer en servis konplet, efikas e alaoter ki nou pe travay pou nou arive lev li menm nivo enternasyonal kot i annan bann bon *practice*. Mersi Mr Speaker.

MR SPEAKER

Mersi Minis. Onorab Labrosse, Siplemanter.

HON RICHARD LABROSSE

Mersi Mr Speaker. Minis, in donn mwan en bon pe larepons Mr Speaker, e in menm reponn tou lede mon 2 kestyon siplemanter. Me mon annan zis en pti kestyon mon ti a kontan demann Minis, mon'n nonm dan mon kestyon in nonm asistan danter e la ler mon tann nou koze ou'n dir zot apel *dental technician*. Zis mon krwar zot *post* in sanze ozordi pou zot vin *dental technician*.

Kekfwa la vi ki ou dan Lasanble kekfwa si ou ti kapab eksplik Lasanble pour kwa sa pozisyon in sanze sorti- aköz nou apel lontan ti apel asistan ners, dantis ki la ozordi zot in vin *dental technician*, e pour ki rezon sa in sanze e si in annan okenn keksoz ki in sanze ansanm avek zot louveraz ki vin avek? Mersi Mr Speaker.

MR SPEAKER

Mersi. Minis, ler ou pare.

MINISTER PEGGY VIDOT

Mr Speaker, mon a demann Dr Louange pou eksplike ladiferans ant *dental technician* ek *dental surgery assistant*.

MR SPEAKER

Dr Louange.

**CEO HEALTH CARE AGENCY
DR DANNY LOUANGE**

Mersi Mr Speaker. Mersi Onorab, pou ou kestyon. Mon krwar ki nou bezwen rod en pe plis klarifikasyon lo la, aköz par ler ki nou servi, nou servi bann diferan term pou dekrir sa tit sa *post*.

E mon krwar dan nou larepons sa *dental surgery technician* i menm i en term ki nou pe servi pou *dental assistant*. So, mon kekfwa Minis i ava pran sa. Mersi.

MR SPEAKER

Minis, ou bezwen azoute?

MINISTER PEGGY VIDOT

Mersi Mr Speaker. Letan nou ti annan en *assistant* e souvandfwa sa dimoun ti pe zis donn serten pti keksoz ed sa dimoun pou fer serten keksoz. Letan nou annan en teknisyen i annan en serten formasyon ki ed li al pli lwen, ki ed li i annan en konprenezon teknik sa ki pe arive e i kapab donn sa soutyen sa dimoun profesyonnel pou fer sa kalite keksoz pli byen. Alor i anann en nivo pli avanse ki en asistan koman en teknisyen. Mersi.

MR SPEAKER

Mersi Minis. Bon, mon pou pran kestyon sa 3 Manm ki'n lev lanmen la o debi. Premye Onorab Pillay.

HON SEBASTIEN PILLAY

Mersi Mr Speaker. Mr Speaker, Minis, ou a rapel pli boner annefe an 2023 le 22 Mars an 2023, mon ti demann ou en *Private Notice Question* an relasyon avek *scheme* pou bann Dokter e bann dantis. E la ou'n koz ek nou lo lenplimantasyon eksetera.

Ki mon ti a kontan demann ou, prenon kont ki sa kestyon pe koz lo lankourazman, eski ou pe enplimant sa *scheme*? Aköz dapre lenformasyon ki ou ti dir pou en Dokter oubyen en dantis progresse lo sa *scheme* zot devret dan servis pou en serten kantite lannen e zot devret pas atraver evalyasyon e ganny en bon evalyasyon.

Zot pou bezwen annan rekomandasyon pou promosyon par en siperyer; an adisyon zot pou bezwen annan en pos pou sa grad ki zot pou ganny promosyon lo la *ok*? E la nou ti pe koz Dokter, dantis pa neserman bann *dental technicians*. *Ok*?

Me sa ki mon ti a kontan klarifye, eski i annan en problem ozordi pou promosyon bann dantis lo sa lot faz zot grad? E eski i annan okenn problem an sa ki

konsern bann *dental technician* pou osi permet zot pou bouz lo lot *step*, oubyen *improve* zot bann kapasite?

Akoz i annan serten konsern i ganny eksprimen par bann dimoun ki trouve dan bann Servis Danter. Mr Speaker, e zis an pasan ki ou kapab dir nou lekel prezan ki pe *manage* nou servis danter kot Lopital Viktorya? Mon konnen ti annan en Seselwa par lepase, eski i annan ankor en Seselwa ki pe fer li? Zis pou nou kapab ganny bann lenformasyon. Mersi.

MR SPEAKER

Mersi Onorab. Minis?

MINISTER PEGGY VIDOT

Mersi Mr Speaker. Mersi Onorab. Onorab, letan mon regard kestyon i plito pe demann mwan lo leta sistenm danter ozordi e apre donn en pe lo nivo teknolozi ki nou annan e *training*. Nou pa pe tro al lo kondisyon servis.

Me selman an vi ki ou'n demande, mon ava dir ou poudir ou'n demann mwan si nou annan en problem pou sa bann dimoun ki annan dizon bann spesyalis dantis, pou zot bouz lo ran ki zot sipoze ete koman spesyalis, nou napa en problem lo la.

Lekel ki pe ansarz servis dantis, nou napa en Seselwa *at the moment* ki pe ansarz

servis dantis nou annan en etranze ki pe ansarz sa servis. E sa i depi lannen 2an pase. Mersi.

MR SPEAKER

Mersi. Klarifikasyon i bezwen vit Onorab.

HON SEBASTIEN PILLAY

Mr Speaker, mon pou met sa la. I annan bokou konsern kot lopital ki *recruitment* bann dimoun ki vin ansarz dan bann pos pe ganny fer par en dimoun ki annan en serten nasyonalite e ki pe *recruit* partikilyerman -(non, napa naryen pou fer ek Minis sa, i pa pe atak Minis sa)-

(comments off-mic)

MR SPEAKER

Order! Order, please!

HON SEBASTIEN PILLAY

Mon pa konnen aköz zot bezwen....

MR SPEAKER

Order!

HON SEBASTIEN PILLAY

E konsern ki annan se ki aköz ki nou pa kapab ganny en Seselwa pou *fulfill* sa pos? Par egzanp nasyonalite ki'n ganny nonmen se Pakistane, se ki nou pe ganny bokou bann Paskistane ki pe ansarz bann pozisyon dan lopital.

Reasir nou poudir sa napa naryen pou fer sa avek sa, e nou ti konnen ti annan en Seselwa avan ki'n kite. Akoz nou napa en Seselwa ki kapab pran sa servis danter? Parey nou annan pandan plizyer lannen. Mersi Mr Speaker.

MR SPEAKER

Mersi.

MINISTER PEGGY VIDOT

Mr Speaker, si mon ti a kapab zis dir poudir *recruitment* i ganny fer par dimoun ki dan HR, e dan HR nou napa okenn etranze i tou Seselwa.

An term tou pos i ganny *advertised* e dimoun i kapab *apply*. E i annan en group Seselwa ki fer bann *recruitment* bann *interviews* e mon annan konfyans ki ler zot fer sa zot swazir the *best man for the job*. Mersi Mr Speaker.

MR SPEAKER

Mersi. Onorab Samynadin?

MINISTER PEGGY VIDOT

E sa dimoun ki ansarz i pa en Pakistanne i en Ostralyen.

MR SPEAKER

Thank you. Well, non mon napa problemm avek lekel pour vi ki nou *staff* nou annan zofisye. Mon a zis remarke ki Onorab ti aparti en klarifikasyon ti en nouvo

domenn. Onorab Samynadin ou kestyon.

HON KELLY SAMYNADIN

Mersi Mr Speaker. Bonn apre midi Minis avek ou delegasyon e tou dimoun a lekout.

Minis, nou pe konsider nouvo teknolozi alokasyon resours avek devlopman program. Mon ti a kontan konnen si Minister Lasante i annan en *oral health policy*? Si nou kapab ganny en pe detay lo la.

Si non, eski zot pe mazin fer en travay dan sa direksyon? Mersi.

MR SPEAKER

Mersi. Minis?

MINISTER PEGGY VIDOT

Mersi Onorab pou ou kestyon. Onorab, an se moman nou pe devlop en *oral health policy* avek en *oral health strategy* ki pou nou espere i ava pare sa lannen. Mersi.

MR SPEAKER

Mersi. Onorab Tamboo?

HON LOUISETTE TAMBOO

Mersi Mr Speaker. Bonn apre midi Mr Speaker. Bonn apre midi Minis avek ou *panel*. Minis, nou pe koz lo sistenm danter ozordi, e pou mwan i fer mwan anmenn en kestyon pou ou ki annan pou fer avek sistenm danter pou nou bann

zanfan. Mon ti a kontan konnen si i annan kontinyel Servis Danter dan bann lekòl e ki kalite servis danter ki pe ganny fer dan bann lekòl?

Akoz dapre bann paran i annan zanafan ki pe ganny dir zot bezwen al dan zot klinik pou serten kalite Servis Danter. Alor si ou ti kapab eksplik sa Lasanble e petet osi i ti pou bon pou bann paran kapab konnen e konpran. Mersi Mr Speaker.

MR SPEAKER

Mersi Onorab. Minis?

MINISTER PEGGY VIDOT

Mersi Onorab. Onorab, wi an se moman nou annan en Servis Danter dan lekòl, nou realize poudir a en serten moman mon konnen letan mon ti vin dan pozisyon ti'n aret en pe, me nou ti osi dan letan *COVID* me selman ti annan sa mouvman pou aret servis danter dan lekòl.

Servis danter dan lekòl i kontinyen, i annan bokou plis parey in toultan leka e parey nou met plis lanfaz lo prevansyon. Me selman i annan de kalite tretman *management* ki kapab ganny fer dan lekòl.

Me nou annan serten gidans serten protokol. Si i annan ka ki nou santi i pou pli annan mwen risk pou sa zanafan ganny fer dan en servis

kot nou byen ekipe, kot nou annan *backup* sa zanafan pou ganny demande pou al dan lekòl. Me nou pe fer nou servis danter e si ou'n vwar depi lannen pase nou pe met bokou plis lanfaz lo la e nou pe *move* plis- dan plis lekòl. Mersi.

MR SPEAKER

Mersi Minis. Nou ava avans lo prosen kestyon limero 21 Onorab Richard Labrosse.

HON RICHARD LABROSSE

Mersi Mr Speaker. Kestyon limero 2 i al *comme* swivan; -

Eski Minis i kapab enform Lasanble konbyen Dokter Seselwa nou annan dan nou sistenm lasante ozordi e ki bann program lankourazman ki annan an plas pou kontinyen siport zot? Mersi Mr Speaker.

MR SPEAKER

Mersi Onorab. Minis?

MINISTER PEGGY VIDOT

Mersi Onorab. Mersi Mr Speaker. Mr Speaker, lafen lannen 2024 ti annan 286 Dokter ki pe travay dan Sesel dan servis piblik osi byen ki dan servis prive, sa i en logmantasyon 31 Dokter konpare avek 2023.

En tyer parmi sa bann Dokter i Seselwa, 45 madanm e 53 msye. 81 i travay dan Sekter Piblik e 17 dan Sekter

Prive. La mazorite Dokter Seselwa ki i vin 65 an tou i aze mwens ki 40 an, e dan sa kategori laz bann madanm i an mazorite 38 madanm konpare avek 27 msye.

Sa i akòz bokou plis fiy nou vwar pe pran letid medsin konpare avek bann garson. Par egzanp an 2024 ti annan 7 fiy, selman en garson ki ti komans sa letid medsin. An tou i annan 56 etidyan Seselwa ki pe etidye medsin an se moman e aletranze. An plis ki sa 98 Dokter Seselwa ki ti pe travay Sesel lafen 2024, ti annan 24 ki pe fer letid avanse ou letid spesyalizasyon aletranze.

Fodre fer remarke ki tou nou *staff* i egalman enportan e ganny valorize e zot nesesit sipor. Alor kestyon pe demande ki sipor nou annan pou Dokter, mon ava- koz lo sipor pou Dokter, me mon ti a kontan fer resorti ki nou osi sipor lezot *staff* e ki nou valoriz zot osi.

Pli spesifikman lo kestyon ki sipor nou donn Dokter. Nou pran kontak avek bann Dokter e komans fer sa avan menm ki zot retoun Sesel ler zot ankor pe fer zot letid pou fer sir ki tou keksoz i an plas ki ler zot vini ki zot kapab travay. Nou fer en lentrodiksyon or sa ki nou dir en *induction* an Angle ler zot komans travay.

Nou annan en program rotasyon dan diferan plas travay pou en serten letan pou tou bann zenn Dokter Seselwa pou zot ganny en bon konprenezon, en bon apersi nou servis lasante ki mannyer i marse. E an menm tan nou santi poudir dan sa letan ki zot pe fer sa rotasyon dan sa 2 an i ed zot deside kote zot pou spesyalize.

Nou annan en sistenm sipor e evalyasyon ki ganny fer par bann Sef dan diferan seksyon travay kot zot ganny plase ek tou Dokter, pa zis zenn Dokter Seselwa me tou Dokter ki pe ganny anploye i ganny fer sa par sa bann Sef servis.

Zot ganny gidans ek sipor dan zot karyer medikal anliny avek *scheme* ki nou annan, zot ganny gidans ek sipor dan demars pou antre dan formasyon spesyalize. Alor, Mr Speaker, lo sa kote nou santi poudir nou donn en bon pe gidans ek sipor.

Nou ti a kontan dir ki Gouvernman pe kontinyen met an plas plizyer mezir pou ankouraz ek sipor Dokter Seselwa. Ler nou regard spesyalizasyon atraver Bidze Gouvernman, Dokter i ganny loportinite pou zot spesyalize swa atraver bann kour *online* pandan ki zot kontinyelman travay ou si non zot kontinyen

dan servis ouswa atrver letid aletranze.

Aktyelman, nou annan Dokter ki pe swiv spesyalizasyon dan Lanngleter, dan *Cuba*, dan *Malaysie*, dan *Armenia* e nou annan osi Dokter ki pe swiv *online training whilst* zot isi ki zot pe travay. E ladan kan zot pe fer sa parey nenport ki etidyan zot ganny sifizaman *time off* pou zot kapab fer zot letid.

An formasyon, nou annan 17 Dokter ki pe swiv kour speyalize.

Rekonpans pou zot performans i parey pou nenport ki travayer piblik dapre zot performans ek zot konpetans e toultan anliny avek zot *Scheme*. Dokter i kapab osi benefisye bann mezir ankourazman profesyonnel. Nou ankouraz ledikasyon kontinyel Dokter e sa i ganny swiv dan bann diskisyon profesyonnel.

Tou le Vandredi apre midi, nou organize ki Dokter i ganny *release* pou zot al swiv zot diskisyon profesyonnel avek kanmarad e zot fer diferan prezantasyon e sa i dan bi pou zot kontinyen ogmant zot konesans. E kan i posib nou osi donn zot sans pou zot al swiv bann kongre medikal, kongre profesyonnel pou gard zot azour.

Nou'n rekomans lannen pase nou prop konferans medikal annyel, e ankor sa in byen pase lannen pase e in anmenn bokou pou ed bann Dokter Seselwa e lezot Dokter ki pe travay dan Sesel pou zot gard zot lekor azour lo diferan topik.

Nou ankouraz Dokter pou kontinyelman aprann lo zot menm an menm tan, e i annan diferan fasilite ki zot kapab fer sa e i enportan aköz nou santi zot bezwen reste azour, zot bezwen reste azour avek bann diferan nouvo devlopman, medsin i en travay ki keksoz i sanze e zour an zour e zot bezwen mentenir zot nivo konpetans.

Alors pou sa bann mezir i enportan pou asire ki nou gard nou bann profesyonnel dan sistenm lasante e amelyor zot kalifikasyon medikal a toultan. Mersi Mr Speaker.

MR SPEAKER

Mersi Minis. Siplemanter Onorab Labrosse?

HON RICHARD LABROSSE

Mr Speaker, Minis in donn bokou lenformasyon, i fer kestyon siplemanter en pe difisil. *Ok*, Minis mon ava get 2 zafer ki mon'n kapab *pick up* ki ou'n dir la ki mon ti ava kontan ganny detrwa detay lo la.

Mon ti ava kontan konnen si ou Minister zot in fer serten travay an se moman avek bann lezot dan bann departman pou zot vwar kot ki annan en mankman konmsi lo kote Dokter Seselwa?

Mr Speaker, mon napa problemm avek bann Dokter etranze zot pe fer en travay manifik dan Sesel, me selman byensir nou bezwen ankouraz nou Seselwa byensir pou pran larelev.

E la ki vin lo mon dezyenm kestyon Minis, eski i annan bann travay osi ant Minister Lasante avek Minister Ledikasyon lo sa laliny ki pou vin avek mon premye kestyon ki mon'n demann ou? Mersi Mr Speaker.

MR SPEAKER

Mersi. Minis?

MINISTER PEGGY VIDOT

Mersi Mr Speaker. Mersi Onorab. Wi, nou annan en diskisyon avek Minister Ledikasyon. E mon kapab dir pandan sa bann detrw dernyen lannen nou'n ganny bokou led avek Minister Ledikasyon pou ede pou donn posibilite nou bann zenn Dokter Seselwa pou zot al fer zot spesyalizasyon. E sa i kontinyen e tou le-z-an nou annan sa kalite diskisyon.

Nou annan serten landrwa kot nou napa Dokter Seselwa ki'n kalifye e sa i vin bann priyorite kot nou donn sipor sa bann zenn Dokter ki oule al spesyaliz dan sa domenn.

Mon ti ava zis regard en pti pe landrwa kote, nou ava dir poudir an vi ki nou napa sa kantite spesyalis Seselwa, la mazorite landrwa la mazorite spesyalizasyon dan Sesel i ankor annan landrwa pou zenn Seselwa spesyalize. Nou annan serten keksoz par egzanp dan kardyoloji nou napa Seselwa ki'n kalifye ki isi me nou annan 2 Ki pe fer letid aletranze.

En landrwa kot nou santi osi i en gran priyorite se *encology*. Ki i en *encology medical* ou sinon si fizikal, nou napa sa Seselwa, zenn Dokter Seselwa ki pe pran sa letid e pou nou sa i osi en gran mank.

Dan laspe *neuro surgery*, nou osi nou mank Seselwa, dan lamazorite, me sa bann ki mon'n nonmen la nou napa ditou ki pe menm etidye aletranze. Me i ankor annan en kantite plas pou Seselwa etidye. Mersi.

MR SPEAKER

Mersi Minis. Bon, mon a pran kestyon sa 3 Manm ki'n lev lanmen deza. Onorab Henrie.

HON GERVAIS HENRIE

Mersi Mr Speaker. Ankor en fwa bonn apre midi tou dimoun. Mon premye kestyon baze lo la kantite Dokter ki Minis i in dir nou, nou annan setadir ankor grander nou popilasyon avek servis ki nou pe ofer, ki *figure* ki nou santi nou drwatet annan? E dan sa sif ki nou drwatet annan ki mannyer i konpar nou avek sa standar *OECD* ki koumsa nou kapab vwar poudir nou'n ariv vremen a en nivo devlopman tre eleve? Sa i mon premye kestyon.

Dezyenmman, alors en zour Dokter ti en profesyon tre rsepektab dan nou sosyete, e mon apresye war sa kantite zenn, menm ennler mon al kot klinik mon war konmsi mon sirprann aköz bann zenn dimoun, e i vremen fantastik. E mon kestyon la se ki nou kapab ofer zot ankor apard loportinite *training* ouswa pli bon *Scheme of Service*. Me i annan bann lezot keksoz ki pou kapab fer zot sirtou, sirtou reste isi e pa *go for greener pastures*? Kwa an deor an servis ki nou Minister i kapab koz avek bann lezot Minister pou nou fer zot lavi pli atiran isi Sesel? Mersi.

MR SPEAKER

Mersi Onorab. Minis.

MINISTER PEGGY VIDOT

Mersi Onorab. Onorab, letan ou pe regard nou kantite Dokter ki nou annan Sesel, si nou ti pou pran en, si oule standar *L'OMS* nou bokou par lao, pou kantite popilasyon. Menm si ou pe regard avek *OECD* i pa neserman ki nou bokou pli ba.

Me selman, aköz nou en pti pei, aköz nou annan serten spesifisite mon ava dir nou bezwen pe regard plis *skillsets as opposed to numbers*, e sa i vin en defi pou nou. Aköz dizon ler nou bezwen en *brain surgeon*, nou bezwen en *brain surgeon* la, me si nou anmenn enn a plen tan isi kekfwat plis ki lanmwatye, plis ki ou a krwar son letan e i pa pou fonksyonnel.

Dan letan lontan kot *training* Dokter ti baze si oule lo en fason pli zenerik - dizon ou ti annan en *surgeon* ki ti kapab fer en kantite be tousala pe sanze nou pe vwar poudir sa profesyon zot pe bouz dan *sub-specialty*.

Kekfwa i ava annan dizon nou pran *orthopedic*, i ava annan *orthopedic surgeon* ki fer zis *spine*, si ou lezo i- ou koud in ganny afekte i pa pe touse, *likewise* i annan ki fer zis koud. So ki fer pou nou, nou pa kapab ganny tou sa bann *subskills* e sa pou nou i kre en defi. E alor nou bezwen pe vwar e menm ler nou pe *recruit* nou pe bezwen pe vwar

eski ou en *orthopedic surgeon* ou konn fer en *hip replacement*, ou ki'n fer en *knee replacement*? Ou konn fer en serten degre travay lo lezo kase dan *ankle*?

Si i pa pe kapab nou pa pe kapab *at the moment* swazir li akòz nou, nou bezwen sa dimoun ek sa bann *skills*, e omwen annan- nou annan en *post* nou pa kapab annan 3 *post* pou menm keksoz.

Sa i en gran defi e mon santi poudir sa defi an mezir teknolozi i sanze, an mezir spesyalizasyon i sanze dan *medcine*, i pou kre nou bokou plis, akòz i pa zis dan *medcine* i pou dan dantis i pou dan *nursing* i pou dan tou profesyon lasante kot *subspecialty* pe fer li difisil.

Alor pou sa rezon mon ava dir an term kantite nou pa mal, me an term *skills* nou annan en kantite defi. Mersi.

Incentives, ok. Mon vwar lamazorite zenn Dokter ki retournen e diskit en pe zot bann sityasyon. Mon panse wi, nou pou bezwen annan en *retention strategy* ki pou ede pou fer zot reste.

Akòz pou plizyer zot par egzant letan zot retournen zot dir mon poudir zot zanmi ki ti lekòl ansanm ek zot dan *let's say SALS* in fer 3 an letid in ganny en kalifikasyon in tournen in komans travay kekfwa in travay pou 4 an in

deza kapab *afford* en loto, in deza kapab *afford* en *loan* kekfwa pou en lakaz e zot ler zot vini 7an pli tar zot pe komans lo zero.

E alor, serten keksoz ki si nou kapab fer e mwan mon'n annan serten diskisyon par egzant avèk ansyen Minis Finans pou regarde ki mannyer nou kapab fer sa, eski i annan en posibilite ki zot kapab ganny *loan* pli favorab dizon pou en transpor?

Wi, zot annan *at the moment* en *loan housing* ki ede pou zot kapab si oule lwe en lakaz en pe pli konvenab me prezan ki zot, zot pe vin komanse zot pou zot peye pou zot kapab ganny en *loan*.

E nou bezwen regarde ki kalite *non-monetary* si oule *strategies* ki ou pou bezwen pe mete pou ed zot pou nou kapab *retain* zot e fer zot apresye ki travay isi i annan serten benefis apard ki zis benefis ki zot war *on the other side where grass seems or appears to be greener*. Mersi.

MR SPEAKER

Mersi Minis. Onorab Roucou.

HON MICHEL ROUCOU

Mersi Mr Speaker. Bonzour Minis avèk ou lekip. Bonn apre midi anefè. Minis, si ou kapab dir nou konbyen i kout Gouvènmàn pou anvoy en

endividi ki anvi al *course* pou li vin en Dokter?

E osi si ou kapab dir avek nou, eski en Dokter, eski fodre ou spesyalize dan zis en domenn oubyen ou kapab spesyalize dan plizyer? Mersi.

MR SPEAKER

Mersi. Minis?

MINISTER PEGGY VIDOT

Onorab, mon napa en sif egzakt, i annan landrwa ki pli ser, i annan landrwa ki pli mwen ser. Me i kout nou anviron dizon R1.2 milyon pou nou *train* en Dokter, par an, *ok*? So i kout en kantite, e alor wi, nou bezwen Dokter nou bezwen kontinyen investir dan nou profesyonnel lasante e alor Gouvernman i angaze pou fer bann dimoun ki kapab al fer sa letid ale.

Eski dimoun i kapab spesyaliz dan diferan domenn? Wi, i annan serten pri spesyalizasyon ki dimoun i kapab fer, me selman ler en dimoun in fer 7an letid *or* 6an letid apre i pran li ankor dizon 5an pou li vin en spesyalis i pa souvan anvi al fer ankor en 5an pou li vin en lot spesyalis.

Me i annan program par egzanp ki zot fer en pti diplom ki donn e zot en pe plis konesans ki sa premye letid in donn zot, e i annan Dokter ki fer sa. Mersi.

MR SPEAKER

Mersi Minis. Onorab Pillay.

HON SEBASTIEN PILLAY

Mersi Mr Speaker. Mr Speaker, letan Minis pe koze mon'n sey fer en pe tour lorizon *Seychelles Medical and Dental council*. Ti annan sa lasosyasyon *doctors for doctors* ki ti zwenn avek Prezidan pou prezant zot bann problem, *and then* bann *issues* ki'n ganny souleve.

E bann *issues* par egzanp an sa ki konsern *lack of training and professional development*; i annan en serten konplent lo pou zot kapab al spesyalizasyon *whether* sa i posib. I annan osi *work safety* avek *salary* ki zot *on call* pou bokou letan bann presyon ki sa i mete lo zot.

Bann *medical liability* and *legal issues* ki asosye ek sa e menm prezan pou zot osi ti annan en letan kot bann Dokter ki ti travay dan *government health services* ti osi kapab fer travay dan sekter prive. So i paret sa bann problem i *sort of recur* e i kontinyen *recur*.

Eski ou'n zwenn avek bann lasosyasyon Dokter pou etabli *at least* detrwa keksoz de gran liny petet ki zot kapab komans adrese *and then* zot *move on to the next one*? Oubyen eski sa i *stil working progress*? Akoz parey nou

konnen i annan lezot Dokter Seselwa ki'n *resign*, nou annan bann ki pe fer spesyalizasyon ki zot pa pou retournen.

So, kwa ki ou pe fer pou *incentivized* bann Dokter osi pou zot retournen e reste dan servis, aköz mon en pti pe konsernen ki mon pa ankor kapab etabli en *retention system* oubyen en *Retention Scheme* pou nou bann Dokter. Mersi Mr Speaker.

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Onorab, sa ki ou pe dir la, i byen e i esansyel pou tou nou *staff* dan lasante. Tou profesyonnel lasante nou bezwen fer sir ki nou *retain* zot.

Eski mon'n zwenn avek Lasosyasyon Dokter? Ler mon'n vin dan sa pozisyon ti annan *doctors for doctors* ki mon'n zwenn avek zot. E sa zot ti en groupman Dokter, en Asosyasyon Dokter ler mon demande mon antann dir poudir zot nepli annan, *ok*.

Alor, mon pa'n zwenn avek en asosyasyon. Me sa ki mon'n fer mon zwenn avek diferan group Dokter, mon'n zwenn ek tou Dokter ansarz, mon'n zwenn ek diferan Dokter dan diferan group,

mon'n zwenn ek tou bann zenn Dokter ki vini e alor mon annan sa antretyen ki mon zwenn ek Dokter ki mon- zot kapab annan sa loportinite pou asire mwan en pe zot problem.

Me eski nou fer annan keksoz pou fer pou zot devlopman profesyonnel? Mon santi poudir konmela wi, nou annan en kantite plis pou fer pou zot devlopman profesyonnel. An term - *in fact* mon pe ganny *reminded* ki mon pa'n zwenn zis avek Dokter dan servis piblik, mon'n osi zwenn avek bann Dokter dan servis prive pou antann ankor en pti pe problem *medicine* dan Sesel.

So, i fer ki mon krwar koman en Ladministrasyon dan *Health* nou pe fer nou mye pou nou vwar ki mannyer nou kapab arive vwar bann diferan posibilite pou nou *retain* nou bann travayer lasante espeyalman nou bann Dokter.

Eski nou'n regard Polisi? Si nou pou retourn lo en Polisi koman *share- allow* Dokter Prive vin fer servis, donn servis dan servis piblik, *allow* Dokter ki dan servis piblik pou al fer prive i en keksoz ki toultan an diskisyon e nou pa ankor ariv lo en keksoz kot tou dimoun i pe tonm dakor kot i pou posibil, kot i pou soutenab.

E ziska ki nou fer sa nou pou le moman la e pa ankor annan en Polisi. Mersi.

MR SPEAKER

Mersi Minis. Bon, i annan 2 kestyon lo fasilite ase spesifik, donk mon pou bezwen limit kestyon siplemanten lo la si i neser. Kestyon 22 Onorab Francois Adelaide.

HON FRANCOIS ADELAIDE

Mersi Mr Chair. Bonn apre midi Minis avek ou delegasyon e tou dimoun a lekout. Minis mon kestyon i koumsa; -

Eski Minis i kapab donn detay sa Lasanble e zabitan Baie Lazare lo stati zot nouvo Sant Lasante, e dir zot, kan ki zot ekspekte koup riban e ganny akse avek sa nouvo fasilite? *Thank you.*

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Onorab, nouvo Sant Lasante Baie Lazare i en parmi bann proze enportan pou ranforsi servis lasante dan sa rezyon. Devlopman sa sant in lo latay parey ou konnen pandan plizyè lannen.

Nou kontan ki sa lannen nou kapab fer li e ki nou pou kapab parey ou dir koup riban. Onorab, mon konnen poudir ou, ou'n enn ki'n pouse

e en kantite e nou'n ganny en kantite *calls* e vizit *from* ou pou regarde ki mannyer nou pe fer sa sant, kan nou pou fer li. Nou rekonnet lenportans sa sant pou bann zabitan Baie Lazare e nou oule donn zot en Servis Lasante ki modern, ki fasilman aksesib e ki efikas.

Kontrakter pe travay dapre plan e nou konnen ki zot in dir nou poudir i annan en posibilite ki zot a *handover* sa batiman lafen Me, e si tou keksoz i al byen nou'n fini pe fer *procurement* bann diferan bann lekipman ki pou al ladan, i annan en posibilite ki dan Zen nou ava kapab pe revwar sa sant ouver ou si non Zilyet.

Nou pe asire ki avan nou koup riban, ki tou lekipman i neser pou la e pou pe fonksyonnen e bann servi i ava byen etabli e ki sa fasilite i a pare pou resevwar pasyan.

Nou pe travay pou fer sir ki sa sant i ouver dan en fason ki i kapab ofer en servis lasante ki meyer e ki reponn a bezwen kominote Baie Lazare.

An menm tan, mon anvi fer resorti ki pandan ki nou rekonnet valer en nouvo sant, nou bezwen osi rapel ki nou lasante i depan bokou lo lafason ki nou viv nou lavi e alor nou ansanm avek zabitan Baie Lazare mon panse poudir sa sant pou ed nou fer sa. Mersi.

MR SPEAKER

Mersi Minis. Wi, Onorab, siplemanter?

HON FRANCOIS ADELAIDE

Mersi Mr Speaker. Minis, dabor mon dir ou mersi, mersi ou avek ou tim ki pa'n zanmen les nou tonbe malgre nou'n lager pre 8an e finalman nou vwar poudir sa proze pe vin en realite. So, lo lapar zabitan Baie Lazare mon oule remerci ou senserman avek ou lekip pou kit zot komitman.

Petet Minis, mon a demann ou 2 pti kestyon, apre taler osi mon tann nonm Servis Danter vi ki servis osi ti'n bouze apard ki bann klinik normal, eski i osi pou trouv dan sa fasilite an menm tan ki ler nou pou ki ler sa fasilite pou ouver?

E apre posibleman Minister, vi ki ou avek Minister Fonska zot 2 Minis dan menm Gouvernman, i annan fasilite la pou fer lozman petet pou lapolis avek petet avek pou bann ners aköz parey nou pe ankouraze. Nou pe rod *incentives* pou ners *incentive* pou lapolis e la obor sa klinik mon krwar i anann en *site* ideal.

Eski petet ou ava mazine pu kolabore avek Minis Fonseka pour ki nou a kapab fer en fasilite pou ners e pou lapolis e ki zot a partaze e

byensir i ava en *plus* pou nou distrik. Mersi bokou.

MR SPEAKER

Mersi, mon pa konnen si Minis kapab reponn pou Lapolis me kekfw a i ava reponn pou ners.

MINISTER PEGGY VIDOT

Mersi Mr Speaker. Onorab, wi nou asir pou poudir Servis Danter pou retourn Baie Lazare dan nouvo fasilite e sa i pou kontinyen. E toultan nou pou regarde ki mannyer nou kapab amelyor sa servis.

Bon, eski nou kapab fer en diskisyon pou nou vwar si nou kapab servi annan en fasilite pou rezidansyel pou travayer lasante dan sa sant, i keksoz ki nou kapab diskite. Mersi.

MR SPEAKER

Mersi Minis. Kestyon limero 23. Onorab Waven William.

HON WAVEN WILLIAM

Mersi Mr Speaker. Mr Speaker, mon pe *withdraw* sa kestyon baze lo bann diskisyon resan vizavi fitir devlopman lo sa sit. Mersi.

MR SPEAKER

Mersi Onorab. Nou a rekonnet ou drwa pou retir ou kestyon. I reste nou 2 *Questions Without Notice* e nou a pran sa 2 kestyon. Premye i dan non Onorab Regina Esparon.

HON REGINA ESPARON

Mersi Mr Speaker. Bonn apre mid Minis ek ou delegasyon. Kestyin i al koumsa; -

Eski Minis i kapab enform Lasanble ki son Minister pe fer pour ki sa problemn *sewage* sorti kot Lopital North East Point e pe desarz dan lanmar i ganny rezourd?

MR SPEAKER

Mersi Onorab. Minis.

MINISTER PEGGY VIDOT

Mersi Mr Speaker. Mersi Onorab. Onorab, Minister Lasante ti ganny notifiye konsernan en problemn desarz dan lanmar kot Lopital North East Point an repons imedya nou ti pran mezir pou aret sa dezsarz e nou'n organize pour annan en sistenm an plas kot nou ponp *septic tank* 2 ou 3 fwa par semenn opu kontrol sa sityasyon.

Depi ki sa pratik pe ganny fer, pa'n annan nouvo desarz dan lanmar e Lotorite Lasante Piblik in konfirman ki sa i leka.

Paralel avek sa, mon Minister an kolaborasyon avek *Seychelles Infrastructure Agency* pe travay lo en proze pou enstalasyon en sistenm tretman desarz pou fasilite North East Point. Preparasyon

sa proze in fini arive dan en staz avanse. Bann prosedir *procurement* pe ganny finalize e nou pe finaliz lapwentman kontrakter e *tou sa, pou* lans sa travay.

Alor Mr Speaker, parey Onorab i okouran sa i pa en nouvo problemn me aköz sa fasilite i fonksyonn 24 lo 24 e i trouv zis akote en lanmar ki an kontak avek delo sale, ti en defi pou trouv en solisyon ki efikas e dirab. La ki plan apropiye in ganny devlope nou espekte ki swivan laprouvasyon nesese proze i ava komanse ver milye ou trwazyenm kar sa lannen.

Pou azoute, nou annan-dek ki nou ganny *go ahead from Procurement* e tou keksoz, nou ava kapab komans sa demars pou nou ganny sa fasilite tretman desarz. Mersi.

MR SPEAKER

Wi Onorab Esparon, ou siplemanter?

HON REGINA ESPARON

Mersi Mr Speaker. Zis en pti klarifikasyon Minis. Mersi pou akte lo sa sityasyon ase vit pourki sa bann dimoun ki fer netwayaz dan lanmar pa ava santi zot lasante an danze aköz sa ti en konsern aköz zot ti pe santi poudir lanmar i polye ti difisil pou zot desann

ladan pou zot al netwaye.
Mersi pou sa.

E Minis, nou ti ava kontan demann ou, an vi ou'n dir mwan poudir sa travay ki pou fer keksoz tanporer-permanan pou ganny fer dan trwazyenm kar sa lanenn. Eski an se moman la i annan en *monitoring* ki pe regarde ki sa sistenm zot in met la provizwar i efektiv e i pa pe marse?

MINISTER PEGGY VIDOT

Mersi Mr Speaker. Onorab, sa program ki annan la, *Public Health Authority* i pe *monitor* e sanmenm sa zot kapab dir nou poudir zot konfirman ki napa desarz ki pe al dan lanmar. So i annan en *monitoring* ki pe ganny fer. Mersi.

MR SPEAKER

Mersi Minis. Prosen kestyon i dan non Onorab Churchill Gill. Onorab?

HON CHURCHILL GILL

Mersi Mr Speaker. Bonn apre midi Minis ek ou delegasyon. Kestyon i lir koumsa; -

Eski Minis i kapab enform sa Lasanble, si *automatic switch* sa zenerater prezan pe marse, ki *staff* pa pou bezwen mannyelman *start* sa zenerater.

1. Eski tou sa bann *back-up batteries* lo tou masin dyaliz pe marse?

2. Eski lezot zenerater dan Servis Lasante dan pei zot *automatic switch* pe marse? Mersi.

MR SPEAKER

Mersi. Petet i mank en pti presizyon dan ou premye kestyon se ki i an referans avek kestyon ki ou ti demande semenn pase lo bann Masin dyaliz lo, elektrisite pou bann mazin dyaliz lo Praslin. So, Minis i a pran not sa. Minis, ou repons.

MINISTER PEGGY VIDOT

Mersi Mr Speaker. Mersi Onorab pou ou kestyon. Swivan koupir kouran ki ti arive semenn pase, Minister avek *Health Care Agency* avek Minister in travay pou regard sa sistenm, fer sir ki sa sistenm ki i met an plas i marse.

Nou'n fini idantifye en kontrakter pou fer reparasyon lo sa *automatic transfer switch*, e i pou fer en servis konplet lo zenerater kot lopital Baie Ste Anne Praslin.

Sa kontrakter in fer son evalyasyon profon e in kontinyen ki menm si zenerater i pe fonksyonnn byen, son *automatic switch* pa ankor pe mars byen. Zot in idantifye en pyes ki i bezwen ganny

ranplase ; zot in fini met en *order* pou sa pyes e sa i vedir ki pour le moman sa zenerater i bezwen ganny demare, mannyelman.

Mr Speaker, kot Lopital Baie Ste Anne nou annan nou 4 masin dyaliz ; 3 parmi sa bann masin i annan en batri lo la. Sa batri pa ganny servi pou kontinyen tretman dyaliz ler nou annan en koupir kouran. *Ok?*

MR SPEAKER

Minis, kontinyen silvouple.

MINISTER PEGGY VIDOT

Sorry, Onorab pe dir mwan i pa tro tande. Sa batri i la, prensipalman parey sa repons ki nou'n anvoye espesyalman sa batri i marse pou 20 a 30 minit apre en koupir kouran pou ed sa masin fonksyonnen.

Fonksyonnen dan lesans ki nou kapab pe serten bouton lo la pou fer disan ki dan masin retourn dan sa pasyan, i pa fonksyonnen dan sans pou nou kontiny dyaliz.

Wi, parey mon dir i annan 3 masin ki son batri i mars byen; i annan en masin ki sa batri pa mars byen, me ler en masin batri pa marse, sa mannev ki nou fer lo masin nou bezwen fer li manyelman.

Me selman nou kapab asir ou ler sa i leka, ki lavi sa pasyan pa an danze, akòz aret en dyaliz, parey i arive letan en

kouran i koupe i parfwa nou osi akòz en rezon spesifik avek pasyan nou bezwen arete sa dyaliz.

Ou bezwen enteronpe, e alor enteripsyon dan en dyaliz i pa afekte lavi sa pasyan e i annan posibilite pou ler ou rekomanse akòz lo sa masin i annan en *memory* ki dir ou egzaktman kote ou ti'n arive an term poursantaz letan ki ou ti'n mete pou ou dyaliz sa masin.

Mr Speaker, nou annan nou an total parey keston i demande 8 zenerater ki nou annan dan nou- ki nou etabli dan sistenm servis lasante lo Mahe lo Praslin ek La Digue. Sa bann zenerater zot ganny plase *comme* swivan; - i annan 4 kot Lopital Sesel. I annan enn Anse Royale i annan enn kot *Family Hospital* i annan enn Baie Sainte Anne e i annan enn La Digue.

5 parmi sa bann zenerater pe fonksyonnen normalman, zot demare otomatikman si nou annan en koupir kouran enn dan sa 4 zenerater ki kot Lopital Sesel i annan en problem e an se moman i annan serten travay ki pe ganny fer lo li akòz en travay en pe bokou.

Kot *Family Hospital* sa zenerater i marse, fonksyonnen byen a son *automatic switch* osi i dan bon kondisyon me son batri i bezwen ganny

sanze e sa i keksoz ki pe ganny aranze.

Swivan bann koupir kouran ki ti arive semenn pase, Minister parey mon'n dir in pran- in azir in fer sir e la lo Praslin Onorab, nou annan en kontrakter ki pe organiz e aranz sa masin e li i pou sa enn osi ki pou fer sir ki si zanmen i arive en koupir kouran, ki li ki pou kapab vini pou vin remet li e menm fer sa fonksyonman. Mersi.

MR SPEAKER

Mersi. Onorab Gill, siplemanter?

HON CHURCHILL GILL

Mersi Minis pou ou bann larepons. Minis, pou sa zenerater, lenformasyon ki mon annan, ti annan en rapor ki ti ganny fer pou son lenstalasyon konplet parey ki normalman en zenerater i ganny fer dan lopital, e ti annan lezot konponan ki ti bezwen pou met kot sa zenerater an menm tan avek sa *switch*, la ou'n dir nou ki pyes pe al rode.

Me selman sa zenerater li menm kot i ete i ti sipoze annan son lenstalasyon konplet, ki ozordi la i napa, si ou kapab donn nou en nide si la, vi ki zot pe *attend* tou sa zenerater, tou sa bann keksoz pou ganny *attend to*, ki nou ava annan en zenerater ki a

fonksyonnn parey ki i devret fonksyonnen?

Lo kote sa bann masin dyaliz parey ou dir mwan zot tou zot annan en batri, mon mazin en sa batri ti'n met pou en rezon. E sa kestyon se zis pou asire ki lasante bann dimoun ki servi Lopital Baie Ste Anne enkli bann lekipman tou i pe marse.

Alors, si ou kapab asir nou ki tou bann defayans ki annan lo diferan lekipman ki dan sa kestyon si i kapab ganny adrese en fwa pour tou ki asire ki menm nivo servis ki pe ganny donnen Lopital Sesel pe osi ganny donnen Lopital Baie Ste Anne Praslin. Mersi.

MR SPEAKER

Mersi Onorab. Minis?

MINISTER PEGGY VIDOT

Mr Speaker. Mon ava reponn son dernyen kestyon e mon ava avek ou permisyon demann Dr Louange pou adres sa bout premye kestyon.

Onorab, mon kapab asir ou wi ki menm servis ki pasyan Praslin i gannnen i ava parey ki pasyan Mahe. E mon'n eksplike poudir lefe ki i annan en masin Praslin ki i pa pe annan son batri lo la ki pa fonksyonenn, i pa met an danze lavi en dimoun.

Akoz parey mon'n eksplike sa batri i zis pou ed nou omye ou mannyelman fer

sa disan retournen nou pezo en bouton e sa i fer vit koumsa ki ou kapab ale al fer lezot keksoz. Me mon asir ou poudir menm tretman i donnen partou dan Sesel. Mersi. Mr Speaker, si ou les...

MR SPEAKER

Mersi. Dr Louange.

CEO HEALTH CARE AGENCY
DR DANNY LOUANGE

Mersi Mr Speaker. Mersi Onorab pou sa keston. Eskiz mon lavwa.

Onorab, wi i vre ki i ti annan plizyer evalyasyon ki'n ganny fer lo sa masin, sa zenerater Praslin Baie Ste Anne e nou'n travay tre pre avek PUC e nou remersye PUC pou donn nou sa led osi tanzantan ki'n ariv en problem avek sa zenerater zot in la pou ed nou.

E nou pe travay tre pre avek zot sirtou lo bann pyes ki nou bezwen ranplase, me enn bann defi ki nou'n annan i pou rod en kontrakter ki kapab ki *reliable* lo Praslin sa in difisil pou nou.

Alor, ki nou, nou ti'n idantifye en dimoun son non i Mr Francois, nou osi remersi li pou volonterman ed nou avek sa masin. Me la nou'n kapab idantifye en kontrakter ki annan en enzenyer ki kapab ed nou e la nou e la nou plan i pou devlop en kontra avek sa

kontrakter konmkwa ki nou ava annan en *maintenance* avek en sipervizyon e menm si i annan en *issue* avek sa zenerater sa kontrakter i a la pou ed nou e nou osi nou annan PUC dan *background*.

Wi, pou reponn ou keston, sa bann pyes ki neser pou fer sir ki sa zenerater pe mars lo o nivo in ganny *order*. Mersi.

MR SPEAKER

Mersi. Mon annan lezot Manm ki'n lev lanmen normalman mon pa pran keston siplemanner lo Kestyon *Without Notice* e se pou senp rezon ki mon pa anvi ki *Questions Without Notice* i ganny servi pou sot laliny keston ki annan.

Be selman mon demande si dan sa ka si i annan okenn pwen ki bann zot santi bann Manm ki'n lev lanmen ki bann zabitan Praslin oubyen bann ki servi sa sant, sa servis dyaliz laba si i annan pwen ki zot bezwen konnen mon krwar i ava en lokazyon pou nou eklersi sa.

Onorab Uranie mon pe zis demande e osi Onorab Woodcock e Onorab Porice ki si zot annan keston zot *stick to* sa ki servis Baie Ste Anne i bezwen fer.

HON ROCKY URANIE

Wi, Mr Speaker. Mersi bokou. Annefe pou mwan i zis pwen ki mon anvi siport lapel ki Onorab Gill pe dir aköz mon annan pasyan La Digue ki bezwen al fer dyaliz Praslin.

An vi ki nou annan sa masin dyaliz La Digue, petet ti a bon petet Minister zis petet pou, petet pous en pe pli vit lo la pou ki sa masin i a kapab fonksyonnen petet, ki a tir en pe presyon lo sa ki Praslin e petet menm met en rod en teknisyen pou tenir lo Praslin ki i ava *oversee* Praslin avek La Digue si zot kapab fer sa silvouple? Mersi bokou.

MR SPEAKER

Mersi. Wi. Mon asire Minis in byen note. Minis ou anvi fer en pe remark lo la?

MINISTER PEGGY VIDOT

Mersi Mr Speaker. Zis pou mwan reasir Onorab. Onorab, nou pe fer tou sa ki posib e mon espere ki byento kan nou annan tou keksoz an mars an plas nou ava komans servis dyaliz La Digue.

MR SPEAKER

Mersi Minis. Onorab Woodcock?

HON WAVEL WOODCOCK

Mersi Mr Speaker. Annefe Mr Speaker, le moman ki sa konsern ti ganny met devan tou lede Onorab Porice avek

mwan menm nou'n an kontak avek Minister, *the main issue* sete konsern ki bann pasyan dyaliz ti pe met devan, ki si i arive koupir kouran sa masin dyaliz i arete si i pou an lenpak lo zot lasante?

E Minis in klarifye sa. In ekersi sa poudir napa okenn lenpak lo zot lasante. Mersi.

MR SPEAKER

So, ou satisfè. Mersi. Onorab Porice.

HON DOYACE PORICE

Mersi Mr Speaker. Minis, mwan mon pou felisit bann travayer dan sant dyaliz Lopital Praslin, pou sa bon servis ki zot pe donn nou bann pasyan. E en pti keksoz mon ti a kontan demann ou Minis, vi ki lanbilans i vremen limite e i bizi, eski ou Minister pe mazin annan en transpor pou sa bann pasyan dan sant dyaliz? Mersi.

MR SPEAKER

Ok, Minis, ou a kapab donn en repons. Minis,

(comments off-mic)

MR SPEAKER

Order! Ok, nou a termin la, ale Minis.

MINISTER PEGGY VIDOT

Mr Speaker, wi, dernyen fwa ki nou ti Praslin nou'n diskite sa e nou pe regarde ki mannyer nou kapab amelyor servis transpor pou bann pasyan dyaliz lo Praslin. Mersi.

MR SPEAKER

Mersi. Bon, nou termin la avek sa sesyon kestyon e mon bezwen remersye Minis e son delegasyon Dr Valentin, Dr Louange e Dr Gedeon. I en tim ki nou war ase souvan dan Lasanble e mon swet zot bonn kontinyasyon dan zot travay.

Nou termin osi la pou ozordi, Lasanble i ava *adjourn* e nou a rebran demen bomaten 9er. *Adjourn*.

(ADJOURNMENT)